

Izesu Kilistoni Gakó Lamaná Luká Luhuva Gizamó

Luká eza imane luhuva Teopiloni gizo amimó

1 ¹Ve mukilite holutegú utó i netá nenémini gakoláa ali amegesaló miliki luhuva gizinamó. ²Keza nene monó liaká vete mogonalotí Izesuni netá mukí ángi hee liake li utó iki li leme gakó luhuva gizinamó nenazo, ³neza ámina oko ámina gakó lamaná nene legesó oko ale lamaná oko gele hee lokuke nene, Teopilo gugulizaki venemaka, geí nene ale etó etó oko luhuva imane gizo nogumumó nene ⁴géisi nene gatoko avetó gakó li gememó nene gihila lamaná neve loko gilitane loko nogizuve.

Monó nagamí holokimiaká ve Zoní utó itikumú epoapoga limó

⁵^a Zutaia mikasigú nene agulizaki ve napa Heloté gizapa oko mina zupa nene Ómasi guguni gizo ameká ve makó minamó agulizá Zakaliá, Apiani mulusigutí. Eza Alonani agapilamokutí vená makó alimó agulizá Elisapeté. ⁶Keza Ómasímini avogisaló kigika lamanaki minasike gapo lota gakó Ómasímo lo hukoko li gakó lihimáini nomimó minasike gili alikigó minasimó. ⁷Elisapeté nene gohuna vená minokago, keza izegipáini nomimó minasike ozaha gelehosi milasimó.

⁸Zakaliani mulusi keza monó numuni napagú Ómasi guguni gizi amita gamena alitokago, ⁹guguni giziaká vete aliaká amó nenéminiki hozanini ali etó etó iki alimi nivake, Zakaliani nene Ómasi guguni gizo amezo liki alími etó ikago, monó zagusave agikagú itike anuva lamanaki netá nene Ómasi guguni gizo namigo, ¹⁰vegená mukilite geisa agikagú minake Guivahaniloka liki minamó. ¹¹Nilago Guivahanímini ageló makolímo utó o amike guguni gizoaká ita lamagaloka ote minamó. ¹²Oteneigo, Zakaliá ángoake ininá ike alegesá ligimó. ¹³Alegesá legekago, ageló nenémo láa

^a 1:5 1 Iki 24:10

loko lo amimó: Zakaliazo, geza gelegesá legemino. Guivahanímo numuna nolanimó nene mota geleneize, venaka Elisapeté nene izegipa agatupagi minoko gipa getatimó nene agulizá Zoní ave loko molozo. ¹⁴ Geza mulukagú lamaná geleko gogoliza vizinogo ane. Itó vejená mukilite gipaka utó itikumú nene laga kivisinogo ive. ^{15^b} Eza nene Guivahanímini avogisaló nene ve napa loló oko minative. Eza vain nagamí ahe itó negi nagamí ahe nonamoko moseko nominiko, izolahini agatupagú noikutí Sikalahulímo aí agikagú mino vaí itive. ¹⁶ Lá okiko Isilae vejená mukí nene gapo golesagutí kelémo atiginá okiko, Guivahani Ómasímini kovogisa i aminigave. ^{17^c} Eza Ómasímini agepagutí gakó loaká ve Ilaizá oaká imó nenémínoko amuza moloko Guivahanímini gapo veletoko aí gakó lo utó utó oko minanogo ive. Lá oko minoko olotiva vejenalitini itó izegipa komatini kigika ale apizeketative. Lá okiko gakó gili ahuliaká vejená nenete kigika lamanaki vete nigele monó nene kagata gámemé iki gilinigave. Itó eza ámina hoza alekiko, vejená mukí keza Guivahanímú ageva iki minanigave.

¹⁸ Ageló nenémo láa loko lokago, Zakaliá eza anotó aleko láa loko lo amimó: Venánegi leza ozaha gelehosima nousinazo, nenemú geí gakó gulugo gihiláa loló amive. ^{19^d} Loko lokago, agelómámo láa loko lo amimó: Gelenape. Neza nugulizáne Gapelienama noluve. Neza Ómasímini avogisaló minoko aleko oaká noumóma neve. Áisi nimiselekago lumuke gakó lamaná imane lo nogumuve. ²⁰ Nenemú gelezo. Gakó lo nogumumó nene gele alévolé amanimómámini lihima nene gakó lamoko negi hizeko minoloko novako, minoko gakó lo nogumumó nene gihila ziti gamena nene gakó goha linogo ane. Neza nolu gakó nene hetagá aminogo ive.

²¹ Loko lokago, Zakaliá eza monó numuni napagú gamena hána minokago, vejená keza ageva iki minake minake gopa kagata gelemó. ²² Lá iki niago, Zakaliá alika limike gakó lo kiminogo gopa imó. Gakola gopa okago, keza nene monó zagusaveú netá haitolímini makó áníhoitoive. Liki nigelego, eza negi hizeake gakó nana oko lo kimitohe loko agizanitunú avevezaha o kimike gakó lo kememimó. ²³ Lá oko noigo, hoza aliti gamena asú okago Zakaliá nene numunaloka atiginá oko vimó.

²⁴ Alika venala Elisapeté nene izegipa agatupagi minamó. Lá oake ikani 5 oko novigo halá geko minake, ²⁵ Guivahanímo gamena molamó nene alitokago Guivahanímo hize lé onimiake gohuna vená minukumule loko novoza hulu netá monéna ale ahulonimikave, loko limó.

Izesú utó itikumú epoapoga limó

²⁶ Lá okago, izegipalagi minatotí ikani 5-a ale ahulokago, Ómasímo ageló Gapelienima goha amiselekago Galilaia mikasiuka Nasaleta

^b 1:15 Nam 6:3 ^c 1:17 Mal 4:5-6 ^d 1:19 Tan 8:16, 9:21

numutoka vimó. ²⁷e Neneloka izaina vená makó minamó, agulizá Maliá. Eza nene agulizaki ve napa Tevitini agapilamó zuhagutí ve makó minamó agulizá Zosehé aí ánígi milimikago minamó. ²⁸Noigo ageló nenémo Maliá noitoka utó oake láa loko lo amimó: Guivahanímo hize lé ogetago noanitika nenoape. Guivahanímo geitoka noive. ²⁹Loko agelómámo lokago, Maliá giligo gena okago, agikatunú nene gakó limómámini mogona nana oko netive. ³⁰Loko nogiligo, agelómámo láa loko lo amimó: Maliázo geza gehelele vizemino. Ómasímo geí ánígokago lamaná okave. ³¹f Gelenape. Geza izegipakagi minoko gipa getatanimó nene agulizá Izesú ave loko molozo. ³²g Eza nene sipisi ve loló oko noiko Ómasímini gipalave liki linigave. Itó Guivahani Ómasímo nene avolaho Tevitini akilí ale hitomikiko minanogo ive. ³³Itó mino lúaló moloko Zakoponi agapilamó zuhaloka gizapa oko minanogo ive. Guivahani loló oko minatimó nene asú amoko gamena hána hána mino-loko voko minanogo ive. ³⁴Loko agelómámo lokago, Maliá láa loko lo amimó: Neza vánegi apizeko minamusive. Nenemú nolani gakó nene nana oko alévolé itive. ³⁵Loko lokago, ageló nenémo láa loko lo amimó: Ómasímini Sikalahulímo geí gumupiló liminogo ive, itó Guivahanímini zámuzámo hize lé ogetanogo ive. Nenemú gipa getatanimó nene etó keké vizeko noi gipa Ómasímini gipalave liki linigave. ³⁶Itó makó lo gimitoze, gelezo. Geí zuhagutí Elisapetéma nene gelehosimámo izegipa agatupagi noigo ikani 6 mota vokave. Eza nene gohuna venámave liki nilago izegipalagi minokave. ³⁷h Ómasímo loló amiti netala ma nomive. Loló iti netakó nenazo, nenemú Ómasímo Elisapetenimú li gakó mota gihila zekave. ³⁸Loko lokago, Maliá nene neza Guivahanímini gelekelé mohó nounazo, nolani gakó nene ámináminoko utó ino. Loko lokago, ageló nenémo ahulomiake vimó.

Maliá Elisapeté noitoka vimó

³⁹Maliá nene mino hána amike Zutaia mikasiuka agokaloka numuni makó minatoka iteko vimó. ⁴⁰Iteko vike Zakaliani numukú itike Elisapeteni geké lotamó. ⁴¹Geké lomikago, Elisapeteni mulunagutí izegipalama ziginí igo gilimó. Gelekago, Ómasímini Sikalahulímo nene Elisapeteni agikagú lemeko vaí okago, ⁴²gakó napa like láa loko lo amimó: Ómasímo eza vená mukikutí gelémo etó ike nónohá zegimikave, itó izegipa getatanimó nenegi lusa gemikave. ⁴³Geza není Guivahanímini izolagama noane. Vená ánéama nounazo, nanamú nenitoka okane. ⁴⁴Gelezo. Geké nolonetako, izegipa nenémo mulúnegutí agoliza novizike ziginí okago gelekuve. ⁴⁵Itó geza nene Guivahanímo lo gimi gakó vo alitive loko gele alévolé okako, Ómasímo lusa gegimikave. Nenemú gulugo lamaná okave.

^e 1:27 Mat 1:18 ^f 1:31 Mat 1:21 ^g 1:32-33 2 Sam 7:12-16; Isa 9:7 ^h 1:37 Apí 18:14

Maliá agoliza vizike Ómasi agepoka limó

- 46 Loko lokago, Maliá láa loko limó:
 Neza nigikatunú Guivahani agepoka noluve,
 47 ⁱ itó sikalahúnetunú Ómasi nugutó vizeaká vemú nogoliza vizuke
 agepoka noluve.
- 48-49 Itó gelekelé mohola neza minomo lemeko minumó
 itínasa nelémoko noitive.
 Ómasi alévolé ve nenémo nenitoka netá gihila ale utó okamó
 nenazo,
 nenemú omolelé amalelé iki mini-liki itita vegeanalite
 nenikumú giliiki Ómasímo lusa geta venale liki linigave.
 Aí agulizá etó oko neve.
- 50 Aí gili amita vegeaná nasahilí okimiaká noive.
 Omolelé amalelé iki minimi ite vegeaná lá okimiaká noive.
- 51 Kezáini kugupemú gelego iteaká noi vegeaná nene
 ezáa alévolé zámuzá ale utó ike kelémo ahuloaká noive.
- 52 Itó kugulizaki ve kehelú okago
 keí gonanalivagi holomalotí velehé limiaká niave.
 Itó vegeaná limiki minamoláatini kugulizáini ale napa oaká noive.
- 53 Gohogó vegeaná itó gaúna hiliki nimina vegeaná nene
 netá gihila kemekago, kagatupa igo miniaká niave.
 Itó henóinigi vegeaná ahulokimikago
 muhelé iki miniaká niave.
- 54 Ómasi eza gelekelé otoko minuni vegeaná nene hize lé olimikave.
 Eza agika lamanakímove loko Isilae vegeaná leza lá olimikave.
- 55 ^j Avotegini láa loko lo moloketamó nene
 Avalahani itó agapilamó zuhagi lo mololetamómámini gihila utó
 oloko voko minanogo ive.
- 56 Loko Maliá loake, Elisapeteki minasike ikani losive makole ale
 ahuloake, numunaloka atiginá oko vimó.

Monó nagamí holokimiaká ve Zoní utó imó

- 57 Itó Elisapeté eza izegipa getati gamena alitokago, gipa getamó.
 58 Getokago, vegeнала zuha agivelage keza Guivahanímo muluna ze hoú
 lake ale utó i netakumú giliake, ezagi makó mulúikú lamaná gelemó. ^{59 k}
 Lá iake, gamena 8 oko vokago, gipa namunimámini agupeló Ómasímini
 anosa militanigi mukí vegeaná alegesá ake amelaho Zakaliani agulizató
 milanigi lámó. ⁶⁰ Liki likago, izolaho géneka like Óe, agulizá Zoní ave
 loko molatune. ⁶¹ Loko lokago, keza láa liki li amemó: Íi, geí zuhatini

ⁱ 1:47 1 Sam 2:1-10 ^j 1:55 Apí 18:14 ^k 1:59 Liv 12:3

kugulizá makó nenéminoko nomive. ⁶²Liki géneka hánaka nilake, Zakaliá nene gipalámuni agulizá nanave loko molative liki kigizanitunú avevezaha ikago, ⁶³eza pepamú agizanitunú avevezaha okago, pepa alimi amikago, agulizá Zoní ave loko luhuva gizamó. Gizokago, giliake sigaga lamó. ⁶⁴Lá ikago, Zakaliani genezala litá oko lamaná okago, Ómasi agepoka limó. ⁶⁵Lá okago, agive lugáa keza giliake kelegesá ligimó. Lá okago, Zutaia mikasigú zopegaloka numutó namató nene ámina gakó aveté iki ligili hagili ikago, ⁶⁶vegená mukilite gakóini giliake ali kigikagú milake gipama nene napa okoko nana itive. Liki lamó nene, Guivahanímini zámuza nene ámina gipaloka nego giliake lamó neve.

Zakaliá epoapoga li gakó

⁶⁷Itó amelaho Zakaliani nene Ómasímini Sikalahulímo agikagú minake alémo vávani igo alika utó iti netakumú epoapoga like láa loko limó:

⁶⁸Isilae ve leza Guivahanite Ómasi agepoka litune.

Eza nene vejenala zuha lelí lelémo vatí ike
netá golesagutí gologí olimikave.

⁶⁹Lugutó viziti lapusa ale oteko hizekave.

Gelekelé izegipala Tevitini agapilamó zuha lelitoka neve.

⁷⁰Ómasímini agepagutí gakó liaká ve kelémo vávani okago epoapoga gozapá láa liki liaká amóma neve:

⁷¹Lova vetini kigizakutí gologí oletanogo ive.

Mukahá lipiliaká nia vegutí akagá oletanogo ive.

⁷²Avotegini nigika hize kimitove loko lo moloketamole.

Lo múnaheake lo hukoko li gakó gele minake lá oketamole.

⁷³Itó avoteho Avalahani láa loko alévolé oko lo molotamole:

⁷⁴Gala vetini kigizakutí gologí oletanogo ive.

Lá okiko lelegesá legemiko gelekelé otoko minanogo une.

⁷⁵Nenemú ligika avasavagi miniko gakote minamiko gelekelé otoko minoko hilitune, liki lamó neve.

⁷⁶¹ Itó gipa geza Guivahanímini monó gakoláa lole ale oko aí gapo veletataninazo,

geikumú nene vozaú vémini agepagutí gakó loaká veve liki
linigave.

⁷⁷Ómasímo vejenala zuha kugutó viziti gakó lo kemekako, keza gili zagikiko, lihimáini ahuloketanogo ive.

⁷⁸Lelí Ómasile eza milumate geleká noimó nenazo, eza lititó nene velé okulumakutí okululuva notovoko,

⁷⁹^m límugusigú nouhá vejená hize hanatoletanogo ive.

Itó heleakakú nominuhá vejená hize sata oletanogo ive.

¹ 1:76 Mal 3:1 ^m 1:79 Isa 9:2

Lá onoiko nonagá lamanalímini gapova utó iko
nenegú vinogo une, loko Zakaliá limó.

⁸Itó ámina gipa nene agupegi agikagi napa oko alévolé okago, mikasi gomopalaló voko noigo, hoza aliti gamena alitokago, Isilae vegeatoka utó oko minamó.

Gipa Izesú utó imó
(*Mat 1:18-25*)

2 ¹Gamena nene zupa Loma vetini agulizaki ve napa minamó, agulizá Agustó. Eza numutó namató vejená kugulizá alilo loko gakó ahulokago vimó. ²Nenémimi hoza gozapá alemamó. Kilinió nene Silia mikasiuka agulizaki ve loló oko noigo ámina netá apí iki alemó. ³Lá niago, vejená mukí nene lugulizá alitave liki avóikini gotó apáitoka viká viká niago, ⁴Zosehé eza agulizaki ve napa Tevitini agapilamó minamó nenazo, eza ámináminoko Galilaia mikasiuka Nasalete numutoka minatotí ahuloko Zutaia mikasiuka nene Tevitini gotó apatoka Petelehe numutoka itimó. ⁵Noitike ániigi milita vená Maliáma izegipa agatupagi alémago vasimó. ⁶Viki minasike izegipala getati gamena alitokago, venoni vejenalitini akiaká numuni gikí okago, olovó zikasike pulumaká izatini numukú itiki minasike, ⁷ganá gipala getoake, gotunú asapú omiake pulumaká izatini nosánetá kimiaká lapegú molomikago ako minamó.

Sipsip izaló gizapa vegi ageló vejenaki

⁸Lá okago, ámina mikasiuka ve lugáa nene holugúnaka gihisiló minake sipsip izáiniló gizapa iki minamó. ⁹Lá niago Guivahanímini ageló makolímó keitoka utó noigo, Guivahanímini lapanalímó hize sata omikago, kehelele vizimó. ¹⁰Lá okago, agelómámo láa loko lo kimimó: Gilinahe. Neza gakó lamaná aleko nolumumó nenazo, lekeza lekehelele vizemino. Nenémimi gihiláa nene vejená mukitoka utó o likimiko mulutikú agila guluma inogo ive. ¹¹Itínasa lukugutó viziti ve Guivahani eza gologí oleketative loko lo mololeketa vema nene Tevitini gotó numutó utó o noive. ¹²Itó anosa makó lo likimitoze, gililo. Izegipa namuni makó nene gotunú asapú iki izatini nosánetá lapegú milimikago akonoize, viki ániigalo. ¹³Loko lo kemekago, galinali ageló vejená mulusi napa nene okulumakutí limiki kigivéipo minató alegesá iki minake Ómasi agepoka lake nama láa liki lamó:

¹⁴ Logoliza vizeko okulumakú Ómasi agepoka litune.

Mikasiuka Ómasímó ániigo amu hili vegeatoka hulu utó ino.

¹⁵Liki ageló vejenámate liake atiginá iki okulumakú itikago, sipsip izaló gizapa ve keza láa liki ligili hagili amó: Leza Petelehe numutoka vinake Guivahanímó gakó lo limitímini gihila ániगतune. ¹⁶Liki liake

litá iki viki Maliako Zoseheko kilími utó iake gipa namunima pulumaká izatini nosáneta lápegú akonoigo áinigamó. ¹⁷Ánigiake, agelómámo izegipamú lo kimi gakó nene aveté iki li kememó. ¹⁸Lá ikago, izaló gizapa vetini kegepagutí gakoláa gele vejená keza sigaga li asú amóza, ¹⁹Maliá nene gakó mukí ale agikagú moloake agata geleva geleva oko minamó. ²⁰Itó sipsip iza gizapa ve keza atiginá iki vake ageló lo kimitó utó okago ániga netakumú nene Ómasi agepoka liki agulizá ali otki minamó.

Izesuni agupeló Ómasímini anosa militamó

²¹ Gipa Izesúma utó okago, gamena 8-ía vokago, gipamámíni agupeló nene Ómasímini anosa militake agulizá Izesú ave liki milamó. Ámina agulizá nene Maliá izegipa agatupagi minonamigo ageló nenémo goí oko lo amitó nene milamó.

Monó zavusavegú Izesunima Ómasímini gipa minative liki anosa militamó

²² Gípala getakumú agupe ali lamaná itave loko Mosé lo hukoko li netá aliki lilí itái gamena alitokago, Zoseheko Maliako keza gipa Izesuni nene Zelusalega alímiki itesike, Guivahani Ómasímini gipa minative liki anosa militasimó. ²³ Lá asimó nene Guivahanímo láa loko lo hutokago mina gakó nene gili alesike lá asimó:

Ganá gipa utó noiko, Guivahanímini gipa minative liki lehizitalo.

²⁴ Itó

Nama luhusihe nama gelehová ahe lositá aliki viki není guguni gizi nimilo

loko Guivahanímo lo huta gakó nene gili alesike namagi aliki vasimó.

²⁵ Lá ikasigo, Zelusalega ve makó minamó, agulizá Simeó. Eza nene hee hee loko monolagi ve minake, Isilae vejenáma miluma giliki minakutí gologí oketati vemú ageva oko minoaká imó. Aí agikagú nene Ómasímini Sikalahulímo lemeko vaí oko minake, ²⁶gakó láa loko lo amimó:

Geza helemoko hanuva noako Guivahanímo gologí oleketative loko lo mololeketa vema ániganogo ane. ²⁷Itó Simeó nene Sikalahulímo alémo vávani okago monó zavusavegú itimó. Lá imó nene Maliako Zoseheko keza Ómasímo lo hukoko li gakotó aliki lilí itatave liki gipa Izesunima alímiki itesigo, ²⁸Simeó nene gipa Izesunima zanava oko geheneike Ómasi agepoka like láa loko limó:

²⁹⁻³⁰ Guivahanínemaka, imane lugutó viziti vema itínasa nene nogómula gihilatunú ánigokuve. Gakó lo molonetanimó nene gihila mota zekaze, nenemú geí gelekelé ve neza monokú nelémo molako hulu

ⁿ 2:21 Luk 1:31 ^o 2:22 Liv 12:6-8 ^p 2:23 Gá 13:2, 12

nivisiko hilitove. ³¹Geza numutó namató vegeñalite áñigatave loko lelémo lamaná iti ve imane alémo utó okane. ³²^qNenémo hetoka vegeñalitini kigika hize hanatokimikiko monó gilinigave. Itó Isilae vegeñalitini lugulizá ale otinogo ive.

³³Loko gipa Izesukumú lokago, izolahiko amelahiko gilikasike sigaga lasimó. ³⁴Lá ikasigo, Simeó eza lusa getake izolahini Malianima láa loko lo amimó: Gelenape. Imane gipaloka Isilae vegeñá hizi hóu litave loko lonoimóma neve. Ámina gipámini gakotó nene vegeñá lugáa keza lisiki gululú viziki akatave. Itó lugáa keza lisi gikitiiki otitave. Eza anosavagi noitimó nenazo, ve mukilite alivi letivi itatave. ³⁵Itó napiliko geza gipakamú miluma geleko gigika hizinogo ive. Nene suni utó noiko, vegeñá mukilitini kigikagú gakóini utó inogo ive.

³⁶Loko lokago, Ómasímini agepagutí gakó loaká vená makó minamó, agulizá Haná. Áisi Panueleni mohola Aseloni mulusigutí minatímo veló voko minake kilisimasi 7 ale ahulokago, vana helekago, ³⁷gevoná vená loló oko minomo noitike kilisimasi 84 ale ahulake gelehosi molamó. Áisi nene monó zagusave ahulamike gamena gamena únaká neteká Ómasi geké lotoko minake, nosánetá moseko minake, Ómasiloka loaká imó. ³⁸Eza nene ámina gamenaló anitike Ómasi agepoka like, Zelusale numutoka Ómasímo gologí oketati gamenamú ageva iki mina vegeñá nene gipa Izesukumú aveté oko lo kimimó.

Nasalete numutoka atiginá iki vamó

³⁹^rLá okago, Maliako Zoseheko keza Guivahanímo lo huka gacolímini hozaváa ali asú ikasike, Galilaia mikasiuka keí numutoka Nasalete neneloka atiginá iki vasimó. ⁴⁰Neneloka viki niasigo gipa Izesuni nene Ómasímo gizapa otake hize lé omikago, napa ike alévolé oko minake gakó mukí gilimó.

Gipa Izesú monó zagusaveú minamó

⁴¹^sAvóikini asenini zeketakumú gili mina holisi zupa meleketó meleketó nene Maliako Zoseheko keza Zelusalega itiaká asimó. ⁴²Lá iki niasigo, gipa Izesú nene kilisimasi 12 ale ahulokago ámina holisi makó alitokago goí iki aliaká asimó nenéminiki gipa Izesuni alímiki Zelusalega makó itemó. ⁴³Itiki niago, holisima asú noigo nene, keza nene gipa Izesuni nene Zelusalega taiza imikasigo, noigo, Maliako Zoseheko taiza itasikumú gelemasike atiginá iki lemesimó. ⁴⁴Vegeñá lugáaloka gímizeko vo noitihe liki gilikasike, gapoloka nivasigo límugusi zekago, keí zuhagi itó kigivéike niakú vitagá asimó nene, ⁴⁵noamigo, Zelusalega atiginá iki itesimó. ⁴⁶Itiki vitagá iva iva iki niasigo, gamena losive

^q 2:32 Isa 42:6; 49:6; 52:10 ^r 2:39 Mat 2:23 ^s 2:41 Gá 12:1-27; Gapo 16:1-8

makole oko vokago, Izesú nene monó zavusave napagú noike monó gakó lainim-ikimiaká vetini holúikú minake gakóini gilike itó mogonamú loká oketoko noigo ánigasimó. ⁴⁷Itó monó ve nenete gipa Izesú gakó gilikumú itó loká atoka ale viligoko lo kimikumú sigaga litamó. ⁴⁸Lá oko holúikú noigo alími utó ikasike, ininá goha asike izolaho láa loko lo amimó: Gipáne geza nanamú taiza oletane. Gelenape. Amekahiki leza geikumú mulute ze hoú loko mohona oko vitagá onousive. ⁴⁹Loko lo amekago, Izesú láa loko lo kimimó: Nanamú vitagá asimó neve. Neza aménehini numukú aleko minozo loko loneta hozamagú nouve. Nene gakó gelemasike nilasihe. ⁵⁰Loko limóza, keza nenémini mogonáa gili vevesamasimó.

⁵¹Lá ikasigo, izolahiko amelahiko alímiliki vake Nasalete numutoka vasigo eza gelekelé oketoko minamó. Itó izolaho nene gili gakó mukí ale agikagú moloko minamó. ⁵²^t Noigo, Izesú nene agikagi agupegi napa oko alévolé igo minamó. Lá okago niago, Ómasigi mukí vegegakí Izesukumú keza ánihi kumu hiliki minamó.

Zoní monó gakó lo kimimó

(*Mat 3:1-12; Mak 1:1-8; Zon 1:19-28*)

3 ¹Tipelió eza Loma vegegalitini kugulizaki ve napa-napa loló oko noigo, kilisimasi 15 oko vokago, Potiasí Pilató eza Zutaia mikasiuka kiapé napa loló oko noigo, itó agunala Pilipó nene Itulaia itó Talakoniti mikasiuka kiapé loló oko noigo, itó Lisaniá nene Apilene mikasiuka kiapé loló oko noigo, ²itó guguni giziaká ve napatini gizapa ve lositá Anasiko Kaiapako niasigo, ve nenéminiki gizapa ve lilí iki niago, gamena nene zupa Zakaliani gipala Zoní nene mikasi gomopalaló noigo, Ómasímó hoza gakó lotamó. ³Lá okago, Zota nagamí vola helega ima helega mohona mohona ike, vegegalá kigika ali viligiiki monó nagamí hilikiko Ómasímó lihimáini ahuloketative loko lo utó oko lo kemeko minamó. ⁴^u Lá noigo, Ómasímíni agepagutí gakó loaká ve Isaiáma epoapo gakó láa loko gizamó nene Zonitoka alévolé imó:

Mikasi gomopalaló ve makolímó gakó napagutí láa loko nolive:

Guivahanímíni gapova likigikagú vilitalo. Aí gapo ali hee litalo.

⁵Gímuza lemeneitimó nene apiziki alími lamaná ilo. Agoka iteneitimoláa alími lasava zilo. Zová zeneitimoláa alími pehe lalo. Gapoló mikasi itesú lemesú itimó nene apiziki alími geleni lilí ilo.

⁶Lá ikiko, mikasigú vegegalá mukí keza Ómasímíni kugutó vizeaká netá ániganigave.

⁷^v Lá noigo vegegalá mukilite Zoní noitoka vake monó nagamikumú likago, eza láa loko lo keme keme oko minoaká imó: Lekeza gosihalímíni agapilamó

^t 2:52 ¹ Sam 2:26; Ano 3:4 ^u 3:4 Isa 40:3-5 ^v 3:7 Mat 12:34; 23:33

zuha neneta, golesa mognatinímini lihimala anitinogo noimó nene lekeza likigika ali viligamiki hanuva golisi itune liki niahe. ^{8w} Lekeza likigika ali viligiiki nenémini gihila ali utó ilo. Neza lo likimitoze, gililo. Avalahani agapilamó zuha keza sonohikitana nene gatamoakalímini lilí itave loko lo molota gako alévolé itive loko lekelisi negopa, Ómasi nenémo gako litove loko nene lokiko gehani imanete Avalahani agapilamó zuha lilí inigi nene hanuva lilí itamó nenazo, lekeza lukugupetini aliki itiki Avalahani agapilamó zuhama nouninazo, Ómasi eza lihimatemú goní oletaminogo ive liki lamilo. ^{9x} Luni leko makó nene za mognagú gamuni oake noimóma neve. Nenemú gihila lamaná ali utó inamitamoláa nene asahizeko lokú gizanogo ive.

¹⁰Loko lo kemekago, mukí alegesá iki mina vegealite loká itake leza nana itune. ¹¹Liki likago, láa loko lo kimimó: Ve makó nenémo sioti losi alemnokoma agivelahini sioti nomiti ve nene magáa amino. Itó nosánetaki nene áminámini ilo. ^{12y} Loko lokago, takisi aliaká vete monó nagamí hilanigi aniteke loká itake monó velemaka, leza nana itunimó neve. ¹³Liki likago, eza láa loko lo kimimó: Takisi moni gamanímó alilo loko molató nene aviligiki alimi itiki alemilo. ¹⁴Loko lokago, pilisí ve nene ake loká itake leza nene nana itunimó neve liki likago, eza láa loko lo kimimó: Lekeza vegealite moni limitave liki kipiliki kilími golesa amiki hakupá gako likitamilo. Itó ikató hozalotí moni aliaká niamó nenemú goselé lekepelemino, loko limó.

¹⁵Vegená mukí keza Ómasímó gologí oketative loko lo moloketa ve atikumú gihuhú niki ageva iki minake, Zonikumú nene ámina vema noihe liki kagata losi gelemó. ¹⁶Lá ikago, Zoní nene vegená mukí láa loko lo kimimó: Neza nene nagamikó hololikimiaká nouve. Není nemegealoka noa vémini zamuza nenémo není zamuza nivilegekave. Neza ánéama nounazo, aí gasa gó ate akisitomó nene etaminogo ive. Áisi nene Ómasímini Sikalahuki likigikámini pipizá netá loko loaká loki hololeketanogo ive. ¹⁷Eza nene lolopa giteaká netaki aleko oko laisi nene gesopá zeko lolopa giteko ale lamaná inogo ive. Nosánetá lamaná nene gizaká oko ale numunagú molokiko minanogo ive. Lolopaváa nene giteko lokú gizokiko lova lova oko minanogo ive, loko limó.

¹⁸Zoní eza lá oko vegená kagata alike ámina gakoki gako lugáagi lo kimike Ómasímini gako lamaná lo kemeko minamó. ^{19z} Lá imóza, agulizaki ve Heloté nene uvolahini venala Helotiasini ipá oko aleake netá golesa lugáa alekago, Zoní nenemú gahá amekago, Heloté nenemú gele golesa oake, ²⁰miní amike netá golesa goha alike Zonini nene nagá numukú ahulotamó.

Izesú monó nagamí holamó (Mat 3:13-17; Mak 1:9-11)

²¹Zonini nene nagá numukú velesá ahulotamigo vegená mukí monó nagamí holokimikago, Izesú ámináminoko Zonitoka voko monó nagamí

^w 3:8 Zon 8:33 ^x 3:9 Mat 7:19 ^y 3:12 Luk 7:29 ^z 3:19 Mat 14:3-4; Mak 6:17-18

holamó. Holoake, Ómasiloka noligo, okulumá koló okago, ^{22 a} Ómasímini Sikalahú nene nama luhusi agupegi loló oake Izesuni amupiló lemeko minamó. Noigo, okulumakutí gako makó láa loko utó imó: Gipáne gihila noane. Geí ángo lamaná okuve, loko limó.

Izesuni avolage

(Mat 1:1-17)

²³Izesú nene kilisimasiva 30 nenéminoko oko novigo monó hoza apí oko alimó. Naligo, vegená nenete Zoseheni gipala nehe liki gelemó. Zosehé nene Helini gipala, ²⁴eza nene Matatani gipala, eza nene Livaini gipala, eza nene Melikini gipala, eza nene Zanaini gipala, eza nene Zoseheni gipala, ²⁵eza nene Matatiani gipala, eza nene Amosini gipala, eza nene Nahumini gipala, eza nene Eselini gipala, eza nene Nagaini gipala, ²⁶eza nene Malatani gipala, eza nene Matatiani gipala, eza nene Semeinini gipala, eza nene Zosekeni gipala, eza nene Zotani gipala, ²⁷eza nene Zoanani gipala, eza nene Lesani gipala, eza nene Zelupapeleni gipala, eza nene Sealitieleni gipala, eza nene Nelini gipala, ²⁸eza nene Melikini gipala, eza nene Atini gipala, eza nene Kosamini gipala, eza nene Alimatamani gipala, eza nene Eleni gipala, ²⁹eza nene Zosuani gipala, eza nene Eliezeleni gipala, eza nene Zolimini gipala, eza nene Matatani gipala, eza nene Livaini gipala, ³⁰eza nene Simeoni gipala, eza nene Zutani gipala, eza nene Zoseheni gipala, eza nene Zonamani gipala, eza nene Eliakímini gipala, ³¹eza nene Meleani gipala, eza nene Menani gipala, eza nene Matatani gipala, eza nene Natanani gipala, eza nene agulizaki ve napa Tevitini gipala, ³²eza nene Zesini gipala, eza nene Opeteni gipala, eza nene Poasini gipala, eza nene Salani gipala, eza nene Nasonani gipala, ³³eza nene Aminatapani gipala, eza nene Ataminoni gipala, eza nene Alanini gipala, eza nene Hezelonani gipala, eza nene Pelezeni gipala, eza nene Zutani gipala, ³⁴eza nene Zakoponi gipala, eza nene Isakani gipala, eza nene Avalahani gipala, eza nene Telani gipala, eza nene Naholeni gipala, ³⁵eza nene Seluguni gipala, eza nene Lagauni gipala, eza nene Pelegeni gipala, eza nene Epeleni gipala, eza nene Selani gipala, ³⁶eza nene Kenani gipala, eza nene Alapasatani gipala, eza nene Semeni gipala, eza nene Noani gipala, eza nene Lamekeni gipala, ³⁷eza nene Metusalani gipala, eza nene Enokuni gipala, eza nene Zaleteni gipala, eza nene Mahalaleni gipala, eza nene Kenani gipala, ³⁸eza nene Enosini gipala, eza nene Seteni gipala, eza nene Atani gipala, Atá nene Ómasilokatí.

Satá Izesuni gimivagú molamó

(Mat 4:1-11; Mak 1:12-13)

4 ¹Izesú nene Ómasímini Sikalahulímo agikagú leme vaí oake alémo zaú okago, Zota nagamí ahuloake mikasi gomopalaló vimó.

^a 3:22 Age 2:7; Mat 17:5; Luk 9:35

²Neneloka gamena ve lositosini kigisa kigizani asú igo akoko noike, nosáneta namike alika gaúna heleko minamó. Lá noigo, Satá nene oko gimivagú molake ³láa loko lo amimó: Geza Ómasímini gipala noitanimó nene, geza lokako gehani imanémo nosáneta loló okiko noko minamane. ⁴^b Loko lokago, Izesú láa loko lo amimó: Óe, monó gotolaú luhuva láa liki gizinamóma neve:

Vegená neneta nosánetakó nokoko lamaná oko minoakaláa nene nomive.

⁵Loko lokago, Satá agoka hána makokú alémoko itike numutó namató kugulizaki ve mukilitini apáini litá oko alapize asú oake, ⁶láa loko lo amimó: Amuza miliki niago kugulizá novi netaki mikasigú netá lamanaláa nenegi imane geikó geme asú itove. Ámina netá nene není nigizakú molo asú onoinazo, makope makope amitove loko hanuva amitomóma neve. ⁷Nenemú geza není nigisauka gupá zeko negepoka lokako geikó loló o asú itive. ⁸^c Loko lokago, Izesú láa loko lo amimó: Óe, gakó makó monó gotolaú láa liki gizinamóma neve:

Guivahani Ómasigó lalapusa hizeko gupá ze ameko agepoka loakaláa neve, itó aikó gelekelé omiakaláa neve.

⁹Loko lokago Satá nene Izesuni alémoko Zelusalega vike monó zavusave napámini agoka hánaló alémoko itike láa loko lo amimó: Geza Ómasímini gipala noitanimó nene, imanelotí olío ká omanegú molozo.

¹⁰^d Gakó makó monó gotolaú láa liki luhuva gizinamóma neve:

Geikumú Ómasímo aí ageló nene hoza gakó lo kemekiko gizapa iki gilími vatí inigave.

¹¹^e Itó makó láa loko neve:

Gehanímo gigisagú hizekative liki keza limiki kigizani lukilagú gilími milanigave.

Liki luhuva gizinamóma nenazo, golesa aminogo ane. Loko lokago, Izesú láa loko lo amimó: ¹²^f Óe, monokú gakó makó láa loko neve:

Guivahani Ómasi nene gopa netakumú gimivagú molamitane.

¹³Loko lokago Satá nene lá oká lá oká ike agoka vize asú oake, ahuloko gamena makó zupave loake ahulomiake vimó.

Izesú Galilaia mikasiuka monó hoza apí oko alimó
(*Mat 4:12-17; Mak 1:14-15*)

¹⁴Izesú nene Sikalahulímo hize lé otake zámuza amekago, Galilaia mikasiuka atiginá oko vimó. Atiginá oko okago, aí gakoláa helega helega vo asú igo gelemó. ¹⁵Neneloka monó numuni minakú minakú nene iteko lemeko oko monó lo kemekago, vegená mukilite laga kivisekago geké litamó.

^b 4:4 Gapo 8:3 ^c 4:8 Gapo 6:13 ^d 4:10 Age 91:11 ^e 4:11 Age 91:12 ^f 4:12 Gapo 6:16

Nasalete numutoka Izesuni ánígi ahulamó
(*Mat 13:53-58; Mak 6:1-6*)

¹⁶Lá ikago, Izesú ezáa napa i apá Nasalete numutoka nene áminámini oko vo anitike, holisi alitokago, monó numukú itimó. Eza holisi mina zupa zupa ámináminoko iteaká imó. Iteko monó gatoko lo kiminogo noitigo, ¹⁷Ómasímini agepagutí gakó loaká ve Isaiá giza pepama amikago, ataloko áníhoake gakó makó láa loko minamó nene ale utó ike gato kimimó:

¹⁸ § Guivahanímini Sikalahulímo nenitoka holonetake, hoza gakó láa loko lonetamóma neve. Minimi limiki nia vejená nene gakó lamanáma lo kemezo. Kalapusi numukú nia vejená gologí oleketatove loko, itó kogómula lika vejená nene ale goloutoleketatove loko, itó muhelé ahelé iki minata vejená nene gologí oleketoko lekelémo molatove loko lo kemezo.

¹⁹Guivahanímo lekelémo lamaná iti gamena alitokave loko lo kemezo.

²⁰Loko Izesú nene gatoko lo kemeake, pepama gakeko gelekelé vema goha ameake mitó minamó. Noigo, monó numukú mina vejená keza mukitoka aí gonú apiliki niago, ²¹gakó láa loko lo kimimó: Monó gotola gakó gatokugo gelemómámini gihila itínasa nenitoka utó okave. ²²Loko lokago, keza giní i amiake, aí agepagutí gakó gilikago laga kivisimó. Lá okago, keza sigaga lake lamó: Eza nene hanuva ánígonouhá ve Zosehene gipala nenazo, nenémini gakó nana oake nolive. ²³Liki likago, eza láa loko lo kimimó: Anozá gakó makó láa liki liaká niave: Lusa ve gezaka haitó vejená kelémo vatí ani netá aleko gezaka vejenaka zuha kelémo lamaná amane. Neza nagata gulumó lekeza ámina anoza gakó vasá zeke li nimiiki, Kapanao numutoka hoza aleko gakoláa gulunimómáminoko imane gotó numukaloka alekako ánígatune liki li nimitaze. ²⁴^h Loko loake, miní ameko láa loko limó: Neza lamaná lo likimitoze, gililo. Ómasímini agepagutí gakó loaká vémo ezáa gotó apalaloka voko monó lo kemekago eza lelí gipate noive liki gakola gilísá amave. ²⁵ⁱ Nene sunimú gakó lamaná lo likimitove. Ilaizá eza monó hoza ali gamena nene okulumá gapo lí okago minake melekeni losive makolegi ikani 6-ía oko novigo golini zemimó. Golini zemigo gaúna gamena napa nene mukí apatoka utó imó. Ámina gamenaló nene Isilae mikasiuka gevoná vená mukí minamóza, ²⁶^j Ómasímo Ilaizani nene ámina vená keitoka kelémo vatí itive loko amiselemive. Sitona mikasiuka Salepata apatoka Zuta vená negopa hetoka gevoná vená makó noitoka alémo vatí itive loko amisilimó. ²⁷^k Itó Ómasímini agepagutí gakó loaká ve Elisá hoza ali gamena nene

§ 4:18 Isa 61:1-2 ^h 4:24 Zon 4:44 ⁱ 4:25 1 Kug 17:1 ^j 4:26 1 Kug 17:8-16

^k 4:27 2 Kug 5:1-14

Isilae mikasiuka halamé gizale ve mukí minamóza, Elisá keikutí kelémo zokamike Silia mikasiuka hetoka ve makó Nemanigó alémo zokamó.
²⁸Loko lo kemekago, ámina gako giliake, Ómasímo lezagi ahuloletati gako lokave liki giliake monó numukú mina vejená keza mulúikú golesa giliake, kizapaló goha molokago, ²⁹zaú iki otiake númaseloka Izesuni alímiki vake ámina apá mina agoka lusenaló agataloka ahelú i ahulanigi alímiki iteha, ³⁰áisi nene ahulokimiake holúikutí hanuva vimó.

Holosi golesa agikagú mina ve
(Mak 1:21-28)

³¹Lá oake Izesú nene Galilaia mikasiuka lemeake, Kapanao numutoka anitike holisigú holisigú nene monó lo kemeko minamó. ³²¹ Lá noigo, monó gakola gale geheko lo kemeaká imó nenazo, nenemú keza ininá iki sigaga litamó. ³³Lá niago, keí monó numukú nene ve makó minamó nene holosi makolímó agikagú minake alémo gopa okago minamó nenémo gamoga geko láa loko limó: ³⁴Eé, Nasalete ve Izesuvo, nana netá golesa aleletanogo noane. Lelémo golesa inogo noape. Geí nene ánigo hehe noluve. Geza Ómasilokatí etó keké vizeko noani vema noane. ³⁵Loko lokago, Izesú gahá amike gegepa apizeoko legesó oko agikagutí lemeko vmane. Loko lokago, holosi nenémo vejená holúikú ámina vema nene ahelú okago puu loko akamóza, alémo golesa amike ahulomiake vimó. ³⁶Lá okago keza vejená mukitoka ininá ake ligili hagili ake láa liki lamó: Nana ive. Monola nene haitolímuni neve. Áisi gakola gale geheko aí amuzatunú lokimiaká noigo holosi golesate ahulikimiaká niave. ³⁷Liki likago, Izesunimú gako nene ámina apá helega helega puu loko vo asú imó.

Izesú Pitani venalámuni izolahini alémo zokamó
(Mat 8:14-15; Mak 1:29-31)

³⁸Lá okago, Izesú nene monó numukutíma lemeake Saimoni numukú itimó. Neneló Saimoni venalámuni izolahini agupegú ló napa lo minokago, alémo zokative liki li amemó. ³⁹Li amikago, áisi voko alitó oteneike agupegú ló la netáma nene gahá amekago agupegú ló la netáma asú otamó. Asú omikago, ámina venalímó litá oko oteake Izesugini nasahilí oketamó.

Izesú únaká vejená mukí kelémo zokamó
(Mat 8:16-17; Mak 1:32-34)

⁴⁰Únaká ho nolimigo, haitopaitó netá kivisi vejená kilímiki Izesú noitoka ikago, agizanitunú kugupeló ale geleko kelémo zokamó. ⁴¹Itó

¹ 4:32 Mat 7:28-29

vegenalitini kigikagú holosi golesa minamó nene kepeleko nokimisiligo, gopaga lake geza Ómasímini gipala noane. Liake ahulikimiake vamó. Nivago, keza Izesukumú Ómasímo gologí oletative loko lo mololeta vema noive liki gelemó nenazo, Izesú nene gahá nokimike aí mogona lili ali amitave loko lo hukoketamó.

Izesú monó lo keme keme oko mohona oko vimó

(Mak 1:35-39)

⁴²Neteká ho noitigo, Izesú eza numuni apakutí lemeake voko mikasi amegesa vizitoka minoko numuna linogo voko minamó. Noigo, vejená keza aikumú vitagá iki iki alími utó iake, ahuloketamitive liki lamóza, ⁴³eza láa loko lo kimike limó: Neza nene apá lugaloka mohona oko Ómasímini gasovaló minoakalímini gakó lamaná lo keme keme inogo uve. Ámina hoza alitane loko Ómasímo nimiseleneimóma neve. ⁴⁴Loko loake, vike Zutaia mikasiuka monó numuni minakú minakú iteko monó lo keme keme oko mohona imó.

Izesú litó lagaha mukí alemó

(Mat 4:18-22; Mak 1:16-20)

5 ^{1m} Gamena makó zupa Izesú eza Genesalete nonohuló agataloka noigo, vejená keza Ómasímini gakó gilitune liki ali nupa iake aitoka sii sii liki minikago, ²lagaha aliaká ve makó nene nagamikú lapéinigutí limiake, lagaha gotaháinima nagamí nizego, itó sipi lositá nene nagamikú ha nego, ³Izesú nene ángoake magáa Saimoni nagamikú lape minakú iteake, nagamí getatokatí hilulú oloko koma vitane loko loká imó. Gele amekago sipigú minake mukí ali nupa a vejenáma monó lo kimimó. ⁴Lo keme asú oake Saimoni láa loko lo amimó: Hilulú oloko voko nagamí ohunágú molo-minoko nene gigivekagegi lagaha alinigi niaze, gotahalini nene ohunagú ahulalo. ⁵ⁿ Loko lokago, Saimon Pitá nene anotó aleko láa loko lo amimó: Gizapa velemaka, leza itína holugúnaka gotaha ova ova oko minuháza, lagaha hamolagi ma alemune. Lá unimóza, geza lanimómave loko nene lagaha gotaha nene goha nagamí ohukú ahulatune. ⁶Loko lo ameake, aliki viki gotahama ahulake lagaha mukí nalego, lagaha gotaháini nene zeko hukanogo noigo, ⁷kigive lugáa sipi makokú minamoláama iki kilími vatí itave liki kigizani gumí zi kimiki sele lamó. Lá ikago, keza ake sipi lositámagú lagaha ali nimilago, lagaha vaí oake nagamikú lapema nene nagamikú liminogo imó. ⁸⁻⁹Lá noigo, Saimon Pitaki makó mina vejenaki keza lagaha mukí alekumú ángiake sigaga lamó nenazo, Pitá eza Izesuni agisauka gupá zeko lo amike Guivahanínemaka, neza lihimánegi ve nounazo, ahulonimioko

^m 5:1 Mat 13:1-2; Mak 3:9-10; 4:1 ⁿ 5:5-10 Zon 21:3-8

vozo. ¹⁰Loko noligo Zepetaioni gipala losi Zemusiko Zoniko keza Saimoni agivelahiko nenetosa ámináminiki sigaga lasimó. Sigaga nilasigo, Izesú nene Saimoni láa loko lo amimó: Geza gehelele vizemino. Itína imanémimi veletó nene geza monó hoza aleloko novako mukí vejená nene není zuha lilí itave. ¹¹Loko lokago, nagamikutí lapéinima aliliki getatoka vake nene, mukí netá matáini ahuliake Izesuni ámegetiki vamó.

Izesú lokago halamé gizali ve gililimó

(*Mat 8:1-4; Mak 1:40-45*)

¹²Izesú nene apá napa makotoka voko noigo, halamé agupeló vaí oko gizali ve makó noike, Izesuni áníhoake vike agisauka gupá ze ameake negénegeka like láa loko limó: Guivahanínemaka geza nene nelémo gililitove loko nene hanuva nelémo gililitanimó nenazo, nelémo gililitane loko noluve. ¹³Loko lokago, Izesú nene agizani lutoko agupeló ale nogilike gililitane loko gelekuze, gilelezo. Loko lokago, litá oko gililimó. ¹⁴° Lá okago, ámina gakó nene aveté oko vejená aveté oko lo kememitive loko lo hukomiake láa loko limó: Aló gilelekane liki gili hee litave loko geza nene voko guguni gizoaká vémitokama gugupe alapizekako ánígative. Itó gilelenikumú nene Mosé loleketa netá aleko Ómasi guguni gizo amitive loko amekako eza vejená mukí lo kemekiko nenémimi mogona gili vevesatave. ¹⁵Loko limóza, aí gakoláa nene puu loko vokago, mukí vejenalite gili asú iake Izesuni gakó gilitune liki itó kivisi netakutí kelémo zokative liki Izesú noitoka alegesá iaká amóza, ¹⁶eza mikasi gomopalaló voko minake Ómasiloka linogo voaká imó.

Izesú ve gepili alémo zokamó

(*Mat 9:1-18; Mak 2:1-12*)

¹⁷Gamena makó zupa Izesú eza monó gakó lainim-oketoko noigo Palisaio monó vejenaki monó mogona apí ikimiaká vegi keza Galilaia apatotí itó Zelusalegatí itó Zutaia apá makotokatí nene mukí numutotí iki neneló ali nupa amó. Lá niago Izesú nene kivisi vejená kelémo zokati zámuzagi minató minamó. ¹⁸Lá noigo ukoakoló zaló mililiki a ve gepili makó nene alímiki iake Izesuni agisauka ahulitanigi niago, ¹⁹vejená mukí gikí iake gapo hizi lí ikago, alímiki numupitó itiake ali koló iake, ukoakogi nagá ziake ahulikago vejenalitini holúikú limike Izesuni avogisaloka lemekago, ²⁰Izesú nene áníhoake gili alévolé amó nenémimi mogonáa ánígoko geleake, ve gepilima láa loko lo amimó: Vémage, lihimaka ahulogimikuve. ²¹Loko lokago monó mogona apí-ikimiaká vegi Palisaio monó vegi keza kagata gululusi giliake kezáitoka láa liki ligili hagili amó: Makó éaho lihima gilatoaká noive. Ómasímo hamokó lá oaká

° 5:14 Liv 14:1-32

noinazo, ezáa agupevamú giligo itekago, Ómasi aviliginogo limó nene etamive. ²²Liki kigikatunú nigelego, Izesú nene Zuta vegealite lihimate ahulolimiaká itó vegeaná kelémo zokoaká nene Ómasímogó loló oaká netá neve liki gilinave loko geleake láa loko lo kimimó: Lekeza likigikauka nanamú láa liki nigeleve. ²³Ve makolímo Ómasi noamitimó nene lihimaka gilatogimikuve loko vávani oko lamitimóza, kelémo zokoaká zámuzagi ve noamitimó nene gakó lokiko gihila zemitihe loko ve gepili makó nene oteoko vozo loko litá oko lo ameminogo ive. ²⁴Lá onoimóza, okulumakutí lumu ve gihila neza mikasigú lihima gilatoaká zámuzagó negopa, lihimatini ale ahulolikimiaká zámuzá nenitoka neve. Loko loake nenémini mogonáa gili hee hee litave loko ve gepilima lo amike nene láa loko nologetuve: Otekoko ukoakoka gehéko numukaloka vozo. ²⁵Loko lokago, mukí vegealitiní kogómulaló nene litá oko oteake ukoakova ale gehéko numunaloka vike Ómasímini agulizá ale oteko minamó. ²⁶Lá noigo, vegeaná mukilite sigaga liake Ómasi agepoka lake mulúini otopá nozigo itfnasa haitolímíni suni ániogokune, liki lamó.

Izesú Livaini sele lo amimó

(Mat 9:9-13; Mak 2:13-17)

²⁷Alika Izesú lemeake novike takisi aleaká ve makó agulizá Livaí áisi nene hoza aleaká numunauka noigo ániogoke geza nene némegetoko ano. ²⁸Loko sele lo amekago Livaí nene netá mukí ahuloake ámegetoko vimó.

²⁹Makó vasike Livaini numukú nosánetá napa Izesuni vatá omikago, takisi aliaká vegi ve makoki keza mukitó namó. ³⁰^p Ninago, Palisaio monó vegi monó mogona apí-ikimiaká vegi keza Izesuni izegipala zuhamú gili golesa niake láa liki li kememó: Lekeza nene takisi aliaká vegi netá golesa aliaká vegeaná makoki nanamú makó miniki nosánetá ninave. ³¹Liki likago, Izesú geleake láa loko lo kimimó: Hanuva lamaná iki mina vegealite lusa vemú sele lisá amave. Kivisi vegealitegó lusa vemú sele liaká niave. ³²Neza hee loko nune liki liaká nia vegeaná kelémo otopá zitove loko lememumóma neve. Neza lihimáinigi vegeaná kigika alí viligatave loko kelémo otopá zinogo lumumóma nena, loko limó.

Nosánetá mosiakakumú loká itamó

(Mat 9:14-17; Mak 2:18-22)

³³Lá okago, keza láa liki li amemó: Zonini izegipala zuha keza gamena mukí monokumule liki nosánetá mosé mosé iki Ómasiloka liaká niave. Itó Palisaio monó vetini izegipáini zuha keza ámina suni aliaká niamóza, geí izegipaka zuha keza nosánetá gopa aliki niaká niamó nene

nanamú niave. ³⁴Liki likago, Izesú anoza gakó láa loko lo kimimó: Vená ali amita ve ezagi agivelagegi apiziki niminiko ve makolímo nosánetá moseketatimó nehe. Lá aminogo ive. ³⁵Gala vete vená ali amita vema kigizakutí ipá ita gamena alitokiko, nene zupa miluma nigiliki nosánetá mosinigave. Ámináminiki izegipáne zuhate alika nenikumú miluma giliki mosé mosé inigave. Itína lá oko nomive.

³⁶Loko loake, miní ameko anoza gakó makó láa loko lo kimimó: Lavolavo gó nene litaha looko hukokiko nene, gosohá gó makó hukiiki litaha gotó molo apizeko akotoakaláa nomive. Nagamí zikiko gikí okiko lavolavo gó gosohá hukokiko gosohá lavolavo gó nenémo litaha lavolavo gotó haitolíminoko minanogo ive. ³⁷Itó vain nagamí nene gituhú galakalá noigo nene nagamí getununi lithagú ligi milisá amave. Vain nagamí nenémo gituhú galakalá nooko giputooko litaha getununi zeko ategekiko vain nagamiki nagamí getununigi latila okatinazo, ³⁸vain nagamí gituhú galakalá noimó nene goni getununi gosohakukó leke moloaká nune. ³⁹Itó ve makolímohe makolímohe vain nagamí lithagú noaká noike, áminamú laga avisekago gosohá vain nagamí natove loko gelesá amive. Litaha vain nagamí nene vatí oko neve loko loaká noive. Loko limó nene litaha monó sunímini amupiló nene ezáa gosohá monó molo apizesá nene etamive loko anoza gakó limó.

Holisigú Izesuni vegenala zuhate kilé hisiki nimi vamó

(*Mat 12:1-8; Mak 2:23-28*)

6 ^{1a} Holisi gamena makokú nene Izesú eza izegipala zuhagi kilé mikú mihina niake, izegipala zuhate kiléma akutiake gihiláa kigizanitunú hisiki nimi vamó. ²Lá niago, Palisaio monó ve lugáate ángiake gili golesa ake láa liki lamó: Holisi gamenagúma nenazo, hoza nalemó nene netá golesa lilí niave. Lá amoakalímini nene nanamú naleve. ^{3r} Liki likago, Ómasímo vegenala zuhate netakumú vitagá niko ezáa lo huka gakó nene hanuva molo gaheva itimó neve liki gilitave loko Izesú láa loko lo kimike limó: Gozapá agulizaki ve napa Tevitige vegenala zuhagi nosánetakumú gaúna hiliake netá makó alemó nene lekeza gakó gatinamóza, mogona gelemiki nilahe. ^{4s} Tevití eza Ómasímini monó numukú itekago guguni gizoaká ve napámo Ómasímini avogisaló mila peletima ameko ezagi makó mina vegená kimigo namóma neve. Ámina peleti nene hanuva vegenalite namitave liki guguni giziaká vetegó natave liki alévolé iki li hutinamóza ámina gamena nene hanuva vegenalite gopa namó neve. ⁵Loko loake, Izesú miní ameko láa loko lo kimimó: Okulumakutí lumu ve gihila neza holisi amelahina nounazo, izegipáne zuhate holisi gamenagú lilí ita netá nene není netale, loko limó.

^a 6:1 Gapo 23:25 ^r 6:3 1 Sam 21:1-6 ^s 6:4 Liv 24:9

Agizani nakeseta ve alémo lamaná imó
(*Mat 12:9-14; Mak 3:1-6*)

⁶Holisi makokú Izesú nene monó numukú iteko monó lainim-oketoko noigo, agizani zamagaloka nakeseta ve makó minamó. ⁷Noigo, monó mogona apí-ikimiaká vegi Palisaio monó vegi keza ámina vema alémo lamaná okikoma imane holisimagú nenazo, goní otatunize liake, gizapa iki minamó. ⁸Lá iki kagata gelemoláa nene Izesú ángoake, agizani nakeseta vema otekoko holutegú ote minozo loko lo amekago, eza oteake áminaló ote minamó. ⁹Lá oko oteneigo, Izesú láa loko lo kimimó: Netá makokumú loká oleketatoze. Holisigú nene netá lamaná alesatímo etatihe netá golesa alesatímo etative. Vegená kelémo lamaná osatímo nehe kepele helesatímo nene neve. ¹⁰Loko loake, vegená mukí gonú nokipilike agizani nakeseta ve nene gigizani lutozo loko lo amekago, agizani lutokago, goha lamaná imó. ¹¹Lá imóza, monó mogona apí-ikimiaká vegi Palisaio monó vegi keza kizapaló molokago Izesuni nana otatune liki ligili hagili amó.

Izesú izegipala 12 kelémo molamó
(*Mat 10:1-4; Mak 3:13-19*)

¹²Gamena nene zupa Izesú nene Ómasiloka linogo agokaú itimó. Itike Ómasiloka loko minova minova noigo gó lamó. ¹³Gó lokago, ho noitigo, izegipala zuhama sele lo kemekago, ikago, keikutí ve 12 kelémo etó oake, kugulizá nene aposolo veve loko molamó. ¹⁴Keza lá iki minamó: Kugulizá Saimon agulizá gosohá Pitá ave loko molamó, itó agunala Etulú, itó Zemusí, Zoní, Pilipó, Patolomaió, ¹⁵Mataió, Tomasí, Alapaioni gipala Zemusí, itó Saimoná eza Loma gamani amisele ahulanogo i ve, itó Zemusí makolímuni gipala Zutá, ¹⁶itó Kaliotó numutotí ve Zutá eza minomo noitike Izesuni amimika li ve neve.

Izesú vegená mukí nasahilí oketamó
(*Mat 4:23-25*)

¹⁷Izesú nene izegipala zuhagi limiake apá geleni makotó neneló viki niago, aí vegenala zuha makoki ve vená mukí Zelusalegatí itó Zutaia apá makotokatí itó age nagamí gahevaloka nene Tulo itó Sitona apatotí keza Izesuni gakó gilitune liki itó kivisi vegená kelémo zokative liki neneló alegesá iki minamó. ¹⁸Niago, holosi golesa kigikagú mina vegená nene kelémo lamaná imó. ¹⁹Itó Izesuni agupeló ali gilikago aí agupegutí zamuza nenémo netá kivisi vegená kelémo zoko asú imó nenazo, alegesá iki mina vegená mukilite ligizani lutoko agupeló ale gilitunitímó lelémo zokative liki gelemó.

Okulumakú mututoni itó meikú mututoni nenémini gakola
(*Mat 5:1-12*)

²⁰Lá ikago, Izesú nene izegipala zuhama gonukonú kepeleake láa loko limó: Lekeza gohogó vejená neneta, Ómasímini lapaná ali lá itamó nenazo, lokogoliza nivizemó geleaká noive.

²¹Lekeza netá lamanakumú likivisigo mina vejená neneta, netá lamanalímo likigikagú vaí itimó nenazo, lokogoliza nivizemó geleaká noive. Lekeza ive nama iki nimina vejená neneta, lekeza giza zohí itamó nenazo, lokogoliza nivizemó geleaká noive.

²²^t Okulumakutí lumu ve gihila nenikumule liki vejená makolite mukahá likipiliiki visililikimiiki lekelikumú alivi letivi iiki vejená golesave liki lukugulizatini ali ahulatamó nene, lokogoliza vizitave lokogó gelenouve. ²³^u Lá nilikitikoma likigisa ziki miniki lokogoliza viziki gozapá avóike keza Ómasímini agepagutí gakó liaká a ve ámina iki lilí ikimikago Ómasímo meinava napa kimimó nenazo, okulumakú meinavatini sipisi netimó neve liki gililo.

²⁴Lekeza henotiki vejená neneta, lekeza ehe tináneve. Lokogoliza viziki iki miliki amó mota asú okave.

²⁵Lekeza niki lakagatupa iki nia vejenalita, ehe tináneve. Alike gaúna hilinigave. Lekeza giza zohí iki nia vejená neneta, ehe tináneve. Alike lekeza miluma giliki ive inigave.

²⁶Lekeza vejená mukilite lukugulizá ali otiaká niamó neneta, ehe tináneve. Avóike ámináminiki soza monó lili ali vetini kugulizá ali otiaká amóma nemóza, Ómasímo ámináminoko keikumú giligo itemimóma neve.

Gala velini likigika kimilo
(*Mat 5:38-48*)

²⁷Lá onoimóza, není gakó nigele vejenáise gakó lo likimitoze, gililo. Lekeza gala velini nene likigika kimiiki nasahilí ikitalo. Vaika likamita vejená nene kilími lamaná ilo. ²⁸Lekelikumú alivi letivi nia vejená nene nónohá zikitalo. Gopoguni mililikitata vejenakumú numuna lilo. ²⁹Ve makolímo agizanitunú nene gagamipaló helegaloka zekikoma, helegaloka gipilitive loko velegepá ze amezo. Ve makolímo geí hepé goka ipá oko aleko novikoma, geí sioti aleko amanapa amo. Nenegi aleko vitize.

³⁰Itó ve makolímo geí netakumú voká litimó nene hanuva amezo. Itó ve makolímo geí netá aleko vitove lokikoma hanuva amekako aleko vokiko goha ale nimitive loko voká lamo. ³¹^v Lekeza vejená makolite némini manámini suni lilí ilitatave liki giliaká nia netá nene lilí ikitalo.

^t 6:22 1 Pit 4:14 ^u 6:23 2 Iki 36:16; Apo 7:52 ^v 6:31 Mat 7:12

³²Vegená golesate kigika limiaká nia vegená nene ligika kimitune liki liaká nianazo, ámináminiki kigika likimiaká nia vegenakó ligigika kimitamó nene, Ómasímo lekegepoka lamitive. Vegená golesate kezagi ámináminiki kigika limiaká nia vegená nene ligika kimitune liki liaká niave. ³³Lekeza netá lamaná lilí ilikimiaká nia vegenakó nene pekimi iki netá lamaná lilí ikitatamó nene, Ómasímo lekegepoka lamitive. Vegená golesate kezagi ámina suni aliaká niave. ³⁴Lekeza vegená makolite netá makó limitave liki giliiki netá makó kimitamó nene Ómasímo lekegepoka lamitive. Vegená golesate alika keza ámináminiki limitave liki ve golesa makó nene moni kimiaká niave. ³⁵Lá niamóza, lekelisi gala velini likigika kimiiki netá lamaná lilí ikitiki goha limitave liki gelemiki hagitana kimilo. Lá ikiko, alika nene meinavatini napa iteko neiko, lekeza okulumakuka Ómasímini izegipa lamaná minatave. Ómasi eza agepoka lama vegenaki vegená golesagi hanuva muluna moloketake lehizekimiaká noive. ³⁶Lekeza lá iki ametipo miluma gelelikimiaká noimómámini iki vegenakumú miluma gilikitalo.

Numuni lapusámini anoza gakola

(Mat 7:1-5)

³⁷Lekeza nene vegenalitini mogonataganamú lotuva legemilo. Lá niko Ómasímo lekelí mogonataganamú lotuva legemínogo ive. Lekeza vegenalitini lihimamú gakó li hukikitamilo. Lá niko Ómasímo lekelí lihimamú gakó lo hukoleketaminogo ive. Lekeza vegenalitini lihima ahulikitatamó nene, Ómasímo ámina oko lihimatini ahuloleketanogo ive. ³⁸Lekeza vegenalititoka iki miliki ita polosava nene Ómasímo ámináminoko lekelitoka oko moloko inogo ive. Ómasímo lamaná oko likigikagú lehizelikimioko mí zeko hilulú oko nogúeko goha gúitimó nene velemó zesá oko minanogo ive. Lekeza gona miliki kimiaká niamómámini avotigila oko Ómasímo ámináminoko gona moloko likiminogo ive.

³⁹^w Loko loake, miní ameko netá golesáinimú anoza gakó makó láa loko lo kimimó: Agómula lilikupá mola ve makolímó agómula mola ve makó nene gapo alapizitihe. Óe, lá oko nomive. Ve lilikupá losi nenetosa eza agizató aliko eza agizató aliko vitáimó nene lositáma galegú hlanigasive. ⁴⁰^x Itó sukulu izegipa makolímó litá oko tisala avilegemitive. Alika sukulu loloko voko gele asú okoko tisala nenéminoko minanogo ive. ⁴¹Geza gigivekahini agómulagú gilísá onoive loko lanimóza, gezaka gogómulagú za lana vonoimó nene nanamú ánigo lamaná amoko lane. ⁴²Gezaka gogómulagú za lana vonoimó ha nego ángiganimó nenazo, géisi nene nigivénega, gogómulagú gilísá vonoimó

^w 6:39 Mat 15:14 ^x 6:40 Mat 10:24-25; Zon 13:16

nene ale ahulogetatove loko nanamú nolane. Geza sozaló ve genezaka losi minamó neneka, gezaka gogómulagú za lana nemó nene goí oko ale ahulooko gogómulatunú ánigo vevesooko alika nene gígivekahini agómulagú gilisá onoimó nene ale ahulotatanimó nene etanogo ive.

Gihila golesa lamaná zeaká nenémini mogona

(Mat 7:17-20; 12:33-35)

⁴³Itó za lamaná makolímo gihila golesa zeminogo ive. Itó za golesa makolímo gihila lamaná zeminogo ive. ⁴⁴Za gihilamámo ámina zámíni lamaná imoláahe golesa imoláahe ale utó oaká noive. Hilipa nenémo gizasi apelekiko hukiki natahe. Itó gumené nenémo loisi apelekiko akutiki natahe. Lá oko nomive. ⁴⁵Ámináminoko ve lamanalitini kígikagú netá lamaná minatimó nenazo, kígikagutí vatí sunigó ititimó neve. Ámináminigó oko ve golesatini kígikagutí nene golesa sunigó ititimó neve. Ligikagú vaí o minakutí legepagutí loaká noune.

Numuni lukesavámini anoza gakola

(Mat 7:24-27)

⁴⁶Lekeza nenikumú Guivahaniteve Guivahaniteve liaká niamó neneta není gako nene nanamú ámegetisá amave. ⁴⁷Nenitoka iake není gako gili aliaká nia vegeanalitini mogonamú lo likimitoze. ⁴⁸Ve makolímo numuni ginogo gale hána legeake gehani amupiló lapusa hizeake, numuni gekago, golini zike nagamí napa veleko una napa nenémo ake numunima ahelú imóza, numuni nene geható ginazo, mómoká amike alévolé oko minamó. ⁴⁹Nenéminiki niamóza, ve makolite není gako giliakaláa giliake není gako gili alisá amave. Keza nenéminiki niave. Ve makolímo numuni ginogo lapusa hizemoko mikasi veletó soza moloko numuni gekago, alika nagamí veleko una napa nenémo ake ahelú okago, numunima litá oko lemeko pou loko akamó.

Izesú ami gizapa vémini gelekelé veva alémo zokamó

(Mat 8:5-13)

7 ¹Izesú eza monó gakóma neneló lo keme asú oake Kapanao numutoka vimó. ²Neneló Loma apatotí ami vetini gizapa ve makolímini gelekelé veva netá napa gizaleake helesakosá oko noigo, gizapa vevámo izegipalamú nene amekumú izegipala nenazo, ³Izesuni gakoláa geleake, Zuta vetini ve uvóipini makó nokimisilike Izesuni li amikiko okoko není gelekelé izegipa nene avisi netáma alémo zokatihe liki viki loká ilo loko loketamó. ⁴Lokimiake kimiselekago, keza Izesutoka viki anitiake amuza miliki láa liki li amemó: Lelí lova vetémini gizapa vema oko moloko noimó nene lamaná noive. ⁵Eza nene agikáa nene leza Zuta vejená lemeaká noive. Itó monó numute utó itive loko nene

moni napa molokago, akohekago, gilitamóma neve. Lá oaká noi vema nenazo, gakola gele amitanimó nene vevesanogo ive. ⁶Liki li amikago, Izesú geleake kezagi makó vamó. Viki numu ávatiha vikago, lova gizapa ve nenémo agive makó nene Izesutoka nokimisilike gakó láa loko kimiselekago vamó: Guivahanínemaka, neza ánéáminaloka goselé gapo okoko numúnégú nanamú ititane. Áminaló minozo. ⁷Nezánemú gulumó vevesamigo, geitoka vamuve. Nenemú gezama hanuva neneló nooko gegepatunú lokako gelekelé izegipáne zokative. ⁸Neza ámináminoko kugulizaki vetini gelekeleláa nouve. Itó ami ve makó nene není gizapaló niave. Lá niago keitokatí makokumú vozo lomikugo hanuva vinogo ive. Itó makokumú ano lomikugo nene hanuva anogo ive. Itó gelekelé izegipánemú nene voko hoza alezo litomó nene hanuva voko hoza alinogo ive. Nenéminoko geí gakó nene alévolé onoinazo, hanuva áminaló minoko gakó lokako avisi netá zokative loko lunae. ⁹Liki li amikago, Izesú nene ámina gakó geleake, ámina ami vetini gizapa vema sigaga lotake mino viligoake, ámegetiki va vejená láa loko lo kimimó: Neza lamaná lo likimitoze, gililo. Isilae vejená lekezalokatí gele alévolé oaká nenémináa makó ánígoko gelesá onamumóma neve. ¹⁰Loko lokago, ami gizapa vémo kimisili vejená atiginá iki numutoka vake ámina vémini gelekelé ve ánígamó nene zokoake noigo ánígamó neve.

Izesú Naino numutoka gohuna venalímini gipa heleneikutí alémo otimó

¹¹Lá okago, Izesú mino hána amike apá makó agulizá Naino neneloka izegipala zuhagi nivago vejená mukí kémegetiki vamó. ¹²Viki numu gatetó nanitego gonosi makó zaló miliki aliki lemémó nene, gevoná vená makolímini gipala hámakó minamó nene helekago, gale zinigi numutotí ve vená mukí nilemego, ¹³Guivahanímo gevoná venáma áníhoake muluna gitihiná okago ive amo loko loake ¹⁴vike ukoakoló ale gilimó. Ale gelekago, gihiake otinago, Izesú gipa geza otitane loko noluze, otemane loko lokago, ¹⁵helenei netalímo oteake gakó akó limó. Noligo, Izesú nene izolahiki goha minatáive loko lotamó. ¹⁶Lomikago vejená keza áníga netakumú kelegesá goha legekago, Ómasi agepoka lake Ómasímini agepagutí gakó loaká ve napa nene holutegú utó oko noive liki likago, lugáate Ómasímo vejenala zuha lelémó vatí inogo ve imane amiselekago okave. ¹⁷Liki likago aikumú gakoláa nenémo Zutaia mikasiuka itó mikasi helega helegaloka voko oko imó.

Zoní ve lositá kimiselekago Izesutoka vasimó

(Mat 11:2-19)

¹⁸Zoní nene nagá numukú noigo, izegipala zuhate Izesú oko moloko i gakola aveté iki li amikago, ¹⁹ámina gakó geleake, Izesukumú agata losi geleake, keikutí ve lositá alesa moloake Guivahanima láa liki loká

itáive loko kimisilimó: Utó itive liki monó gotolaú luhuva giza vema nene géisi noape itó alika makó utó itikumú ageva itune, liki lilizo loko kimiselekago, ²⁰ámina ve keza Izesutoka viki lasimó: Monó nagamí holokimiaká ve Zoníma gologí oletative loko lo mololeta ve ative liki li milamóma géisi nene noape, itó makokumú ageva itune liki loká ilizo loko limiselekago nousive. ²¹Liki likasigo, ámina zupama Izesú nene mukí kivisi vejená itó netá gizale vejená kelémo zokoká itó kigikagutí holosi golesa kepeleko kimiseleká itó kogómula likamó ale pulusoketoká imó. ²²^y Lá noigo, ve losima anitiki loká imikasigo Izesú nene ámina vema noive loko Zoní gilitive loko láa loko lo kimimó: Lekeza atiginá iki viki netá matá imane loló nougo ánigiki miliki asimó nenémimi gakola aveté iki Zonini li amilizo: Kogómula lilikupá molamó nene kogómula ale hanatokimiaká noive. Kigisaló alimó nene ale lamaná okimiaká noive. Halamé gizalemó nene gililiaká niave. Kagata molamó nene kagata ale koló okago gakó giliaká niave. Lepa gonosi kelémo oteaká noive. Itó limiki minamó ámemena nenete není gakó lamaná giliaká niave. ²³Lá onoinazo, makó keza není mogonamú kagata losipasi gelemitamó nenete kogoliza viziki minanigave liki li amilizo.

²⁴Loko Zoní kimisili vema lo kemekago, atiginá iki nivasigo, Izesú vejená sii sii liki minamoláa Zonikumú láa loko lo kimimó: Lekeza Zoní noitoka mikasi gomopalaló vamó nene nanakitana vema ániganigi vamóma neve. Ve makó akepagitana oko hepélímo aleko mómoká noiko ániganigi vamóma nehe. ²⁵Itó ve makó gonanalivagi gó ale akoloake noigo ániganigi vamóma nehe. Gilinahe. Luhuvagi gó ali akiliki miniaká nia ve keza kugulizaki vetini numuni napagú akiki otiki minake nosá hisugú viziaká niave. ²⁶Lekeza Ómasímimi agepagutí gakó loaká ve makó ániganigi vamóma neve, olo. Itó makó lo likimitoze, gililo. Lekeza ánigi mina vema Ómasímimi agepagutí gakó liaká ve lugáa keikitana minamive. Eza haitolíminoko minokave. ²⁷^z Monó gotolaú Ómasímo gakó makó láa loko limó nene láa liki luhuva gizinamóma neve:

Gililo. Není gakó lole ale ve makó amiselekugo, ale goí oko voko kigikagú hoza alitanimómámimi gapoga velegetanogo ive. Loko li gakó nene Zonitoka vo alimó neve. ²⁸Loko loake, láa loko limó: Neza lamaná lo likimitoze, gililo. Mikasiuka utó ina vejenakutí makolímo Zonini ma avilegesá amive. Lá onoimóza, Ómasímo gizapa okimiaká noi vejená limiki niamoláa kezagi gopa Zonini aviligitigí iki niave. ²⁹^a Loko lokago, takisi aliaká nia vegi vejená lugáagi keza ámina gakó giliake Zonitokatí monó nagamí amunaloka emane hilinamó nenazo, Ómasímimi gakó hizi lé ikago gihila zimóza, ³⁰Palisaio monó vegi monó mogona apí ikimiaká a vegi keza nene Zonini monó

^y 7:22 Isa 35:5-6; Isa 61:1 ^z 7:27 Mal 3:1 ^a 7:29 Mat 21:32; Luk 3:12

nagamikumú goselé iake Ómasímo veleketeta gapo nene ániagi ahulamó neve.

³¹Loko loake, Izesú makó láa loko limó: Oko moloko nougo ániagiaká nia vejená nene nanetató lo moloko lokugo vo guni itive. Hiláagitana niave. ³²Keza gili goselé iaká nia izegipagitana niave. Izegipa keza alesesá apatoka minake izegipa lugáama sele liki leza nama luható nene nanamú nama lisá amave. Itó helegaloka nene ive nama luható nene nanamú ive nama isá amave liki li kimiaká niave. ³³Itó nezagi Zonímagi ámináminoko nousigo goselé lekepeleaká noive. Monó nagamí holokimiaká ve Zoní eza apí oko hozaváa nalike iza goula nosá zahí nagamí lamaná namike etó oko minokago lekeza ániagiake holosi makolímo agika ale gopa okago noive liki lamó. ³⁴Itó okulumakutí lumu ve gihila neza lemeko iza goula zahí nagamí nosánetá lamaná noaká nougo ániagiake ve imane ániálogo. Áisi nene gasova ve nagamító ve eza nene takisi aliaká ve itó ániago goselé oaká nouhá vejená makolitini zogonini noive liki liaká niave. ³⁵Láa nilamóza, Ómasímo gele guni oko netá matá aleaká noimó nene vevesokogó minoaká noigo, izegipala zuha keza nenémini mogona ali utó iaká niave, loko limó.

Izesú eza Palisaio monó ve Saimonani numukú minamó

³⁶Palisaio monó ve makolímo nosánetá natane loko Izesuni alesá molo amekago, numunagú itiki nosánetá niki minasimó. ^{37^b}Ámina apatotí mokoló vená makolímo Izesú eza Palisaio monó vemámini numukú iteko noive liki lamóma geleake, anuva hilina gehanigitana gonigú minamó nene aleko iteko, ³⁸amegesaloka noike ive noigo, agómula nogoza nene Izesuni agisaló lemekago, gotola zopovatunú nene agisa gilatotamó. Gilatomiake, Izesuni agisa nene agoka legeko nonake, anuvavagi meseme nene agisaló holotamó. ³⁹Holomikago, Izesuni alesá molo amí ve nenémo ániagoake, agikatunú láa loko gilimó: Imane Izesuni agupeló ale nogili vená nenémo golesa netató vená noive. Izesú eza ató imane Ómasímini agepagutí gakó loaká ve minalina, ámina venálmíni mogonamú nene moko mogonaló venale loko gililine. ⁴⁰Loko agikatunú gelekago, Izesú nene Saimonao, neza gakó makó lo gimitoze loko lo amekago, tisánemaka, lokako gilitove. ⁴¹Loko lokago Izesú anoza gakó makó láa loko limó: Ve makolímo alikamule loko loake moni nene ve losi gutá kimimó. Makó nene 500 kina amimó, itó maga ve nene 50 kina amimó. ⁴²Lá okago alika nene áminaló nene pekimitíive liki monimú vitagá asimó nene nomigo, eza ahulalizo loko lokago, ali haha asimó. Keitokatí hilímó aikumú lagaváa napaló geleneitive. ⁴³Loko lokago, Saimoná láa lo amimó: Nagata gulumó moni nekisala napaló ahulota ve nene neitive.

^b 7:37 Mat 26:7; Mak 14:3; Zon 12:3

Loko lokago, Izesú geza vatí oko lokane. ⁴⁴Loko loake, venáma noitoka viligo moloake Saimonani láa loko lo amimó: Vená imane ántonape. Neza numukagú itekugo, géisi nigisa nigizani nagamí zito nagamí leke molonetamako, imane vená nenémo ive nogoatunú nigisalo holonimiake gotola zopovatunú nogilatonetave. ⁴⁵Itó géisi leza Zuta vetini suni aleko nogoka negepa nanimóza, vená imanémo numukagú apí oko noitugo nigisáne amuza moloko agoka agepa nonave. ⁴⁶Géisi oaká nouhá netá aleko gotónégú nene meseme holonetamanimóza, imane vená nenémo nigisáneló anuvavagi mesemetunú holonimikave. ⁴⁷Neneló láa loko lo nogumuve. Imane vená eza nenikumú geleake nasahilí napa onimikago lihimala mukí ahulomikuve. Makó eza lihimavala koma ahulomikiko noititímo nene lihimavala gilatota vema agika napa ameminogo ive. ⁴⁸Loko loake, venáma láa loko lo amimó: Lihimaka ahulo asú ogimikuve. ⁴⁹Loko lokago, ezagi nosá niki mina vejená keza kigikatunú láa liki lamó: Áisi haitolímínímo nolihe. Lihimavaka asú okave loko nolimó nene hí ve suka nolive. ⁵⁰Liki nilago, Izesú nene venáma láa loko lo amimó: Nenikumú gele alévolé anitímo gelémo lamaná okaze, mulukagú hulu iko vozo, loko limó.

Izesugegi vená makó miniaká amó

8 ¹Nene zupa velelaló nene Izesú eza apá koma napaló mohona ike vejená nene monó lo kemeko Ómasímini gizapaló minoakalímíni gakó lamaná lo keme keme oko mohona imó. Mohona noigo, ámegetiki mihina niamoláa nene izegipala zuha 12-a ^{2c} itó vená lugáa amunaló emane kigikagutí holosi kepeleko kimisilimoláa itó kivisekago niago kelémo zokamoláa keitokatí makó Maliá agulizá Magatalalo liki milamó, agikagutí holosi 7 kepeleko kimisili vená, ³itó makó agulizá Zoaná eza Heloteni hozaló gizapa ve Kuzani venala, itó Susaná itó vená lugáa keza moni henokanonigi miniake Izesugini nasahilí ikitiki minamó.

Zuha netá atilí oaká vemú anoza gakola

(Mat 13:1-9; Mak 4:1-9)

⁴Numutó namató ve némitó ve Izesutoka vóvotiki alegesá iki minamó. Lá niago, ángoake anoza gakó makó láa loko lo kimimó: ⁵Zuha netá atilí oaká ve makolímó netá gihiláa atilí inogo vimó. Mikuka atilí omo novigo, gihila lugáa gapoló alemó zekago, vejenalite lisiki matelé zemó. Itó gaha namate ake ni asú amó. ⁶Itó gihila lugáa nene gehani amupiló lemeko minake, goloko iteakaláa itekamóza, mikasi nogoza minamigo osagava vizeake hilimó. ⁷Itó gihila lugáa nene lilihámini luhusa nene mikasigú ha netó lemeko minake goloko itike liliha nenémo zemikago, nogotamó. ⁸Makó

^c 8:2 Mat 27:55-56; Mak 15:40-41; Luk 23:49

nene mikasi lamanakú lemeko minake goloake, gihila mukí zimó. Hamó zámo nene gihila 100 zimó. Loko lo asú oake, gakó napagutí láa loko limó: Lakagatagi minatamó neneta, gakó imane gili hee liki gililo, loko limó.

Zuha netakumú anoza gakolímini mogonáa

(Mat 13:10-23; Mak 4:10-20)

⁹Loko lokago izegipala zuhate anoza li gakokumú loká itago, ^{10d} eza láa loko lo kimimó: Ómasímini gasovaló minoakalímini asuguná gakó lekeza gilitave loko lonoimóza, lugáa keza nene anoza gakokó gilitaze. Lá niiki netá matá kogómulatunú nene ániगतamóza ániगi vevesaminigave, itó kagatatunú gakoláagó gilitamóza, mogonáa gili vevesaminigave. ¹¹Itó anoza gakó imane nolumó nenémini mogonáa lá oko neve. Zuha netá gihiláa nene Ómasímini gakó neve. ¹²Gihiláa gapoló lemeko minamó nenéminiki minatamó keza monó gilitamó nene kigikagú limitimóza, áminasító Satá nene gili alévolé ikiko Ómasímo kugutó vizekative loko aniteko ámina gakó nene ipá oko aleko voaká noive. ¹³Itó gihila lugáa gehani amupiló lemeko goloaká imó nenémini iki minatamó keza monó nigiliki laga kivisekago giliaká niamóza, kigikagú luhusáini alemigove liki gamena alínipa alinago gimínikú moloaká netá utó okago monóma ahuliaká niave. ¹⁴Gihila lugáa lilihagú lemeko minamó nenéminiki minatamó keza monó giliakaláa gilitamóza, kugupémini netakumú gelekeleléa niminiko, moni henokanonímini lagavámo kigikagú lemeake monóma zemikago, keitoka gihila utó oko guzá losá amive. ¹⁵Gihila lugáa mikasi lamanakú lemeko minamó nenéminiki minatamó keza monó giliiki kigika ali guni iiki legesó iki ali minikago, keitoka monolímini gihila utó oaká noive.

Liví legeakakumú anoza gakó

(Mak 4:21-25)

^{16e} Hí vémo liví legeoko somotunú ze hitatimó neve, itó hí vémo legeoko sepekú lolosá gitimó neve. Lá oko nomive. Itita vegená nene hize hanatoketative loko legeoko holomaló molanogo ive. ^{17f} Ámináminoko Ómasímini asuguná onoi netá nene mino-loko voko tolova amitive. Míno utó o asú inogo ive. Halá genei netá nemó nene ámina oko utó o asú okoko hitaminogo ive. ^{18g} Monó alinita vegená nene vatí iki gizapa iki ali minatamó nene Ómasímo goha miní ameko makó kiminogo ive. Itó makó keza monóma lamaná iki gizapa amitamó nenete alenoupe liki litamóza, goha ipá oko alekiko hanuva minatamó neve. Nenemú lekeza gakó imane nigiliki gili guni iki gililo, loko limó.

^d 8:10 Isa 6:9-10 ^e 8:16 Mat 5:15; Luk 11:33 ^f 8:17 Mat 10:26; Luk 12:2

^g 8:18 Mat 25:29; Luk 19:26

Izesuni izolahove agunamotamolave
(*Mat 12:46-50; Mak 3:31-35*)

¹⁹Gamena makó nene mukí veenalite Izesuni hizi vigiake niago, Izesuni izolage izegipa agunamotamolave ake vegegakumú olovó ziake mini hetó minamó. ²⁰Lá niago, ve makólímo ániagoake Izesuni nene izokage izegipa gugunamotamokama geí ániaganigi amó nene hetoka niave. ²¹Loko lo amekago, Izesú nene vegeanáma láa loko lo kimimó: Ómasímini gakó giliiki gili alitamó imanete není izónege izegipa nugunamotamóne niave, loko limó.

Izesú lokago una napa ahulamó
(*Mat 8:23-27; Mak 4:35-41*)

²²Gamena makó zupa Izesú ave izegipala zuhagegi nagamikú lapegú itemó. Itiake, Izesú nene nonohuló likeko vola helegaloka vitune loko lokago, giliake, vamó. ²³Nivake, Izesú nene agómula ahihí okago, avó akonoigo una napa nalike nonohulóma golesa oake valahuká nozike sipimámini agikagú lemeko vaí oake, nagamí nonohulukú hilisá amó. ²⁴Lá niake, Izesuni alími oteke láa liki li amemó: Gizapa velemaka, leza nagamí nonohulukú simá nanogo nouhá lae. Liki likago, Izesú oteake, unamagi nagamí valahukámagi gahá kemekago, kii nolike zou limó. ²⁵Zou lokago, lekeza gili alévolé iakatini hí neve. Loko lo kemekago, izegipala zuhate keza ámina netá ániagiake, kelegesá legekago, sigaga lake ligili hagili niake, agae, ve imanémo hepeki nagamí valahukaki gakó lokimikamó nene gili alikasimó nenazo, ve imane haitolímini netive, liki lamó.

Gelegesa mikasiuka holosi golesa amisele ahulamó
(*Mat 8:28-34; Mak 5:1-20*)

²⁶Lá okago, Galilaia nonohuló helegaloka Gelegesa vegegalitini mikasiuka vi anitemó. ²⁷Neneló anitiake nagamí gahevaloka nitego, numuni apá napalokatí ve makó ake Izesuki hotu lasimó. Ámina vémini agikagú nene holosi golesa mukí minikago gamena hána gó luhamike minake numukú akosá amigo, hanuva geha mulikú gonosi milimiligukó akoko mohona oaká i ve minamó. ²⁸⁻²⁹Ámina holosite gamena gamena ámina vémini agikagú alévolé iki minikago, vegeaná keza agisa agizató seni nagatunú ziake gizapa iki minamóza, holosi nenete nagá nene apiliki hukimikago golisi mikasi gomopalaló voaká imó. Áisi nene Izesuni ániagoake gopaga like agisauka pou loko mikasiló akoake gakó napagutí gamoga geko láa loko limó: Izesuvo, Ómasi napámini gipalamaka, géisi nene nana netá golesa onetanogo noane. Loko lokago Izesú nene holosi golesa geza ámina vémini agikagutí itekoko vamane loko lo amekago,

holosi nenémo amanapa ike geza miluma hoza nememitane loko alévolé oko loká nogetuve. ³⁰Loko lokago, Izesú loká otake limó: Gugulizaka éagave. Loko loká omikago, holosi vaí iki agikagú minamó nenazo, neza nugulizáne nene ami mulusi nouve loko limó. ³¹Loko lokago, holosimate meikú limisele molamitane liki negénegeka lamó. ³²Liki likago, ámina mikasiló iza gululusi mukí nene agokaú gale niki niago, limiselekako izatini kigikagú limitune liki negénegeka likago, gele kemekago, ³³holosi golesa nenete ámina vémini agikagutí itiake vake izatini kigikagú itiake limikago, ámina iza keza olíi miliake meiniló limiake nonohulukú limiki nagamí niki hutiake helemó.

³⁴Limiki hilikago, iza gizapa vemate ániagiake ololu liki taoniloka itó numuni amegesaloka viki avetó iki li kimikago ³⁵vegená keza ámina utó i netá ániganigi viake, Izesutoka anitiake holosi agikagutí kimiselekago va vema nene luhoaká gó luhoake itó geleakaláa lamaná okago, Izesuni agisauka gakó geleko noigo, ániagiake kelegesá ligimó. ³⁶Lá niago, ámina netá ániga vete holosivagi mina ve lamaná ikumú nene ániagi mina vejená avetó i kememó. ³⁷Lá ikago, Gelegesa mikasiuka amelage keza kelegesá goha legekago, Izesú eza nene mikasinini ahulooko vitive liki li amemó. Li amikago, eza atiginá oko vinogo nagamikú lapegú itimó. ³⁸Noitigo, holosi agikagutí kimiselekago va vemámo Izesuki minatíve loko negénegeka lokago, Izesú gele amemike láa loko lo amimó: ³⁹Geza numukaloka voko Ómasímo loló ogeta netá lamanalímini gakoláa nene vejenaka lo kemezo loko amiselekago, ámina vemámo atiginá oko vike Izesú loló ota netakumú nene apá amelagini lo utó oko lo keme asú imó.

Zailoni moholagi Izesuni gotó ale gili venaki

(*Mat 9:18-26; Mak 5:21-43*)

⁴⁰Lá okago, vejená keza vola helegaloka Izesukumú ageva iki niago, atiginá oko omo anitekago, ániagiake, geké vaké limikago, ⁴¹⁻⁴²monó numukú agulizaki ve makó agulizá Zailó loko noi vémini mohola hamokó aí kilisimasiva 12-a mina mohó nene helesakosá oko minokago eza ake Izesuni agihúna geko numúneloka makó vitíve loko negénegeka loko limó. Lá okago, makó nivasigo, vejená keza sii sii liki nivago, ⁴³holúikú vená makó minamó nene ikanímo apelekago númase gapo molova molova oko noigo, kilisimasi 12 oko novigo lusa ve nene moni keme asú imóza, keza lusa geha geha asú amitimó okago ahulitamó. ⁴⁴Ámina venalímo Izesuni amegesaloka oake, luhoaká gó gahevaloka ale gilimó. Ale nogiligo áminasitó nene golaniva utamó. ⁴⁵Lá noigo, Izesú loká oketoko éaho nugupeloka ale gilive loko lokago, vejená keza egamega ikago, Pitá láa loko limó: Gizapa velemaka, vejená sii sii liki nivamó nenazo, makolímo noitive. ⁴⁶Loko lokago, Izesú láa loko limó: Óe, makolímo nugupeló

ale nogiligo, zámuzáne makó nene nugupelotí novigo noguluke noluve. ⁴⁷Loko lokago, vená eza mogonáne mota utó noinazo loko geleake, luvoluvo zeake Izesuni agihúna geake, vegeñalitini kovogisalo nene avisi netalímini mogona itó ale nogilike zokamó nenémini mogona lo utó okago gili asú amó. ⁴⁸Nigelego Izesú láa loko lo amimó: Mohónemaka, nenikumú gele alévolé anitímo gelémo zokokave. Mulukagú hulu iko vozo.

⁴⁹Loko noligo, monó numukú agulizaki vemámini numukutí ve makolímo oake láa loko limó: Mohokama mota helekave. Lá okanazo, tisate nene goselé gapo hanuvamú okatize, ahulikozo. ⁵⁰Loko lokago, Izesú geleake Zailoni láa loko lo amimó: Geza gehelele vizemiko gele alévolé okogó minatanimó nene, mohoka goha otinogo ive. ⁵¹Loko loake, numutó vo aniteake vegeñá makó nene ámina numukú itemitave loko lokimikago, hetó niago, Pitá Zoní Zemusí itó mohó izolahiko amelahiko kezagó kelémoko itimó. ⁵²Iteke ve vená keza ámina mohó ive nama itiki niago, áñigoake goha alémo otitikumú geleneike anoza gakó láa loko lo kimimó: Ive amilo. Mohóma nene helemive. Hanuva avó akonoive. ⁵³Loko lokago, mota heleneimó nemóza liki giliake giza itamó. ⁵⁴Giza imikago, Izesú nene agizató aleake sele loko mohó geza otezo loko lokago, ⁵⁵áminasitó ameni atiginá okago otimó. Otekago, nosáneta aliiki mohóma amiko native loko loketamó. ⁵⁶Lokimikago, izolahiko amelahiko keza gesesimó nene golivagi netá loló imó. Lá okago, Izesú nene ámina netakumú gakó avetó iki vegeñá li kememitave loko lo hukoketamó.

Izegipala zuha 12 keza monó hozaló vamó

(*Mat 10:5-15; Mak 6:7-13*)

9 ¹Izesú eza izegipala zuha 12-pala sele lo kemeake vegeñalitini kigikagutí holosima gale gihiki kipiliki kimisilitave loko itó kivisi vegeñá kilími zokatave loko nenémini zamuza kimimó. ²Kemeake, Ómasímini gizapaló minoakalímini gakó li kimiki kivisiti vegeñá kilími zokatave loko nokimisilike, ³^hgakó láa loko lo kimimó: Gapo vitatoka netá matá aliki vamilo. Hánusa akiseaká gó peleti moni nene alemiki, itó gó lositá luhamiki vilo. ⁴Itita numuni makokú itiiikima, ámina numukú akiliki niviki ámina apatotí vitave. ⁵ⁱ Apá makotoka likilími lamaná amikoma, ámina apá ahuliiki niviki vahé miliki likigisalotí mumusopa nene usagamá zi ahuliiki vilo. ⁶Loko lo kemekago, keza numutó namató vake Izesuni gakó lamaná nene li utó i kimi kimi iká kivisi vegeñá kilími zokiká amó.

^h 9:3-5 Luk 10:4-11 ⁱ 9:5 Apo 13:51

Monó nagamí holokimiaká ve Zoní hili gakó
(*Mat 14:1-12; Mak 6:14-29*)

^{7j} Lá niago, agulizaki ve Heloté nene aposolote alévolé netá lilí niakumú geleake, agata gululusi gilimó nene, ve makolite Zoní nene heleneikutí oteake ámina netá loló noive liki nilago, ⁸ itó makolite nene Ómasímini agepagutí gakó loaká i ve Ilaizá goha utó okave liki liaká niago, makolite nene gozapá Ómasímini agepagutí gakó liaká a vegutí makóma Ómasímo alémo oteneive liki liaká amó nene, ⁹ Heloté geleake, láa loko limó: Zonini luvana hukumóza, ve makokumú gakoláa nenémika liki lago nogulumó nene hí ve noitive. Loko loake, Izesuni ániaganogo gilimó.

Ve 5000 nosánetá kemeko namó
(*Mat 14:13-21; Mak 6:30-44; Zon 6:1-13*)

¹⁰ Aposolo keza monó hozaló kimisilitotí atiginá iki iake, keza iki miliki a netakumú Izesuni avetó iki li amemó. Avetó iki li amikago, eza kelémoko vike kezáikó apá makó agulizá Petesaita numutó vi anitemó. ¹¹ Lá niago, ve vená mukí keza giliake, Izesuni ámegetiki nivago, eza kelémo moloake Ómasímini gasovaló minoakalímini gakó lo kimike, kivisi vegená kelémo zokamó. ¹² Lá noigo, únaká nene gamena asú inogo noigo, izegipala zuha 12-palamate iake láa liki li amemó: Leza mikasi gomopalaló nouninazo, vegená kimiselekako luhuva numutokagi iza gihiló numutokagi viki nosánetakumú vitagá iki niiki akatave. ¹³ Liki likago, Izesú nene lekezatini nosánetá kimiki nalo loko lokago, keza anotó aliki láa liki lamó: Peleti ligizani lugaloka asú igo itó lagaha lositakó molonounimó nenazo, leza imane vegenalitini nosánetá voko meina hizeketatune loko nolape. ¹⁴ Liki lamó nene áminaló mina véa 5000 nenéminiki niago giliake láa liki likago, Izesú nene izegipala zuha láa loko lo kimimó: Mukí vegená nene 50 50 nenéminiki mulusi miliki minalo liki likitalo. ¹⁵ Loko lokago, keza izegipala zuhate láa liki likimikago, vegenáma mulusi miliki niago, ¹⁶ Izesú nene peleti ligizani lugaloka asú igoma itó lagaha lositámagi aleake, okulumakú okenava oko nánigake Ómasi agepoka loake peleti gitegeake, ámina nosánetá gona miliki kimitave loko izegipala zuha kimimó. ¹⁷ Lá okago, vegená mukilite nikake kagatupa okago, nosánetá lumáa ali nupa iki gosúveha 12 vaí okago ali milamó.

Pitá Izesuni mogonamú lo utó imó
(*Mat 16:13-19; Mak 8:27-29*)

¹⁸ Gamena makó nene Izesú eza Ómasiloka loko noigo, izegipala zuha kezagó neneló niago, eza loká oketake vegenalite nenikumú éahove

^j 9:7-8 Mat 16:14; Mak 8:28; Luk 9:19

liki liaká niave. ¹⁹^k Loko lokago, keza láa liki li amemó: Monó nagamí holokimiaká ve Zoníma goha utó noane liki liaká niave. Itó lugáate nene Ilaizá gozapá okulumakú iti vema goha lemeko minane liki liaká niave, itó lugáate nene gozapá Ómasímini agepagutí gakó liaká vegutí makó nene galegutí otekave liki liaká niave. ²⁰^l Liki likago, Izesú loká oketoko lekelisi nenikumú éahove liki liaká niave. Loko lokago, anotó aleko Pitá nene geza Ómasímo gologí oletatane loko lo mololeta vema noane, loko limó.

Izesú hiliti gamenamú epoapoga limó

(Mat 16:20-28; Mak 8:30–9:1)

²¹Láa loko lokago, Izesú láa loko lo hukoketoko limó: Lekeza imane gakó lo nolukumumó nene vegená makó li kememilo. ²²Okulumakutí lumu ve gihila neza nene monó gizapa vegi guguni giziaká ve napagi monó mogona apí-ikimiaká vegi keza miluma netá mukí nimiiki není ániigi goselé ikiko nipili hilikiko, gamena losive makole minokinake heleneitokutí goha otinogo uve.

²³^m Loko loake, vegená mukí láa loko lo kimimó: Vegená makolite není némegetatune liki nigilikima nene kugupémo giliti netá matá nene gili ahuliiki zohota zaló kipili hilinigi miluma netá ali gihikitatakumú gamena gamena gili zagiiki némegetiki ataze. ²⁴ⁿ Makó keza kigika kemeníini ali amánapa iki minata vegená nene kigika kemeni gopa inogo ive. Itó makó keza nene nenikumule liki kigika kemeni vínasi ahulatamó nene alévolé kemetameni alitamó neve. ²⁵Makó keza mikasímini amupiló ne netá ali asú niko kezáini kigika kemeni gopa okoko tolova itimó nene, mikasiuka henonimámo nana oko kelémo lamaná itive. ²⁶Ve makó keza nenikumupe monónemupe aveté itakumú kovoza hilitimó nene, okulumakutí lumu ve gihila neza lapanáne itó aménehini lapaná nenémo numupiló itekiko apazá agelova kelémoko limito gamenaló nene keza kovoza hilimó nenéminoko nezagi nene kugulizá ale otitokumú novoza hilinogo ive. ²⁷Neza lamaná lo likimitoze, gililo. Lekelisi ató nene nia vegená lekelikutí lugáa makó hilinamiki ha niko Ómasímo gizapa oketatimómámini zamuza utó okiko ániiganigave, loko limó.

Izesuni agupe haitolimini imó

(Mat 17:1-13; Mak 9:2-13)

²⁸Izesú ámina gakó lo kemeake, gamena 8-ía nenéminoko oko vokago, Pitani Zonini Zemusini kelémake agokaú Ómasiloka linogo itimó.

²⁹Itike Ómasiloka loko noigo, haitó agoka agepa ale noluhake noike

^k 9:19 Mat 14:1-2; Mak 6:14-15; Luk 9:7-8 ^l 9:20 Zon 6:68-69 ^m 9:23 Mat 10:38; Luk 14:27 ⁿ 9:24 Mat 10:39; Luk 17:33; Zon 12:25

gineganevámo gizopa vaevae loko minamó. ³⁰Lá noigo, galinali ve lositá Moseko Ilaizako keza okulumakutí utó ikasike Izesugegi gako ligili hagili ake, ³¹okulumalímini gonanalivagi niasike, Izesú nene Zelusalega noheleko Ómasímo lo mola netá loló itikumú ligili hagili amó. ³²° Lá niago, Pitagegi kogómula ahihí okago, kovó akinakutí otiake ánígamó nene, Izesú eza lapanalagi noigo itó ve losima ezagi niasigo ánígamó. ³³Ánigikago, ve losima keza ahulimiiki vinigi niasigo, Pitá láa loko Izesuni lo amike limó: Monó gizapa velemaka, imaneló minuhá laga okaze. Lá okanazo, gaizopa losive makole geleketatune, makó geile, makó Mosenive, makó Ilaizanive loko limó nene gako gele guni amike gopa limó. ³⁴Loko noli agepagi límúsímo lemeko ze hitokimikago, límusi hitoketakumú kehelele vizimó. ³⁵^p Lá noigo, límusigutí Ómasímo láa loko limó: Imane gipáne alémo etó onou gipáne noize. Aí gako gili alilo. ³⁶Gako láa loko utó okago, giliake ánígamó nene Izesú ezáagó noigo ánígamó. Ánigiake, ámina gamenaló áníga netakumú kegepa apiziake aveté iki vejená makó nene li kememamó.

Izesú holosi golesa mina gipa alémo zokamó

(Mat 17:14-21; Mak 9:14-29)

³⁷Akiake gó lokago, agokagutí limiake niago, vejená mukí iake Izesugegi hotu lamó. ³⁸Hotu liake keikutí ve makolímo gako napagutí láa loko limó: Monó gizapa velemaka, není gipa hamokó oko ánígatane loko loká nogetuve. ³⁹Holosi makolímo aleko alévolé oake noigo, galinali gopaga loaká noive. Lá noigo, holosi nenémo alémo mómoká goha okago, sehovala veleaká noive. Itó apeleva apeleva oko noike litá oko ahulotosá amive. ⁴⁰Itó izegipaka zuha nene holosima apiliki amisilitave loko lo kumumóza, amiselemitamó okave. ⁴¹Loko lokago, Izesú láa loko lo kimimó: Lekeza ató imane gili alévolé amake mulutikú amánapa iki minamó neneta lekelikumú goselé nepelekave. Lekezagi gamena gamena minoloko iteko minokugo gili alévolé itahe. Lá ikaze, gipaka imaneló alémoko ano. Loko lokago, izegipama Izesutoka noago, holosi nenémo mikasiloka ahelú okago pou loko akonoigo, alémo mómoká imó. ⁴²Lá okago, Izesú nene holosi golesama gahá amike namisilike, ámina gipa alémo zokoake, goha amelahitoka alémo atiginá imó. ⁴³Lá noigo, ve vená mukí keza Ómasímini zámuza napamú sigaga sagaga lamó.

Izesú hiliti gamenamú goha epoapoga limó

(Mat 17:22-23; Mak 9:30-32)

Lá iake Izesú oko moloko i netakumú sigaga nilago, Izesú nene izegipala zuha láa loko lo kimimó: ⁴⁴Lekeza imane gakató lakagata miliki giliki

° 9:32 2 Pit 1:17-18 P 9:35 Luk 3:22

minalo: Okulumakutí lumu ve gihila neza gala vetini kigizakú nene nepele hilitune liki nilími milanigave. ⁴⁵Loko limóza, nene gakolímuni mogonáa gilikatave loko kigika kagata koló amimó nenazo, keza gili vevesamake, ámina gakokumú loká itanigi kehelele vizekago loká itamamó.

Vegená mukikutí éaho livilegeko noive.

(Mat 18:1-5; Mak 9:33-37)

⁴⁶ Lá ikago, izegipala zuhamate gakokumú lova hizeke lelikutí éaho livilegeko agulizaki vele minative liki lamó. ⁴⁷Nilago Izesú eza kigikagú nigele gakó geleake izegipa koma makó alémoko ake amatoka alémo oteneike, ⁴⁸ láa loko lo kimimó: Makó keza nenikumule liki izegipa koma áimanémini nasahilí ikitatamó nene, není nasahilí inimiaká niamó gelekave. Itó makó keza nasahilí initatamó nene nimisili ve aménehini nasahilí itatamó gelekave. Lekelikutí ve makolímó lemeko nouve loko giliti ve nene Ómasímó alémo ve napa loló okiko likivilegeko minanogo ive.

Lekelí gala ve noamitimó nene lekelikutí ve noinogo ive

(Mak 9:38-40)

⁴⁹Loko lokago, Zoní láa loko lo amimó: Gizapa velemaka, leza ve makolímó geí gugulizató like holosi golesa nene vegenalitini kigikagutí kepeleko nokimisiligo ánigunimó nene lelí lémegetami ve nenazo, géneka lotunimole. ⁵⁰Loko lokago, Izesú láa loko lo amimó: Lekeza géneka litamilo. Ve makó keza lekelí gala velini niamitamó nene lekelikutí ve ninigave, loko limó.

Samalia vegená makolite Izesuni alími milamamó

⁵¹Ómasímó Izesuni goha okulumakú alémoko ititi gamena alitokago, Izesú nene Zelusalega vitove loko alévolé oko agata gilimó. ⁵²Lá oake ve makó kimiselekago, vake Izesú atikumú ali vatí itanigi Samalia mikasiuka apá makotoka vi anitemóza, ⁵³Samalia vegenaki Zelusale vegenaki kogoka hotopotó minamó nenazo, Izesú eza Zelusalega vitove loko likumú goselé kepelekago alími milamago, ⁵⁴ s izegipala zuhagutí Zemusiko Zoniko keza nene suni ánigikasike láa liki li amesimó: Guivahanitemaka, leza lokuko okulumakutí lolímó lemeko imane ve kepele gesá itive loko nogelepe. ⁵⁵Liki likasigo, Izesú mino viligoake gahá kimimó. ⁵⁶Gahá kemeake haitó apatoka makó vamó.

Izesuni ámegetanigi mini viliga vegená

(Mat 8:19-22)

⁵⁷Gapoloka nivago, ve makolímó Izesuni lo amike vitanitoka vitanitoka nene neza gémege gémege oko minanogo uve. ⁵⁸Loko lokago, Izesú láa

⁴ 9:46 Luk 22:24 ^r 9:48 Mat 10:40; Luk 10:16; Zon 13:20 ^s 9:54 2 Kug 1:9-16

loko lo amimó: Mikasi koló onoikú nene gahate itiaká niave, itó namatini numúini nemóza, okulumakutí lumu ve gihila neza akato numuníne itó gotóneló za nomigo vitagá noumó nenazo, makó vitíive loko nolape. ⁵⁹Loko loake, ve makó nene geza oko némegetozo. Loko lokago, eza láa loko limó: Guivahanínemaka, geza gelekako nene, neza minoko améneho helekiko vinake gale zemikinake gémegetatove. ⁶⁰Loko lokago, Izesú láa loko lo amimó: Hilinita vevená gale zikimiaká hoza nene kigika heleneiti vevená kezagi ámina hoza alitamó neve. Géisi nene voko Ómasímini gizapaló minoakalímini gako lo utó oko lo kemezo. ⁶¹ Loko lokago, makolímo láa loko limó: Guivahanitemaka, geí gémegetanogo noumóza, voko není numukú nia vevenáma kemesosoka lokinake gémegetatove. ⁶²Loko lokago, Izesú láa loko lo amimó: Ve makolímohe makolímohe není hozagutí mino viligatimó nenémo Ómasímini gapogú hoza alitimoláa nomive, loko limó.

Ve 72 monó hozaló vamó

10 ¹Lá okago, Guivahanímo ve 72-a kelémo etó oake, gona moloko losi losi iki ale goí iki vitave loko alika ezáa vinogo noi apatoka numutó namató kimisilimó. ² Lá noike aí vevenala zuha lilí inigi nia vevenakumú anoza gako makó láa loko lo kimimó: Mikú nosánetá mukí omolokamóza, hoza aleaká vevená lagasó minokunize. Nenemú lekeza mini hoza amelahitoka likiko nene hozaló vevená makó kimiselekiko hozavagú viki minumuni alitaze. ³ Lekeza vilo. Gilinahe, hela galagitana mina vevenalitini holúikú nene likigikagú geha ziki sipsíp izagitana minatave loko lekélí nolikimisuluve. ⁴ Lekeza vinigi niki, moni géueaká gó itó akiseaká gó itó likigisaló suú alemiki lekeza gapoló niviki miniki aliki amiki amuza miliki vilo. ⁵Numuni makokú itinigi niikima numuni amelagini mulutikú hulu oleketino liiki itilo. ⁶Ámina numukú hulu ve makó noitimó nene, hulumú lina gako nene aitoka gihila zitimóza, nenémini ve noamitimó nene hulu gako mímini gihiláa nene lekelitoka goha atiginá oko anogo ive. ⁷ Ve makolititoka hoza alita vevená nenete ámina vegutí nosánetá aliki niki minatamó nene lamaná itimó nenazo, numuni makokú itiikima ámina numukú mini-liki niviki meinavatini nosánetá zahí nagamí likimitamokó nene niki minalo. Lekeza haitó numukú itemiki numuni hamokukó minalo. ⁸Apá makokú niviko, ámina apá amelage likilími milikoma lekeza nosánetá likimitamokó nene niki niminiki ⁹kivisi vevená nene kilími zokiki láa liki li kimilo: Ómasímini gizapaló minoakalímini zámuza nene lokovogisaloka okave. ¹⁰Itó apá makokú niviko, likilími lamaná amikoma, lekeza viki gapoló otiniki láa liki li

¹ 9:61 1 Kug 19:20 ² 10:2 Mat 9:37-38 ³ 10:3 Mat 10:16 ⁴ 10:4-11 Mat 10:7-14; Mak 6:8-11; Luk 9:3-5 ⁵ 10:7 1 Koli 9:14; 1 Tim 5:18

kimilo: ¹¹ʸ Lekelí apakutí mumusopa ligisalo gímizeneimó nene lekelikumú vahé moloko atilí nounge. Lá nounimóza, gakó imane gili minalo: Ómasímo gizapa oleketatimó nenémini zámua nene lokovogisalo omo alitokago ániǵi ahulikave, liki li kimilo. ¹²ʒ Neza gakó lo likimitoze, gililo. Gamena napaló nene Soto apakú mina vegealite golesa mogonáinimú goní koma itamóza, likilími lamaná amita vegealite goní sipisi inigave.

Kigika ali viligama vegealite miluma sipisi gilinigave
(*Mat 11:20-24*)

¹³Agae, Kolazina amelagita, itó Petesaita amelagita, lekelitoka golivagi netá utó inogo ive. Alévolé suni lekelitoka loló umó nene golesa netá aliaká a vegeaná miniaká a apá Tulo apatoka itó Sitona apakú utó ilina, keza gozapá miluma giliki kigika ali viligamó nenémini mogonáa li utó iki ginegane litaha ali akiliki ló lana nene kugupeló hiliki minaline. ¹⁴Gamena napaló nene Tulo apakuki Sitona apakuki mina vegealite goní itamóza, lekeza goní napa genavagi inigave. ¹⁵Itó lekeza Kapanao amelagita, lugulizá okulumakú ititive liki ali otiaká niahe. Nenéminoko nomive. Zunigú lekehelú inogo ive.

¹⁶^a Loko loake, goha miní ameko izegipala zuha láa loko nokimisilike limó: Ve makó keza lekegepagutí gulupe liki gilitamó nene není negepagutí gakó gilinogo ive. Itó ve makó keza kemegesa likimitamó nene, kemegesa nememó gilitimó neve, itó kemegesa nimitamó nenete nimisili ve kemegesa amemó gilitimó neve.

Ve 72 atiginá amó

¹⁷Láa loko kimiselelago, viki miniake, goha ake mulúikú agila guluma igo kogoliza viziki láa liki lamó: Guivahanitemaka, geí gakotó nene holosi golesa nenete kezagi gili limiki golisi iaká niave. ¹⁸Liki likago, Izesú láa loko lo kimike limó: Satá eza gó vejitana oko okulumakutí lemekago ániǵokuve. ¹⁹^b Lekeza gililo. Neza zámua lekemekugo lekeza gosiható itó akohú oaká gosihakitana netató lisatamó itó lelí lova gala ve Satani zámuzalaló nilisikoma nenémo lekepeleminogo ive. ²⁰Lá onoimóza, holosite lekelí gakó gili aliaká niakumukó giliko itemiko, lekeza Ómasímini mututoni minakumule loko lukugulizá nene okulumakú gizonoimó nenemú lokogoliza viziki minalo.

Izesú agoliza vizimó
(*Mat 11:25-27; 13:16-17*)

²¹Loko loake áminasitó Ómasímini Sikalahulímo agika alémo vávani noigo, mulunagú ló guluma noigo láa loko limó: Aménege geza

^ʸ 10:11 Apo 13:51 ^ʒ 10:12 Mat 10:15; Apí 19:24-28; Mat 11:24 ^a 10:16 Mat 10:40; Mak 9:37; Luk 9:48; Zon 13:20 ^b 10:19 Age 91:13

okulumalímíni mikasímíni Guivahani géisigó nene noane. Sukulu lunike gele vevesokune liki liaká nia vejená keza giliki gili guni ikatave loko monó imane ale halá geko molokanike sukulu lamake izegipa namunigitana iki mina vejenalitini kigikagú molokimiaká noanikumú gegepoka noluve. Aménegamaka, geza nene nenéminoko utó oloko vitive loko gelekako nene etoaká noive. ^{22c} Loko loake, miní ameko láa loko limó: Améneho netá mukí nene nigizakú molo asú okave. Itó ve makolite Ómasímíni gipala noutímíni mogona gelemave. Améneho ezagó geleneive. Itó ve makolite aménehini mogona gili vevesamave. Neza gipaka noumó itó nezáne lo utó oko lo kemekugo ániigi hehe litave loko gilito vejená niamó lezategó aménehini mogona gelenoune.

²³ Loko loake, izegipala zuhaloka mino viligoake keikó Izesú láa loko lo kimimó: Ómasímó nónohá zelikimikago lekeza lokogómulatunú netá imane ániigi vevesikave. ²⁴ Neza gakó lo likimitoze, gililo. Gozapá Ómasímíni agepagutí gakó liaká a vegi kugulizaki ve napagi nenete oko moloko nou netá lekeza ániigiaká niamó nene ániigatune liki gelemóza, ániigamómoma neve. Itó lekeza negepagutí giliaká nia gakó gilitune liki amóza, gelemamómoma neve.

Samalia ve lamanalímíni gakola

^{25d} Loko lokago, monó mogona apí-okimiaká ve makolímó oteake Izesuni amekú moloko láa loko loká otake limó: Monó gizapa velemaka, neza nana okinake alévolé nemetameni alitohe. ²⁶ Loko li gakotó nene Izesú lo amike limó: Mosé nanave loko lo hukoleketave. Geza nene gakó nanave loko gatoko gelene. ^{27e} Loko lokago, eza láa loko limó: Geza gigika gemeni zámuzaka itó geleakaka mukí nene Guivahani geí Ómasiloka lehizetozo. Itó gezakamú geleaká noanimómáminoko gigivekaginimú geleko gigika kemezo loko luhuva gizonoimómoma neve. ^{28f} Loko lokago, Izesú láa loko lo amimó: Lo nogumu gakotó lo vevesoko lokane. Lani gakotó amegesa molokogó loló itanimó nene alévolé oko minanogo ane.

²⁹ Loko lokago, ámina ve nenémo ezáa mogonala hize lé inogo Izesuni loká otake láa loko limó: Nigivénege keza éage niave. ³⁰ Loko lokago, Izesú láa loko lo amike limó: Ve makó eza Zelusalega ahuloake Zeliko numutoka nolimigo laskoli vete gapoló apiliake lavolavo gola netá matala mukí gumina iki aliki vikago, hilinogo gapoló ako minamó. ³¹ Lá oko akonoigo, Ómasi guguni gizoaká ve makó nene ámina gapoló novike ániigamó nene hilinogo akonoigo zová zeko avilegeko vimó. ³² Vokago, ámináminoko monó zagusaveú hozaló ve Livaini agapilamokutí makó

^c 10:22 Zon 3:35; 10:15 ^d 10:25 Mat 22:35-40; Mak 12:28-34 ^e 10:27 Gapo 6:5; Liv 19:18 ^f 10:28 Liv 18:5

nenémo áminaloka oake ánigamó nene lá oko akonoigo, áníhoake zová zeko avilegeko vimó. ³³Vokago, Samalia vegi Zuta vegi apiziki minamómoma nemóza, Samalia ve makolímo ámina gapoló novike apili ahula vema akonoitó oko áníhoake, muluna githiná okago, ³⁴noitó vike apelego golani imómaló nene hilinagi vain nagamiki holomiake asapú omiake, alémo oteake toki izavámíni amegesaló ahulomiake vike veno vegeñalitiní numukú itesike nasahilí otamó. ³⁵Akikasike gó lokago ámina ve vinogo noike veno vegeñalitiní numuni gizapa ve nene kina lositá namike limó: Geza imane ve gizapa lamaná otozo. Lá noako moni gumumó nene asú okikoma neza goha inake gimitove, loko limó. ³⁶Nenemú geza nanave loko nogelene. Ve losive makole akutí nene laskoli vete apilikago gapoló ako mina vemámíni agivelaho hí ve minamó neve. ³⁷Loko lokago, monó mogona apí-okimiaká vemámo láa loko limó: Miluma gelemiake alémo lamaná i veve. Loko lokago, Izesú nene géisi voko áminámíni ozo, loko lotamó.

Malatako Maliako Izesuni alesa mili amesimó

³⁸ Lomiake, gapoló nivake apá makokú anitemó. Nene apakú vená makó minamó agulizá Malatá eza Izesuni alémo numunagú molokago, ³⁹mohó agunala agulizá Maliá eza nene ake Guivahanímini agisauka minake aí gakó geleko minamó. ⁴⁰Lá noigo, Malatá eza nosánetá ale vavá i hozamú muluna itimó. Lá oake, Malatá vike Izesuni láa loko lo amimó: Guivahanínemaka, mohó nugunáne Maliá nene ahulonimikago nezánegó nosánetá ale vavá noumó ánigamape. Lo amekako, oko hozaló nelémo vatí itive. ⁴¹Loko lokago, Guivahanímo lo amike láa loko limó: Malata, Malata, geza gagata gululusi nogelenike muluka itekave. ⁴²Geza netá hámakokumú gelezo. Maliá nene netá lamanaláa ale gizaká ike nenitokatí zámuza alekave. Nenémo aitoka gihila zekiko makolímo agizakutí ipá aminogo ive, loko limó.

Izesú Ómasiloka loakakumú lainim-oketa gakó

(Mat 6:9-15; 7:7-11)

11 ¹Gamena makó zupa Izesú nene apá makotoka Ómasiloka loko lo asú okago, izegipala zuhagutí makolímo láa loko lo amimó: Guivahanitemaka, Zoní nene izegipala zuha Ómasiloka litave loko lainim-oketoaká i netá aleko lainim-oletozo. ²Loko lokago, Izesú láa loko lo kimimó: Ómasiloka niliki nene láa liki lilo:

Ametega, geí gugulizá etó oko minatize. Numutó namató geí gizapaló minoakalímíni zámuza utó o asú ino. ³Geza gamena gamena nosate lemezo. ⁴Leza ligivetegini lihima nekisáini ale

ahulokimiaká nounimó nenémimi oko lihimate ale ahuloletozo.
Geza gimilegú moloaká netakú lelémo molamo.

⁵Loko loake, láa loko lo kimimó: Lekelikutí ve makolímo nene holugú akovevé zogovámimi numutoka voko sele loko zogone geza peleti losive makole nemezo. ⁶Zogone makó nene gapoló ake ake není numukú itínasa okago, nosáneta koma amitomó nomigo loká nouve. ⁷Loko lokiko, zogova nenémo numukutí nene leza gahe gekunike vená izegipánegi akonouhakú goseleka lamo. Neza otekinake netá makó gememinogo uve. ⁸Loko litimó nene, neza láa loko lo nolukumuve. Eza není zogone minokagove loko oteoko netá makó amemitimó nene, maga ve nenémo sele lova lova okiko, eza oteoko vitagá noi netáma aminogo ive. ⁹⁻¹⁰Nenemú láa loko lo nolukumuve. Ómasiloka voká liaká niamó nenete netá mota aliaká niave. Vitagá iaká niamó nenete netá gihila ali utó iaká niave. Itó gaheló hoko-hoko likago gahe koló okimiaká noive. Lá onoinazo, lekeza Ómasiloka voká liikima ámina netá alinigave. Vitagá iikima netá gihila ali utó inigave. Gaheló hoko-hoko nilikoma gahe koló oleketanogo ive. ¹¹Lekelikutí ve makolímini gipalámo lagahamú voká lokiko nene amelaho gosihá amitihe. ¹²Itó okoloho mulamú voká lokiko nene akohú gosihakahá amitihe. Lá aminogo ive. ¹³Nenemú lekeza vejená golesa neneta izegipatini gizapa lamaná ikitake netá lamaná ali kegepa iaká nianazo, okulumakú ametipo nene voká lita vejená nene aleko iteko Sikalahula lehizeleketanogo ive, loko limó.

Izesuko Pelezepuloko
(*Mat 12:22-30; Mak 3:20-27*)

¹⁴Gamena makó zupa nene ve makolímini agepa ale lakolí okago mina holisi nene Izesú apeleko amiselekago, vokago, agepa apizi vema nene agepa á oake gakó akó limó. Lá okago, vejená keza sigaga lamóza, ¹⁵^h lugáate láa liki lamó: Holositini agulizaki ve Pelezepuló loko noi vémo alémo vatí noigo holosi kepeleko kimiseleaká noive. ¹⁶ⁱ Liki likago, lugáate amekú milake loká itake okulumakutí alévolé suni makó ale utó okako geí mogonaka ánigatunize. ¹⁷Liki likago, Izesú kigikámimi gakó hanuva geleake láa loko lo kimimó: Mikasi makokú vejená hizi hoú liiki lova gopa hizitamó nene keí mikasi nene gámekó minatimóma neve, itó numuni makokú vejená keza hizi hoú liiki eza akohú apiliko eza akohú apiliko itamó nene ámina numuni ahuliiki hutilí iki vinigave. ¹⁸Lekeza nenikumú nene Pelezepuloni zámuzatunú holosi kepeleko kimiseleaká noive liki liaká niamóza, Satá nene ezáa izegipala zuhagi hizi hoú latamó nene af gizapaló minatamoláa nene nana iki alévolé iki minatave. ¹⁹Nenikumú nene Pelezepuloni zámuzatunú holosi golesa kepeleko kimiseleaká noive

^h 11:15 Mat 9:34; 10:25 ⁱ 11:16 Mat 12:38; 16:1

liki liaká niave. Láa likima lekelitini izegipatini zuhate nene ámina iki Satani zámuzatunú holosi golesa kipiliki kimisiliaká niave liki litahe. Óe, láa liki lamitamó nenazo, kéisi soza gakotinímini mogonáa hanuva ali utó itamó neve. ²⁰Lá onoimóza, neza Ómasímini zámuzatunú holosi kepeleko kimiseleaká nounazo, Ómasímini gasovaló minoakalímini zámuzá nenémo lokovogisaloka mota omo ávatiha okamó nenémini mogona mota utó okave. ²¹Satá eza gasovagi ve amuza ve minooko gimisi magé aleoko numuna gizapa itimó nene, netá matala mukí nene avasavagi minanogo ive. ²²Lá itimóza, neza alévolé ve noutímina nene okoko ámina ve lova ale ameko aí aviligitomó nene, gimisi magé gele alévolé i netáma ipá oko vejená makó gona moloko kimitove. ^{23j} Itó makó keza nenikutí vejená minamitamó nene, není gala vejená ninigave. Makó keza nilími vatí iki vejená kilími nenitoka amitamó nenete kilími hutilí iaká niamó gelekave.

Holosi golesa atiginá iti gakó

(Mat 12:43-45)

²⁴Holosi makolímo ve makolímini agikagutí iteoko nene avasú vizeko minati numunimú vitagá inogo osagava apató voko mohona itive. Vitagá oloko novoko neza numúne ahulokuke umóma nenazo lokoko mohona oko vitagá itimóza, nomiko neza goha áminagú atiginá oko vinake minatove loko agata geleoko ²⁵atiginá oko voko ánigatimó nene ámina numuni agika nene lolopa gitiki ali guni ikiko itó gizapa ve makó noamiko ánigatimó nene, ²⁶eza goha ahulooko voko holosi agivelagini 7-ía kugupelotí sisipa anuva ovimoláa kelémoko oko nene áminagú miniki aliki inigave. Lá ikiko ámina ve goí oko golesa oko minamóza, íi alika nene golesa o lamaná oko golesa inogo ive. Ve golesa áimane lekelitoka utó itikumú noluze, ehe tináneve.

Ómasímo lamaná nónohá zeketonoi vejená

²⁷Loko noligo, ve venalitini holúikutí vená makó minamó nenémo Izesuni sele like láa loko lo amike limó: Vená makó nenémo geí getoake aminí gemeneimó nene Ómasímo lusa getonoimóma neve. ²⁸Loko lokago, Izesú láa loko limó: Láa loko lanimóza, Ómasímini gakó giliki Ómasímo li gakotó ámegetiaká nia vejená nene Ómasímo nónohá zeketonoiimóma neve.

Vegená golesate alévolé suni ánigatune liki lamó

(Mat 12:38-42)

^{29k} Loko loake, vejená sii sii liki alegesá niago, Izesú miní ameko láa loko lo kimimó: Oko moloko oaká nou netá ánigiaká nia vejená

^j 11:23 Mak 9:40 ^k 11:29 Mat 16:4; Mak 8:12

nene vejená golesa minikave. Keza alévolé suni makó ánígatune liki liaká niamóza, haitó suni makó ale utó ugo ánígaminigave. Zonatoka emane utó i sunigitana makó utó iko nenegó áníganigave. ³⁰^l Zoná nene lagaha sipisimámmini agikagú lemeko gamena losive makole minake heleaká gapogutí goha oteake Ninive vetini kovogisalo ámina sunimú lo utó o kimimómámmini oko okulumakutí lumu ve gihila neza imaneló vejenalitini kovogisalo není anosa ale utó oketanogo uve. ³¹^m Ómasímo gona mololeketati gamena nene Sepá mikasiuka agulizaki vená minamó nenémo oteoko imane gamenaló nia vejenalitini mogonáini lotuva legekiko lihima napa alitamó oko nene neve. Ámina vená nenémo nene agulizaki ve napa Salomóma mukí netá mogona gele vevesoko gilimómámmini gihiláa gilinogo mikasi hotokatí gapo hána hána amó. Itó nénisi ató imane Salomoni koma avilegeko noumóza lekeza není gakó gilisá amave. ³²ⁿ Ómasímo gona mololeketati gamena nene Ninive apá amelage otiki oko moloko oaká nou netá ánígiaká nia vejenalitini mogonáini lotuva liginogo ive. Lotuva legekiko lihima alitatokó oko neve. Nene hanuvamú nomive. Zoná nene monó lo nokimigo Ninive apá amelage kigika ali viligamó neve. Itó nénisi ató imane Zonakitana oko minonamuve. Zonani avilegenoumóza, lekeza gakóne gili ahuliake likigika ali viligamamó neve.

Lugupémmini ló liví

(Mat 5:15; 6:22-23)

³³^o Hí vémo ló liví legeoko holoma sepekú molatimó neve, itó somotunú gahumá itimó neve. Lá oko nomive. Liví nene legeake numukú itita vejená hize hanatoketative loko holomaló molosá neve. ³⁴Itó gogómula nene gugupémmini ló liví neve. Gogómula nenémo mumuzó oakalímmini gapogú gelémo molamitimó nene, Ómasímmini lapaná nenémo gigikagú hize hanato asú itimóza, gogómula nenémo gelémo golesa itimó nene, gugupeló itó gigikagú límugusi ze minanogo ive. ³⁵Nenemú gigikagú Ómasímmini liví lonoimó nenémo lihokiko límugusigú minokatanize, gizapa lamaná ozo. ³⁶Gigika makotoka límugusi zemoko hanato asú onoiko, ló livilímó hize hanatogetatimó nenéminoko gigika hanatokogó minanogo ive, loko limó.

Izesú Palisaio monó vemuki monó mogona apí-ikimiaká vemuki alévolé oko lo hukonoimole

(Mat 23:1-36; Mak 12:38-40)

³⁷Izesú láa loko lo asú noigo, Palisaio monó ve makolímó nosánetakumú alesa molo amimó. Lá okago, Izesú nene numunagú

^l 11:30 Zna 3:4 ^m 11:31 1 Kug 10:1-10; 2 Iki 9:1-12 ⁿ 11:32 Zna 3:5

^o 11:33 Mak 4:21; Luk 8:16

iteake nosánetá makó niki minasimó. ³⁸Ámina Palisaio monó ve nenémo Izesuni ángamó nene, Zuta vetini suni aleko agizani nagamí zemike nosánetá hanuva nonago ángoake, etami suni nalive loko geleake, ininá oake agata gululusi gilimó. ³⁹Lá noigo Guivahanímo láa loko lo amimó: Gelezo. Palisaio monó ve lekeza lape somogitana iki niave. Lekeza nagamí goni itó lape hetolaloka nagamí ziaká niamóza, likigikagú guminaló suni itó haitopaitó netá golesa nenémo vaí onoive. ⁴⁰Lekeza ve negi ve lamaná niave. Ómasímo netá hetoláa itó agikáa hamó lelegitó loló okamóma neve. Nene gelemahe. ⁴¹Likigikagutí vejená nasahilí ikitatamó nene, likigika viheletokogó minanogo ive.

⁴²^p Lekeza Palisaio monó ve ehe tináneve. Lekelí mikutí mapánuha ekipá anuva lamanaki netá itó netá makó haitopaitolímíni 10 10 nekutí nene hamopamó aliake Ómasi amiaká niamóza, lekeza nene hehe loko hamó lelegitó vejená gona moloakalímíni itó likigika Ómasiloka moloakalímíni nene ahulikave. Lekelí netá matá 10 10 nekutí Ómasi amiakalímíni nene ahuloakaláa nomimóza, imane netá napa nenegi hanuva loló oakalímíni neve. ⁴³Lekeza Palisaio monó ve ehe tináneve. Lekeza monó numukú numukú nene vejenalítini kovogisaló minoaká siató minatune liki giliaká niave, itó lekeza maketiloka mukí vejená nenete geké lilitatave liki giliaká niave. ⁴⁴Lekeza ehe. Lekeza gonosi milimili halá geneimó nenéminiki niave. Áminaló vejenalite mihina niake likigikagú lili okave liki gilísá amave.

⁴⁵Loko Izesú lokago, monó mogona apí-okimiaká ve napa makolímó lo amike monó gizapa velemaka, geza láa loko nolanike lelikumuki gahá nolape. ⁴⁶Loko lokago, Izesú láa loko limó: Oo, lekeza monó mogona apí-ikimiaká ve, lekeza ehe tináneve. Lekezatini li mila gakó nenémo genavagi loló okago vetini kigínagú gihikimiaká niago, keza silipa iki gihiaká niamóza, ámina genavagi netá nene lekezatini likigizani hisúinitunú kilímí vatí itigí iki ma alísá amave. ⁴⁷Lekeza ehe. Lekeza avotike Ómasímíni agepagutí gakó liaká ve kipili hilina vetini gonosi milimili numuni lamaná lilí iake gonanalisi ikimiaká niave. ⁴⁸Lá niago, lekeza avotike iki miliki iaká amoláa hizi lé iaká niamómámíni mogona utó okave. Avotike keza Ómasímíni agepagutí gakó liaká ve kipili hilikago, lekeza keikitana niake gonosi milimili numúini lamaná lilí ikimiaká niave. ⁴⁹Nenemú Ómasi eza gele vevesoaká noi ve nenémo láa loko lonoimóma neve: Negepagutí gakó liaká vegi aposologi kimiselekugo, viki niiko, lugáa gopoguni milikimiiki lugáa kipili hilinigave. ⁵⁰Loko lonoimó nenazo, mikasi gena oake mino-loko iteko novigo, Ómasímíni agepagutí gakó liaká ve nikepelego golani lekemó nenémini lihima nene imane gamenaló nia vejenalítini kumupiló ite

asú inogo ive. ⁵¹ ^q Neza lamaná lo likimitoze, gililo. Atani gipala Epoloni apele nohiligo golani leki gamenalotí Ómasímini agepagutí gakó liaká a vejená lugáa kipili hililiki nivago golani lekikago, Zakaliá eza Ómasi guguni gizi amiaká itagi etó onoi numunigi holutó noigo napelego golani lekímó, keí golanímini lihimavala nene imane gamenaló nia vejenalitini kumupiló itinogo ive. ⁵² Lekeza monó mogona apí-ikimiaká ve, ehe. Lekeza gakó gele vevesoaká gahémini kiila aliki vikave. Lekezatini áminagú itemake, vejená makó itinigi niago gapo hizi lí ikimiaká niave.

⁵³ Loko loake, numukutíma nolimigo, monó mogona apí-ikimiaká vegi Palisaio monó vegi keza gakotunú Izesuni lova ali aminigi gakó loká loká itamó. ⁵⁴ Izesú gakó lo gopa okiko goní otatune liki aí agepaló gizapa iki minamó.

Izesú soza sunimú kagata alimó

(Mat 10:26-27)

12 ¹ Lá niago, vejená makó iki kugupeló kugupeló iki sii sii liki alegesá ikago, Izesú nene izegipala zuhaloka láa loko lo kemeneike limó: Palisaio monó ve nenete sozaló vetini suni aliki iki miliki iaká amó nene ekesá netá neve. Lekeza nenemú ehe, gizapa ilo. ² ^s Hitonoiti netá nene utó o asú ititokó neve. Itó asuguná iki lilí ina netá nene utó okiko vejená mukilite gilinigave. ³ Lá niiki holugú límugusigú gakó legesó iki linamó nene hanatoka likiko mukí vejenalite gili asú inigave, itó lekeza numuni agikagú gakó musika linamó nene numuni hetotí gakó napagutí li utó niko gilinigave.

Lehelele viziti ve lelepizimó

(Mat 10:28-31)

⁴ Nigivénegita, lo likimitoze, gililo. Vegená makolite lukugupegó apili hilinigave. Alika netá makó lilí ilikitatamó nomitimó nenazo, lá ita vejenakumú lekelegesá legemino. ⁵ Lá onoimóza, lekehelele viziti ve makó lekelepizitove. Ómasi eza lukugupe apele helekoko ló apakú lekehelú o ahuloaká zámuzagi ve noive. Neza lamaná lo nolukumuze, gililo, aikumú lekelegesá ligino. ⁶ Somohá nene ha netá nianazo, golohá moni lositatunú nama somohá ligizani lugaloka asú igo meina hizemosaláa neve. Lá onoimóza, Ómasi nene nama somohá makokumú ma agatí molosá amive. ⁷ Lekelí gototini zopovatini gatoakaláa nene Ómasímo gele asú oko geleneive. Itó lekeza nama somohá niamave. Lekelisi nene vejená nianazo, itó Ómasímo gizapa olikimiaká noinazo, nenemú netá makokumú ma lekehelele vizemino.

^q 11:51 Apí 4:8; 2 Iki 24:20-21 ^r 12:1 Mat 16:6; Mak 8:15 ^s 12:2 Mak 4:22; Luk 8:17

Izesuni izegipala zuha nounge loko lo utó oaká itó zeko hitoaká
(*Mat 10:32-33; 12:32; 10:19-20*)

⁸Neza lo likimitoze, gililo. Vegenalitini kovogisalo ve makó keza neni nugulizá li utó iki nilími napa itamó nene, okulumakutí lumu ve gihila neza Ómasímini agelogini kovogisalo ámina oko kelémo napa oko linogo uve. ⁹Ve makó keza vetini kovogisalo nenikumú zivi hitivi itamó nene, neza ámináminoko Ómasímini agelogini kovogisalo keikumú zevo hitovo itomóma neve. ¹⁰^t Itó makó keza okulumakutí lumu ve gihila nenikumú alivi letivi itamó nene, Ómasímo ámina lihimavala ahuloakaláa nene nemóza, Ómasímini Sikalahukumú alevo letovo oakaláa nene, Ómasímo nenémini lihimavala ahuloakaláa nomive. ¹¹^u Itó monó numúikupe monó gizapa vetini itó kugulizaki vetini kovogisalo pe goní nilikitikoma, konotó aleko nana gakó litupe itó nanave loko litupe liki lakagata giliko gena amino. ¹²Ámina gamenalóisi lekeza lita gakó nene Sikalahulímo lo lekeme lekeme noiko li kimitamó nenazo, lekeza mulutini itemino.

Negi henonagi vemú anoza gakó

¹³Loko lokago, alegesá iki mina vegenakutí ve makolímo Izesuni lo amike láa loko limó: Monó gizapa velemaka, geza uvónehini lo amekako, ametehe nene helisa henoni mololetamó nene gona moloko lugáa nimitive. ¹⁴Loko lokago, Izesú láa loko lo amimó: Vémage, helisa henonimú gona mololeketatane loko itó gonikumú lo hukoleketatane loko éaho nelémo etó okago nolane. ¹⁵Loko loake, vegená láa loko lo kimimó: Lugupémini henoni vaí oko minatimó nenémo ligikámini henoni ale utó amitimó nenazo, áni go lukumu heleaká netakumú gizapa ilo. ¹⁶Loko loake, anoza gakó makó láa loko lo kimimó: Moni henoni vaí oko mina ve makolímini mikasi nenémo nosánetá vaí oko ale utó imó. ¹⁷Ale utó okago, mulunagú nene ale moloaká numukú nene nosánetá vaí okanazo, nosánetá lugáa nene nana itove. ¹⁸Loko geleake, láa loko gilimó: Nosánetá ale moloaká numunima lukokinake napa napa gitove. Lá okinake nosánetánegi netá matánegi nene ámina numukú ale molatove. ¹⁹Ale molokinake, nezánemú láa loko litove: Nezáne netá matá vaí oko minokamó nenazo, asú amiko melekeni mukí oko vinogo ive. Nenemú navasú vizinake nosánetá noko zahí nagamí noko nogoliza vizeko minanogo uve. ²⁰Loko gelekago, Ómasímo láa loko lo amimó: Negi ve neneka, itína holugú geí sikalahuka alekugo hilinogo ane. Lá okiko nosánetá henokanoka ale molanimó nene hutilí inogo ive. ²¹Loko lo amitimó nenazo, netá matá vaí oko minati ve makó eza Ómasímini agómualaló gohogó ve minatimó nene, ámina suni aitoka utó inogo ive.

^t 12:10 Mat 12:32; Mak 3:29 ^u 12:11 Mat 10:19-20; Mak 13:11; Luk 21:14-15

Mulute iteaká gako*(Mat 6:25-34)*

²²Loko loake, izegipala zuha láa loko lo kimimó: Lá onoigo láa loko lo nolukumuve. Lekeza miniki aliki itakumú nene nosánetá hikutí noko minatupe itó ginegane nene hikutí ale akalatupe liki mulutini itemino. ²³Nosánetá nene netá gihila nomive. Lekelisi miniki aliki itamó nenémo netá gihila neve. Itó lukugupeló ginegane nenémo netá gihila nomive. Lukugupe nenémo netá gihila neve. ²⁴Namamú lakagata giliki gili vevesalo. Keza netá matá zuhá isá amave, itó minumuni o molokago nosánetá nene numúikú ali nupa iki nisá amave, itó nosánetá ali milata numuni gisá amamóza, Ómasímogó nosánetá gopa ale utó o kemeaká noive. Itó lekeza nama minamave. Vegená nianazo, itó nama mukí nene limiki niago lekeza itiki niamó nenazo, Ómasímo netá matá hanuva ale utó mololeketatimó nena. ²⁵Lekelikutí makó éaho muluna noitiko minoko aleko ititó nene ezáa agata geleko kilisimasi makó miní ameko molomo iteko minative. Ma nomive. ²⁶Itó nene netá koma nemóza, lekeza ámina netá alisá amamó nenazo, netá makokumú nanamú mulutini iteaká noive. ²⁷^v Lekeza palauá guvava oko minoaká noimó nenémini mogona gili vevesamahe. Palauá kéisi nene hoza makó alisá amave, itó ginegane lamanatamanakó ali luhatakumú gó isá amave. Lá onoimóza, neza lo likimitoze, gililo. Gozapá agulizaki ve napa Salomó nene gonanalivagi netá ale luhoaká imóza, palauá nenete Salomoni agupeló netá aviligikave. ²⁸Palauá nene itínasa utó oake gó lokago gululupasokago hukiki ló giziaká niave. Itó Ómasímo lokago ámina palauá nenémo gonanalivagi netá ale koloaká noinazo, nenemú lekeza komasí gili alévolé inamó neneta ginegane nene Ómasímo hanuva ale utó oleketanogo ive. ²⁹Lekeza lakagata gululusi nigiliki leza nana netá natunimó neve, itó nana zahí nagamí natunimó neve liki mulutini itemilo. ³⁰Keza numutó namató monóini nomi vegená nenete ámina netakumú kagata gululusi giliki vitagá iaká niave. Lá niamóza, ametipo nene ámina netá lekelitoka minamitimó nene minamitave loko geleneive. ³¹Lekeza ámina netakumukopa Ómasímo gizapa vetini loló iti gapogú likigika lakagata gof iki miliko vo minino. Lá ikiko nene, lukugupémini netaki nene hagitana lehizeleketanogo ive.

Okulumakú henoni ale nupa oaká gako*(Mat 6:19-21)*

³²Lekeza vegená lughá nupa inamó neneta lekehelele vizemino. Ametipo gizapa omiaká noi netá matá mukí lehizeleketanogo agoliza

^v 12:27 1 Kug 10:4-7; 2 Iki 9:3-6

vizeko nogilive. ³³Nenemú nene henokanotini salimiiki áminalotí meinava moni aliiki gohogó vejená kimilo. Lá iiki moni gúeaká gó haitolímíni hulupa lamitímíni alilo. Lekeza lá iki okulumakuka asú amiti henoni ali nupa itamó nene, neneló guminaló vete mihina aminigave, itó gúnakonímo hutamítimó neve. ³⁴Henokanotini lamaná neti apatoka nene, likigika neinogo ive.

Gelekelé izegipate gizapa iki minata gakó

³⁵ ^w Lekeza lavolavo gotini ali likiiki gohatitó leti ziiki lamu ló ligi miliiki ali nené iki minalo. ³⁶ ^x Ve makó keza gizapa venini nene vená alimi ame gamenaló amisi gitatotí numutoka atiginá oko atikumú ageva iki minake, eza oko gaheló okohá zekiko litá oko gahe segetatune liki gizapa iki minamó. Lekeza ámináminiki gizapa iki minalo. ³⁷Gizapa venini nenémo oko gelekelé izegipala nene akamiki gizapa iki minikiko ángatimó nene kogoliza viziki minanigave. Neza lamaná lo likimitoze, gililo. Gizapa venini nenémo okoko hoza aleaká lavolavo likeoko nosánetá iki miniki nalo loko lo kemeoko, ezáa oko nosánetá vatá oketoko gona moloko kiminogo ive. ³⁸Eza nene holugú akovevé ahe itó gó lomolomohe oko ángatimó nene, gelekelé izegipala gizapa iki niko ángatimó nené, keza kogoliza viziki minanigave. ³⁹ ^y Itó lekeza imanemú gililo. Numuni amelaho nene guminaló ve ati gamenamú gililina, guminaló vemule loko gizapa onoítimó nenazo, guminaló ve nene oko numuni zeko epetamítimó neve. ⁴⁰Ámináminoko okulumakutí lumu ve gihila neza negeva iki minamita zupa anogo unazo, lekezagi ali nené iki minalo.

Amegesa moloko Ómasi gelekelé otatuni gakó (Mat 24:45-51)

⁴¹Loko lokago, Pitá láa loko limó: Guivahanitemaka, anozá gakó lo nolemenimó nene lelikumukó nolape itó ve makokumuki nolane. ⁴²Loko lokago, Guivahanímo láa loko limó: Hozaló ve makó nene gele vevesonoko gele minatimó itó hozaváa nene amegesa moloko minati ve nene gizapa vevámo aí numukú netá matató gizapa oko minoko hozaló ve makó lugáa gizapa oketative loko lomikiko nosánetá nata gamenaló nene gona moloko kimiti vémini mogonamú lo likimitove. ⁴³Gizapa veva nene okoko ámina hozaló ve nene goí oko lotamómámíni oko hoza naliko ángatimó nene, ámina hozaló vemú giligo nene lamaná itimó neve. ⁴⁴Lá onoinazo, neza lamaná lo nolukumuze, gililo. Gizapa vevámo lá oko gizapa lamaná i vema nene mukí netató gizapa ve loló otanogo ive. ⁴⁵Lá itimóza, ámina hozaló ve nenémo není gizapa vema nene gamena hána minokaze, litá oko aminogo ive loko

^w 12:35 Mat 25:1-13 ^x 12:36 Mak 13:33-36 ^y 12:39-40 Mat 24:43-44

mulunagú gelekoko, hozaló ve vená makó lugáa kepeleká itó nosánetá nene hanuva noko minoká itó zahí nagamí noko itó ekesá nagamí noko negi nagí hizeko minoká itimó nene, ⁴⁶ámina hozaló vémini gizapa veva nene okoko ámina hozaló ve nene gizapa vevamú ageva oko minamiti gamena eza gatizá minati gamena okoko ámina hozaló ve nene agupe apelevo hukovo ooko amisele ahulokiko, hozamú mulúikú gili alévolé inamita vejená niakú voko minanogo ive. ⁴⁷Hozaló ve makólímo nene gizapa vevámini agepagutí gakó gelekoko netá ale vavá oko minamoko gizapa vemámo li gakotó amegesa molamitimó nene, gizapa veva nenémo vauva aleko napiliko goní hoza napa alitimóza, ⁴⁸hozaló ve makólímo gizapa vevámini agepagutí gakó gelemoko nogosani nati suni alitimó nene, gizapa veva nenémo hana okogó apilinogo ive. Ómasilokatí helisa henoni vaí iki alinita vejená nene Ómasímo ali atiginiki nimitave loko goha lokiko aminigave. Itó Ómasímo ve makó nene netá vaí oko kemeneitimó nene, ali atiginiki nimitave loko lokiko goha aminigave. Itó amemitamó nene, nana oketative.

Izesuni monokumú hize hóu latuni gakó

(Mat 10:34-36)

⁴⁹Neza mikasiuka ló gizoleketatove loko lemekumóma neve. Itó mukí vejenalitini golesa netáini ló gizatove loko itína lalina, mulúnegú lamaná gululíne. ⁵⁰ Miluma netá gihinitanigave. Veesá gihiniti asú inamiko mulúne gitihiná iko minoloko novugo alika gihinitanigave. ⁵¹Nenikumú nene imane mikasiuka nonagá ale utó itane loko lemekane liki nigelehe. Óe, lo likimitoze, gililo. Není monokumú hize hóu loaká netá ale utó inogo lumumóma neve. ⁵²Itína gamenalotí veletó nene numuni makokú vejená ligizani lugaloka asú igo nitamó nene, není monokumú hizi hóu liiki, ve losive makole nenete ve losimú nene gala ve lilí ikitanigave, itó ve losi nenetosa ve losive makolemú gala ve lilí ikitanigasive. ⁵³^a Lá iiki, lá iki hizi hóu lanigave. Amelahiko gipalago mini luga luga iki hóu lanigasive, itó izolahiko moholago mini luga luga iki hóu lanigasive, itó anohúvolahiko avolahiko mini luga luga iki hóu lanigasive.

Itína gamenámini mogona gele vevesoaká gakó

(Mat 16:2-3)

⁵⁴Loko Izesú loake, alegesá a vejená láa loko lo kimimó; Lekeza límusi makó ezegalokatí noitiko ániigiake, golini mota zinogo ive liki liaká niave. Láa liki linató nene gihila zeaká noive. ⁵⁵Itó okulumā nene anupakó utó noiko, ániigiake, hogaí napa lanogo ive liki liaká niató nene gihila zeaká noive. ⁵⁶Lekeza sozaló vejenáise, mikasímini mogona gona miliká itó okulumalímini mogona gona miliká iaká niamóza, itínasa gamena oko moloko noumómámini mogona nanamú gili vevesisá amave.

^z 12:50 Mak 10:38 ^a 12:53 Mik 7:6

Goní ogetati ve amekú molozo
(Mat 5:25-26)

⁵⁷Itó lekezatini nene mogona makó hee lo noitimoláa nanamú gona milisá amave. ⁵⁸Lá niake, ve makolímo goní ogetanogo goní numutoka gelémoko novoko goní napa ale heleaká veló gelémoko noviko, gapoloka makó niviki mulunagú hulu itive loko netá makó amitanize. Lá amoko áminagi aleloko gopa hanuva goní ale heleaká ve noitoka anititanimó nene, goní napa ale heleaká ve nenémo pilisi vetini kigizakú gelémo molokiko nagá numukú ahuligimikataze. ⁵⁹Neza lamaná lo nogumuve. Zunigú nagá numuni napagú minokoko lihimakámini meinaváa koma napa apaso asú amitanimó nene, áminagú ahulogimikiko mino-loko voko minanogo ane, loko lo kimimó.

Tolova ikatave liki likigika ali viligalo

13 ¹Ámina gamenaló neneló mina vejená lugáate Galilaia vejená makolitini gakoláa nene Izesuni láa liki li amemó: Keza Ómasímini guguni gizi namego, Pilató nene kepele nahulake Ómasímini guguni gizi ame netalímini golanigi keí golanigi ale gopánapa imó. ²Liki li amikago, eza konotó aleko láa loko lo kimike limó: Galilaia vejenakutí lá iki hele vejenalitinini lihimaváini napa napa nego lá iki kemeni vami gapo vikave liki nigelehe. ³Lá oko nomive loko lo nolukumuve. Lekelisi ámináminiki likigika ali viligamitamó nene, lekezagi lá ikigó tolova inigave. ⁴Itó Siloama apatoka numuni napa makó nene lemeko akake vejená 18 kepele hilimó nene, Zelusalega mina vejenakutí lá iki hele vejenalitinini lihimaváini napa minamole liki nigelehe. ⁵Lá oko nomive loko lo nolukumuve. Lekelisi ámináminiki likigika ali viligamitamó nene, lekezagi lá ikigó tolova inigave.

Zuta vejenalite kigika ale viligamosá nenémini anoza gakó

⁶Loko loake, Ómasímo Zuta vejenakumú goselé apilikumú anoza gakó makó láa loko limó: Ve makolímo nene gohuna za makó zuhá oake, minake, alika ake gihilamú vitagá imó. Oko ángamó nene gihiláa nomigo, ⁷mikú hozaló véa láa loko lo amimó: Ánigozo, melekeni losive makole oko novigo imane gohuna zámuni gihiláa liginogo umóza, gihiláa nomive. Mikasi nogozáa hanuvamú ale asú okatize, apele ahulozo. ⁸Loko lokago, mikú hozaló vemámo láa loko lo amike limó: Golohá venemaka, itína meketó mogonauka hoza aleko mikasi ale viligokinake, pulumaká izatini ase makó nene molatove. ⁹Lá okugo, alika kilisimasiló nene gihila zitimó nene, lamaná itive. Gihila zemikoma, apelezo loko lokako, apele ahulatove, loko live loko Izesú limó.

Holisigú helisala zová zi vená alémo zokamó

¹⁰Holisi makokú Izesú nene monó numukú iteake monó gakó lainim-oketamó. ¹¹Lá noigo, vená makó minamó nene holosi makó agikagú

noigo melekeni 18-ía oko novigo netá napa gizaleko minoaká imó. Lá noike, helisagi zová zekago, hee loko ote minamitimó imó. ¹²Lá noigo, Izesú nene áníhoake, gakó napagutí láa loko lo amimó: Vená geza givisi netá apasogimikuve. ¹³Loko nolike venámámini gotolaló agizanitunú nónohá zetago áminasitó litá oko ámina vená nenémo ote vevesoake Ómasi agepoka limó. ¹⁴^b Lá noigo, monó numuni gizapa ve napámo holisigú Izesú alémo zokakumú mulunagú golesa geleake, áminaló mina vejená láa loko lo kimimó: Hoza aleaká gamena nene 6-así nenazo, livisi vejená lelémo zokative liki nigilikima nene holisi gamenagú amiki hoza gamenagukó alo. ¹⁵Loko lokago, Guivahanímo láa loko lo amimó: Lekeza sozaló ve genezatini losigi minamó neneta, holisigú nene pulumaká izatini numukú viiki nagamí natave liki toki iza pulumaká izatini nene hoza aliki vinasiki kilímiki viaká niamó neve. ¹⁶Lá onoinazo, Zuta venáma imane nene Satá alémo golesa okago, noigo, melekeni 18-ía oko vimó nene avisi netalímini mogonáa nene holisi gamenagú apasotatomó etamihe. ¹⁷Loko noligo, gala veva nenetini kovoza napa hilimó. Lá noigo, ve vená mukí keza golivagi netá lamanalímini loló ikumú nene kogoliza vizeke geké lamó.

Masteti zuha netakumú anoza gakó

(Mat 13:31-32; Mak 4:30-32)

¹⁸Lá niago, Izesú láa loko lo kimimó: Ómasímini avogisaló vi hilata vejená nene nanáminiki niave. Nanetalímini amupiló ale moloko litove. ¹⁹Masteti gihila nenéminiki niave. Ve makolímo ámina gihila hamó alekoko minagú zuhá imó nene goloko iteake zagitana okago, nama nenete ake izanaló numuni gemóma neve.

Peleti lulu vizeaká netakumú anoza gakó

(Mat 13:33)

²⁰Loko loake, goha láa loko limó: Ómasímini lapanató vo holoakaláa nene nanetalímini amupiló ale moloko litove. ²¹Peleti lulu vizeaká netá nenéminoko neve. Vená makolímo nene peleti lulu vizeaká netá nene talam losigú polisigi ale gopa okago, hutilí okago, peleti nene lulu vize napa imó neve loko Izesú limó.

Gateni komagú iteaká gakó

(Mat 7:13-14, 21-23)

²²Izesú nene Zelusalega vinogo noike apá kománapagú vike, gakó lainim-oketomo mohona noike vimó. ²³Lá noigo, ve makolímo lo amike Guivahanínemaka, Ómasímo vejená luguhakó kugutó vizitihe.

^b 13:14 Gá 20:9-10; Gapo 5:13-14

Loko lokago, Izesú láa loko lo kimike limó: ²⁴ Gateni komagú itinigima lekeza helisatini ali alévolé iniki ititave. Neza láa loko lo nolukumuve. Vegená mukilite ititune liki gilitamóza, iteminigave. ²⁵ Lá niiko, numuni amelaho nene oteoko numuni gahe ze lí okoko gahe lopena hizekiko, lekeza hetoka otiniki gaheló okohá ziki sele liki Guivahanitemaka, gahe segeletozo. Liki likiko, neza lekélí ángo hehe lamuve. Hí numutotí vegená niave. ²⁶ Loko lo lekemekugo, lekeza láa liki li niminigave: Gezagi makó minunike nosáneta noko zahí nagamí noko nounike, geza nene lelí numute gapoló vanike numuteló monó gakó lainim-oletanimóma neve. ^{27^c} Liki li nimikiko, neza láa loko lo likimitove: Lekeza hí apakú vegená niahe loko gelemuve loko mota lo lekemekuve. Lekeza golesa netatokagó mihina amó neneta aló vilo loko lo likimitoze. ^{28^d} Loko lokugo, lekeza ángatamó nene, Avalahá Isaká Zakopó itó Ómasímini agepagutí gakó liaká a ve mukí nene Ómasímini gizapaló niiko itó lekezatini likimisele ahulokiko hetó niiki ángiiki ive nama iki miluma maluma giliki lekegepa atalá iki minanigave. ²⁹ Lá niiko, vegená ho noititokatí itó ho nolimitokatí ezegalokatí emegalokatí iki alegesá iiki Ómasímo gizapa okimiakató nosáneta niki kogoliza vizinigave. ^{30^e} Lekeza gililo. Itína gamenaló limiki mina vegenakutí makolite alika itiki minanigave. Itó itína itiki mina vegenakutí makolite alika limiki minanigave, loko limó.

Izesú Zelusale vegenakumú ive imó
(*Mat 23:37-39*)

³¹ Ámina gamenalóisi Palisaio monó ve makó iake láa liki li amemó: Geza imane apá ahulokoko vozo. Agulizaki ve napa Heloté gepele hilinogo ive. ³² Liki likago, eza hoza aleloko voko ale asú okoko alika hilitikumú anoza gakó láa loko lo kimimó: Lekeza viki ámina gala ameki ve láa liki li amikiko gilino: Itínagi azogi mininake holosi golesa kepeleko kimisele ahuloká itó kivisi vegená kelémo zokoká okinake okozá hozane nene ale lutigitove. ³³ Lá onoimóza, haitó apá makotoka Ómasímini agepagutí gakó loaká ve makó apili hilitamó nene etamitive. Zelusalega lá itave liki linamóma nenazo, itínagi azogi okozaki nene neza gaponeuka vinogo nouve. ³⁴ Kee, Zelusale vegenáise, Ómasímini agepagutí gakó liaká ve kipili hiliká itó Ómasímo lekelitoka hozaló kimisili vegená nene lekeza gehanitunú ahulí miliki kipili hiliká iaká niave. Neza lekélí izegipatini zuha nene okolohómo izegipala ale mulunauka moloaká noimómáminoko gamena gamena kelémo mulúneuka molanogo oaká noumóza, lekeza gili nimisá amave. ^{35^f} Nenemú gililo. Ómasímo viselelikimikiko apatini nene gámé numuni vizinogo ive. Neza lo

^c 13:27 Age 6:8 ^d 13:28-29 Mat 8:11-12, 22:13, 25:30 ^e 13:30 Mat 19:30, 20:16; Mak 10:31 ^f 13:35 Age 118:26

likimitove, gililo. Lekeza neni nene goha ma áninagamiki mini-liki niviki alika nene Guivahanímini agulizató anitelimikane. Ómasímo lusa gegimikave liki li niminigave, loko limó.

Izesú agisa agizani lulu vizi netá gizali ve alémo zokamó

14 ¹Holisi makokú Izesú nene Palisaio monó vetini kugulizaki ve makolímíni numukú iteko nosáneté noko noigo, Izesú netá ale gopa itihe liki gizapa iki minamó. ²Lá niago, áminaló ve makó minamó nene, agisa agizani lulu vizi netá gizali ve nene Izesuni avogisaló minamó. ³Noigo, Izesú nene monó mogona apí-ikimiaká vegi Palisaio monó vegi loká oketake leza kivisi vejená nene holisi gamenagú kelémo zokosá nehe kelémo zokamosá neve. ⁴Loko lokago, keza nene kegepa apiziake minamó. Lá niago, ámina avisi vema alémo zokoake amiselekego, vimó. ⁵^s Vokago, Izesú láa loko lo kimimó: Lekelikutí ve makolímíni gipalahe pulumaká izahe gale hánagú holisi gamenagú velehé limitimó nene, holisimagule lokoko ahulokiko áminagú minatimó nehe. Itó litá oko gelelehá oko galegutí alémo otitimó neve. ⁶Loko lokago, anotó aliki li amemisá amó.

Nosánetató alesa molo kemeakakumú gakó

⁷Lá ikago, alesa molo kemekago a vejená nene nosáneté nanigi niake, síá lamanaláló minatune liki niago, Izesú ániagoake, anoza gakó makó láa loko lo kimimó: ⁸^h Ve makolímó nosáneté napaló atane loko alesa molo gemekiko nookoma, síá lamanató minamo. Ámina nosánetató ve makolímíni agulizá nenémo geí givilegeneitimó nene, ⁹alesa molo likimiti ve nenémo okoko geza imane noani síá ahulokoko imane ve amezo. Loko lo gemekiko, geza govoza helekiko kemegezaloka ne síá gosaló minokatanize. ¹⁰Nosáneté napaló alesa miligimikikoma, geza vokoko kemegezaloka siató noako, alesa molo gemeneiti ve nenémo okoko zogone geza kovogisaloka ne holomaló voko minozo. Loko lo gemekiko, nosáneté niki nia vejenalitini kovogisaló gugulizá oteko vinogo ive. ¹¹ⁱ Ve makolímóhe makolímóhe ezáa agulizá ale otitimó nene, ezáa agulizala liminogo ive. Itó ve makolímó ezáa agulizala aleko lemeko molatimó nene, Ómasímo aí agulizala ale napa inogo ive.

¹²Loko loake, Izesú alesa molo ami vema láa loko lo amimó: Geza nosáneté napa ale vavá nooko nene, zogoga itó gugunaka itó geza zuha itó geza numukaloka vejená itó moníini vaí onoiti vejenakó alesa molo kememo. Keza nosáneté napa ali vavá niiki alesa mili gimiki, nosáneté kementó goha akú gimikataze. ¹³Geza nosáneté napa ale vavá nooko nene, gohogó vejenaki kigisa kigizani nakeseta vejenaki kigisa genisi ina

^s 14:5 Mat 12:11 ^h 14:8 Ano 25:6-7 ⁱ 14:11 Mat 23:12; Luk 18:14

vegenaki kogómula lika vegenaki alesa molo kemezo. ¹⁴Lá okako, keza niiki nene, alika goha akú nosánetá pekimi iki gimitamoláa nominazo, geza gogoliza vizeko minanogo ane. Lá oko noako, Ómasímo vegená lamanaláa hilinitakutí kelémo otiti gamena nene meinaváa giminogo ive, loko limó.

Nosánetá napamú anoza gakó

(Mat 22:1-10)

¹⁵Nosánetá noko mina ve makolímo Izesú láa loko noligo geleake, láa loko lo amimó: Keza Ómasímo gizapa okimiaká onoitó miniki nosánetá niki minata vegená kogoliza viziki minanigave. ¹⁶Loko lokago, Izesú nenemú anoza gakó makó láa loko lo amimó: Ve makó nenémo nosánetá napa ale vavá inogo vegená mukí alesa molo kimimó. ¹⁷Alesa molo kemekago, nosánetá nata gamena alitokago, nosánetató atave loko hozaló veva amiselekago, alesa molo kimi vegenatoka vike lekeza alo, nosánetá mota ale vavá okave. ¹⁸Loko lo kemekago, keza mukitó vitakumú goselekaseleka lake makolímo nene láa loko lo amike limó: Neza mikasi makó meina hizenounazo, neneloka voko ániganogo novuze, agulizaki vema láa loko lo amezo. ¹⁹Loko lokago, makolímo láa loko limó: Itínasa pulumaká iza ligizani luga luga asú igo meina hizenoumó nenazo, hanuva nitahe loko ániganogo nouze, agulizaki vema láa loko lo amezo. ²⁰Loko lokago, makó nenémo láa loko limó: Neza itínasa vená alekuke nouke, nenemule loko vaminogo uze, loko limó. ²¹Láa liki likago, ámina hozaló vemámo nene goha atiginá oko vike keza la gakó nene gizapa veva aveté oko lo amekago, geleake, izapaló molokago, hozaló vema láa loko lo amike limó: Geza litá oko taoniloka voko gapo napagú komagú novoko neneló gohogó vegená kigisa kigizani nakeseta vegená kogómula lika vegená kigisa genisi ina vegená kelémoko ano. ²²Loko lokago, hozaló vevámo gele ameko mohona oake okoko láa loko lo amimó: Gizapa venemaka, hoza gakó lonetanimó mota gele alekumóza, siá makó nene hanuva minokave. ²³Loko lokago, golohá veva nenémo hozaló vema láa loko lo amimó: Geza nene pilipilí gapoló itó mi gapoló novoko není numukú gikí iki minatave loko vegená gala vizeko kelémoko ano. ²⁴Neza láa loko lo nogumuve. Neza goí oko alesa molo kumu vegená amanazo, není nosánetakutí keké naminigave, loko lo kimimó.

Izesuni ámegetoko vinogo gele vevesatuni gakó

(Mat 10:37-38)

²⁵Vegená mukí nene Izesuni ámegetiki nivago, eza viligoko láa loko lo kimimó: ^{26j} Makó eza nezagi minatíive lokokoma izolagini amelagini vená izegipala eza zuhamú gelekiko itekikoma, itó ezáa minoko

^j 14:26 Mat 16:24; Mak 8:34; Luk 9:23

aleko itimó nenemú gelekiko itekikoma nene, itó nenikumú gelekiko lemetigi oko noikoma nene, není izegipa loló oko minaminogo ive. ²⁷Makó ezáa zohota zaló apili hilinigi miluma netá gihitatakumú gele zageoko némegetamitimó nene, není izegipa loló oko minaminogo ive. ²⁸Lekelikutí makolímo numuni napa makó ginogoma ganatili meinaváa gelekoko moni mota akohihe akohemihe loko molo geleko ánigokoko, giti avotigi nehe nenémini mogonáa geleko ániganogo ive. ²⁹Itó lá amoko litávatá oko gopa numuni ale hizeko gitimó nene, monima asú okiko vitagá okoko numunima ahulokiko, vejená keza ángiiki nene giza itiki, ³⁰imane vémo sozáa moloko numuni napa ale hizeake lá iha iha ahulokago lá onoive liki linigave. ³¹Itó agulizaki ve napa makolímo agivelahini agulizaki ve makó apilitove loko oko lova agoka ameminogo ive. Áisi ganá láa loko agata gilinogo ive: Leza áimane luguhakó 10 tausen minokune, itó kéisi mukí 20 tausen minikanazo, kepelesá nehe kepelemosá nehe lokoko, ³²ezáagi izegipa agunamotamolagimú giliko akohemikoma, gala veva nene numunaloka ha noiko, litá oko hutono netá ameko ve makó amiselekiko voko itína nonagá itune loko nimiselekago nouve. ³³Loko litimó nenazo, nenemú lekelitokatí makó eza ámina oko netá matala mukí ahulo asú amitimó nene nana oko není izegipa loló oko minative.

Age meelé amitikumú anoza gakó

(*Mat 5:13; Mak 9:50*)

³⁴Age nene netá lamaná nemóza, agema laga amitimó nene, nana oko goha alémo meelé itune. Ma lá aminogo une. ³⁵Némini manáminoko ale meelé itunimoláa nomive. Hanuva lepe ahulanogo une. Nenemú lakagatagi minatamó neneta gakó imane gili hee liki gililo. Lekezagi meelé iki minalo, loko limó.

Sipsip iza tolova imó nenémini anoza gakola

(*Mat 18:12-14*)

15 ^{1k} Takisi aliaká vegi moko mogonaló vejenaki mukí iki monó gakola gilinigi Izesutoka alegesá iaká amó. ²Lá niago, Palisaio monó vegi monó mogona apí-ikimiaká vegi keza nenemú gelego, golesa imó. Golesa okago, Izesukumú láa liki liaká amó: Imane ve eza mokoló vejenámagi kelémo molokago nosánetá noaká noimó nene etamive. ³Liki likago, Izesú geleake, anoza gakó makó láa loko lo kimimó: ⁴Lekelitokatí makolímo sipsip izava 100 minatakutí nene hamó tolova itimó nene vitagá amitihe. Lá oko nomive. Lugáa 99 hanuva minamoláa makotoka kelémo nupa onoko ahuloketonoko mohona oko tolova imoláamú vitagá

^k 15:1-2 Luk 5:29-30

inogo ive. ⁵Vitagá oko oko ale utó okoko, mulunagú lamaná geleko agohí geko numutoka alekanogo ive. ⁶Aleko oko agivelagini kelémo nupa okoko láa loko lo kiminogo ive: Sipsip izáne tolova imóma ale utó molokuze, logoliza vizitune loko litimó neve. ⁷Nenemú neza lo likimitoze, gililo. Vatí oko nune liki litamoláa ⁹⁹ asite kigika ali viligamita vejenakumú nene okulumakú kogoliza aminigave. Ve golesa hámakolímo agika ale viligokagoma nene okulumakú kogoliza napa viziaká niave.

Moni tolova imó nenémini anoza gakola

⁸Itó vená makolímo silivá gehani 10-ía molo ikakutí hámakó alemó zitimó nene ma ahulaminogo ive. Eza liví legeko lolopa giteva giteva oko ale utó molokoko, ⁹vená agivelagini kelémo nupa okoko gehanínema alemó zimóma vitagá oko ale utó okuze, nezagi makó logoliza vizitunize loko lo kiminogo ive. ¹⁰Nenemú neza lo likimitoze, gililo. Ómasímini ageloge keza ámina iki mokoló ve hámakolímo agika ale viligokagoma kogoliza napa viziaká niave.

Gipa makó latila inogo imó nenémini gakola

¹¹Izesú nene gakó makó láa loko lo kimimó: Ve makolímini gipala losi minasimó. ¹²Miniki alika nanasi nenémo amelahini lo amike ahóno, geza moni henokanoni molo netanimóma nemezo. Loko lokago, moni henokanoni gona moloko gipa lositáma kimimó. ¹³Kemekago, alika nanasi eza mino hána amike henokanona ale nupa oake, gita oko aleko vimó. Voko mikasi gohauka minake, gumesisi gamasisi ike, iza goula nosató henokanona ahulo asú imó. ¹⁴Ahulo asú oake noigo, ámina mina mikasiló nene gaúna sipisi helemó. Hilikago, nosánetakumú vitagá oake, ¹⁵mikasi amelaho makotoka voko lokago, eza iza gizapa oko minatane loko lomikago, neneloka voko izama gizapa noike, ¹⁶nosá makó amemake mosimikago izatini nosánetakutí natove loko imóza, nenegi mositamó. ¹⁷Lá ikago, minake agata kolosokago, láa loko agata gilimó: Aménehini gelekelé izegipala mukí minake, goula nosánetá lamaná niki nitamóza, neza imaneloka gaúnamú hilinogo nounazo, ¹⁸numúneloka atiginá oko vinake aménehitoka láa loko lo amitove: Ahóno, golesa netá loló okugo, lihimavánémo Ómasiloka itó geitoka gena okaze, ¹⁹goha gipakave loko minamitove. Hanuva gelekelé izegipaka nelémo molokako minatove. Loko geleake, oteko amelahitoka vimó. ²⁰Voko numu gateté anitigo, amelaho ángoake, milumavala geleake, ololu loko vike anukeake agoka agepa nonago, ²¹gipalamámo láa loko lo amimó: Ahóno netá golesa loló okugo, lihimaváne Ómasiloka itó geitoka gena okaze. Nenemú goha gipakave loko minamitove. ²²Loko noligo, amelaho nene gelekelé izegipala lo kimike limó: Lekeza litá iki gó lamaná aliiki goló vizitalo. Ana lamaná ali vizitiki suú ali militiki ali namiki, ²³pulumaká iza

akaleva geható minamó makóma apiliki gitalo. Leza ninake logoliza vizeko minatune. ²⁴Gipáne nene heleneikutí goha otekave, itó eza tolova onoikutí goha utó okave. Loko lokago, kogoliza viziki gehani giziki namó.

²⁵Lá niago, ganá gipalamámo hozauka minakutí ake, númaseloka anitike gilimó nene, kogoliza viziki meleketakeni niago, geleake, ²⁶gelekelé izegipa makó sele lo ameake, okago, loká otoko nuvane nana niave, ²⁷loko lokago, áisi limó: Gugunakama gozapá vimóma avasavagi omo anitekago, ametipo pulumaká iza akale geható minamóma nene apelego gizo vatá noune. ²⁸Loko lo amekago, ganá gipalamámo izapaló molokago, mesaha oake áminaló vo anitemigo, améipo geleake, lemeko alémo hulu iha, ²⁹gele ahuloake láa loko lo amimó: Gelezo. Melekeni mukí ale ahulokuke gelekelé ogetoko minuke, gakoka makó gele ahulosá amumóma nemóza, geza nene meme iza akaleva makó nemeko nigive nagavegi ma apeleko namuháma neve. ³⁰Itó gipaka alika nanasima geí moni henokanonima moko netató ahulo asú okave. Ánenémini okago, geza lokako pulumaká iza akale geható minamóma apiliki gizi vatá nitahe. ³¹Loko lokago, améipo láa loko lo amimó: Gipánemaka, geza gamena hána nezagi minanimóma nenazo, není netá mukí nene geíma neve. ³²Itó gugunaka nene heleneikutí oteko okave, itó tolova onoikutí goha utó okave. Nenemú mulutegú lamaná geleko logoliza vizuko lamaná noive, loko limó.

Heno gizapa ve golesámini anoza gakola

16 ¹Izesú nene izegipala zuhama gakó makó láa loko lo kimimó: Henonavagi ve napa makolímini gizapa ve makó minamó. Minoko gizapa vemámini gakó makó nene gizapa vemámo henoni ale gopa oaká noive liki lamó nene geleake, ²sele lo ameake, láa loko lo amimó: Geí gakó nanave liki lago guluhe. Ve nenéminaka není gizapa ve goha minamitane loko noluve. Hoza tiketima alekano. Moni henokanoníne gizapa anitímini mogonáa ale utó molatune. ³Loko lokago, henoni gizapa vemámo agikatunú láa loko gilimó: Imane golohá venémo hozanema ipá okiko nana itomó neve. Govisi hoza alitomó nene goselé nepelekave. Gapoló monimú voká vokató mohona itomó nene novozáne helekative. ⁴Loko gelekunazo, neza golohá venémo nimiselekiko ve nigivénege nilími lamaná niko numúikú minoko aleko itomoláamú netá lamaná makó oketatoze. ⁵Loko loake, golohá vevámini nekisáa ali mina vejenáma hamopamó alesa molamó. Moloake, makó láa loko loká otamó: Golohá venémini nekisa geitoka nanakí neve. ⁶Loko lokago, áisi meseme nogoza talam 100 neve. Loko lokago, litá oko tiketi imane alekoko 50 loko gizamane. ⁷Loko loake, makóma loká otake golohá venémini nekisáa geitoka nanakí neve. Loko lokago, áisi laisi gó 1 tausen neve. Loko lokago, litá oko tiketi imane alekoko 800 loko gizamane. ⁸Loko lokago,

golohá vevámo geleake, henona ale gopa napa gizapa vema gele veveso minake alikumú geké lotamó. Itó monóini nomi vegeanalite netá matá inigi gili vevesi minake napaló gili kimiaká niave. Monotinigi vegeená lekeza nenémuni suni lekelitoka ma minamive. ⁹Nenemú litoze, gililo. Lekeza ámina iki moni henokanoni ha netale liiki vegeená kimikiko keza likigive lilí ikiko, ámina netá ali minata gamenaváa asú okiko nene alévolé apatoka molo lekemekiko áminagú miniki meinavatini alinigave.

¹⁰Makó eza netá koma kamaló nene ale guni oko gizapa itimó áisi nene netá napaloka ámina oko ale guni oko gizapa lamaná inogo ive. Itó makó eza netá koma-kamaló ale gopa napa itimó áisi nene netá napagi ámina oko ale gopa napa inogo ive. ¹¹Lekeza henokanoni ha netá nene ali lamaná iki gizapa amitamó nene, netá gihila nene éaho likimitive. ¹²Itó netá hagitana likimimó nene gizapa i guni amitamó nene, lekelí alévolé henoni nene alika éaho lehizeleketative. ¹³^l Ve hámakolímo kugulizaki ve lositalitini gelekelé ma oketaminogo ive. Lá itimó nene maga ve agika amekoko maga ve mukahá apilitimó onoiwe. Itó maga veloka gímize lamaná okoko maga ve ánigo goselé inogo ive. Lekeza ámináminiki Ómasímuni hoza nemó itó moni henokanonímuni hoza nemó ganagana lelegí oko aleakaláa nomive.

Mosé lo hukoketa gakoki Izesú gosohá lo hukoketa gakoki

¹⁴Loko lokago, Palisaio monó ve keza moni henokanonimú lagaváa gili miniaká a ve nenete giliake, gakola gili hazutazu amó. ¹⁵Lá ikago, Izesú láa loko lo kimimó: Lekeza nene vegeená kovogisaló veveso nune liki amuza miliki mihina iaká niamóza, Ómasímo nene likigikámuni mognáa geleaká noiwe. Vegenalite áningamó nene vevesonoi netá geleaká noigo, Ómasímo áningoko gilimó nene mu-izapa oaká noiwe.

¹⁶^m Mosé lo hukoko li gakó itó Ómasímuni agepagutí gakó liaká a vetini gakó minoloko ova ova ike ike Zonitoka anitimó. Nenelotí veletoka nene Ómasímuni gizapaló minoakalímuni gakó lamaná hutilí oko vokago vegeená mukilite lovasava iki Ómasímuni avogisagú vinigi lá iaká niave. ¹⁷ⁿ Okulumaki mikasigi keza vo tolova itíive liki vi tolova itáimóza, Mosé lo hukoko li gakó nenémuni lotonáa hamokó ma haha aminogo ive.

Izesú vená kimisele ahuloakakumú gakó lo kimimó

(Mat 5:31-32; 19:19; Mak 10:11-12)

¹⁸^o Ve makolímohe makolímohe venala amisele ahulokoko haitó vená alitimó nene, ve vená huko ezega emega oakalímuni lihima alinogo ive. Itó ve makolímohe makolímohe ahulinita vená makó alitimó nene, ámina netalímuni lihima alinogo ive loko Izesú limó.

^l 16:13 Mak 6:24 ^m 16:16 Mat 11:12-13 ⁿ 16:17 Mat 5:18 ^o 16:18 1 Koli 7:10-11

Lasaloki henonagi ve napagi kei gakó

¹⁹Izesú anoza gakó makó láa loko limó: Henonavagi ve napa minamó. Eza gó luhuvagigó meinava iteko minamokó ale akoloko minamó. Itó gamena gamena ló gehaka like agoliza vizé vizé oko minoaká imó. ²⁰Lá noigo, gohogó ve makó agulizá Lasaló eza agupeló halamé gizaleake henonagi vemámini numuni sepekuka ako minake, ²¹nosá nakutí litímotila alemó zimoláa ma nimiko natonazo loko geleko minoaká imó. Lá oko noigo, galate aniteke halamelalotí génimiaká amó. ²²Lá oko minake, gohogó vema helekago, ageló keza alímiki itiki Avalahani amatoka ahulimikago minamó. Itó alika nene henonavagi vema helekago, gale zitamó. ²³Gale zimikago, meikú lemeko miluma maluma geleko minake, okenava oko ánigamó nene Lasaló nene Avalahani amatoka noigo ánikagamó. ²⁴Ánikogoake, sele loko láa loko limó: Avalahazo, aménegamaka, nenikumú milumaváne geleoko Lasaloni amiselekako agizani gosavatunú nagamikú lupizeoko oko genezáneloka naliko hulu nivisitiho. Neza lokú imane miluma maluma golesa geleko nouho. ²⁵Loko lokago, Avalahá láa loko limó: Gipánemaka, gelenape. Geza mikasiuka lagámini amupiló minanimóma nene mota asú okamole. Itó Lasaló nene miluma malumámini amupiló minamóma ámina oko asú okave. Itína nene Lasaloni alími hulu niago, géisi miluma maluma geleko noane. ²⁶Itó ligilikagú nene zuni napa aleko hukokamóma nenazo, imanelokatí lemeakaláa nomive. Itó nenelokatí iteakaláa nomive. ²⁷Loko lokago, henonavagi vemámo láa loko limó: Aménegamaka, makó litoze, gele nemezo. Elane není numutoka ²⁸izegipa nugunáne ligizani lugaloka asú igo niave. Keza miluma apakú imane ikataze, Lasaloni amiselekako voko kagata alitive. ²⁹Loko lokago, Avalahá láa loko limó: Óve, Moseni gakó itó Ómasímini agepagutí gakó liaká a vetini gakóma nemole. Nenema gilinitanae. ³⁰Loko lokago, eza limó: Óe, Avalahazo, aménegamaka, mokáne, lá oko nomive. Heleneikutí ve makolímo oteoko voko lo kemekiko, kigika ali viliganigave. ³¹Loko lokago, láa loko limó: Keza Mosele itó Ómasímini agepagutí gakó liaká a vetini gakó gili ahuliaká nitamóma, ve makolímo heleneikutí oteoko voko lo kimitimóza, nene ámina iki gili ahulanigi anae, loko limó.

Golesa netakumú gala vizeaká gakó

(*Mat 18:6-7,21-22; Mak 9:42*)

17 ¹Izesú eza izegipala zuhama gakó makó láa loko lo kimimó: Golesa netakumú gala vizeaká nene ha minanogo imóza, golesa netakumú gala vizé vizé iti ve nene agae, Ómasímo nana otatimó neve. ²Izegipáne koma koma minakutí ve makolímo netá golesa alitive loko gala vizeko litimó nene Ómasímo nana otatimó neve. Gehani napa nene luvanaló nagá ziki age nagamikú ahelú itamola avilegeko Ómasímo

genavagi netá golesa loló otanogo ive. ^{3p} Ehe, lekeza likigika gizapa iki minalo. Likigive makolímó galana alekikoma, gahá ameko agata alezo. Lá okako, geí gako gelekikoma lihimavala ahulotozo. ⁴ Itó gamena hámakó zupa lihima netá alegetoloko vitimó nene gamena 7-ía geitoka oko nigivénega, némini ogetutímó mulúne githiná okave loko lo gimitimó nene, nenemú geza ámina oko lihimavala ahulotoko minozo, loko limó.

Gele alévolé oakate ale hutilí oletati gako

⁵ Aposolo keza Guivahanima nene geza gele alévolé oakate ale hutilí oletozo. ⁶ Liki likago, Guivahanímó láa loko limó: Masteti gihila komámo goloko iteko zamú geleaká noive. Nenémínoko gele alévolé oakatinía ma minatimó nene, nimuza za volane asutooko age nagamikú omane lemeko ote minamane liki li amitamó nene, gakatini gele lekemekoko hanuva lá inogo ive.

Gelekelé izegipa loleta hoza

⁷ Lekelikutí ve makolímíni gelekelé izegipala makó nene mikasigú hoza aleko minatikutí itó iza gizapa oko minatikutí únakala anitekiko, gizapa veva nenémo geza litá oko numukuka iteko nosánetaka noko minozo loko hanuva lo amitihe. ⁸ Lá oko nomive. Áisi nene láa loko lo aminogo ive: Géisi hoza aleaká lavolavo likeoko únaká nosá vatá onimikako, nonugo, hozaka asú okiko, alika gezaka vatá oko natane. ⁹ Loko lo amekiko, gelekelé izegipama eza gizapa vevámo lota hoza nene alekogó noiko, gizapa vevámo gele lamaná itihe. Ma alémo napa aminogo ive. ¹⁰ Itó mogonatipogi ámina oko neve. Lekeza hoza gako loleketumó nene lilí i asú iikima leza gelekelé izegipa ánéa nene oletani hozagó alekune, miní ameko makó loló amune liki lilo, loko limó.

Izesú lokago halamé gizale ve 10 gilelemó

¹¹ Izesú Zelusalega vinogo Galilaia mikasigi Samalia mikasigi holúikú novike, ¹² apá makotoka aniteake noitigo, halamé vejená ligizani luga luga asú igo keza ángiake, zuha kemeaká netá nenazo liake hotokatí sele liki ¹³ láa liki lamó: Gizapa vele Izesugama, lelikumú milumavate gelezo. ^{14q} Liki likago, ánikogoake, láa loko lo kimimó: Lekeza viki gililitamolamú lukugupetini nene guguni giziaká ve nene kelepizilo. Loko lokago, keza nivago, kugupeló gizale netá gilili asú amó. ¹⁵ Gilili asú ikago, keitokatí hámakolímó gileleake, ángoake, atiginá oko gako napagutí Ómasi agepoka lomo lomo, ¹⁶ Izesutoka vike agihúna geko akoake, agepoka limó. Ámina ve nene Zuta ve negopa, Samalia mikasigutí vémo lá imó. ¹⁷ Lá okago, Izesú láa loko limó: Ve ligizani luga

^p 17:3 Mat 18:15 ^q 17:14 Liv 14:1-32

luga asú igo gililikamóza, ve 9-ía keza hitoka vave. ¹⁸Keza atiginá iki iki Ómasi agepoka linigi lamake, hanuva gatzá nivago, Samalia mikasigutí hetoka ve imane eza hámakó noahe. ¹⁹Loko loake, ámina ve láa loko lo amimó: Gele alévolé anitímo gelémo zokokaze, nenemú oteoko vozo, loko lo amimó.

Ómasímo gizapa oketati gamena utó iti gako
(*Mat 24:23-28,37-41*)

²⁰Palisaio monó ve keza Izesuni loká itiki Ómasímo gizapa olimiaká ve napa hí zupa utó o lamaná itive liki likago, eza láa loko lo kimimó: Ómasímo gizapa olikimiaká netá nene lekeza ánginiko gonanalivagi utó aminogo ive. ²¹Nenemú lekeza anosa makó ángiiki, eé, imaneloka utó okave, itó eé, elaneloka utó okave liki laminigave. Gilinahe. Ómasímo gizapa olikimiaká netá nene likigilikagú utó oko nemole, loko limó.

²²Itó izegipala zuhama láa loko lo kimimó: Minoko gamena makó alitati zupa nene, okulumakutí lumu ve gihila neza gamena hamokó zupa utó ugo ánganigi lagava gilitamóza, ma ángaminigave. ²³Nene zupahé eé, imane lelitoka utó onoive, itó eé, keitoka utó onoive liki li likimikikoma kémegetiki vamilo. Itó giliko, lamaná amino. ²⁴Gopisína nene okulumá nekisalokatí melevezá okago, vo lutegeaká noive. Ámináminoko okulumakutí lumu ve gihila neza ato gamena alitikiko mikasi nekisa vokisaloka nene vejená mukitó keza není ángi asú inigave. ²⁵Lá oko nemóza, oko moloko oaká nou netá ángiaká nia vejenalite není ángi golesa iiki miluma netá mukí nimitave liki linitinamóma neve. ²⁶^r Noá mina zupa nene vejená keza miniki aliki amó ámina iki okulumakutí lumu ve gihila není gamena alí noliko ámina inigave. ²⁷^s Keza iza goula nosá nake vená meina-kona ake, zuguzugu zezezege viziki miniliki nivago, Noá eza vená izegipala kelémo sipigú itekago, nagamí napa veleko anitike kepele gesá imó. ²⁸^t Itó Lotí mina zupa áminagó amó. Keza iza goula nosá nake meina-kona ake, hozagaza aliki zuhaina zahaina ake, numuni luki giká lá iká iki Lotini gako gelemiki niago, ²⁹Lotí eza Soto apá ahuloake novigo, okulumakutí nene lánhakó netá ló gulumavagi limike vejená kepele gesá imó. ³⁰Okulumakutí lumu ve gihila neza minoko utó ito zupa nene mukí vejená keza ámina inigave. ³¹^u Ámina zupa nene numuni numupitó nita vejená nene atiginá iki numúitokatí henóini ma aliki vamitakumule. Itó vejená hozáitoka minatatotí henonimú giliki atiginá iki numutoka amitakumule. ³²Lekeza Lotini venalámitokagó gili minalo. ³³^v Makó keza nene kigika kemeníini ali gikitiiki ali minata vejená nene kigika kemeni gopa inogo ive, itó

^r 17:26 Apí 6:5-8 ^s 17:27 Apí 7:6-24 ^t 17:28-29 Apí 18:20-19:25 ^u 17:31 Mat 24:17-18; Mak 13:15-16 ^v 17:33 Apí 19:26; Mat 10:3, 16:25; Mak 8:35; Luk 9:24

makó keza kigika kemeni vínasi ahulatamó nene alévolé kemetamenigi minanigave. ³⁴Neza lo likimitoze, gililo. Ámina holugú nene ve losi keza hamó holomaló akinitáikutí maga ve alémokoko maga ve ahulomikiko minative. ³⁵⁻³⁶Vená losi ámina iki nosá isiki minatáitotí Ómasi nenémo vená magáa alémokoko magáa ahulomikiko minanogo ive. ³⁷Loko Izesú lokago, izegipala zuhamate loká itake Guivahanitemaka, nene netá hitoka utó itive. Liki likago, eza láa loko limó: Anuva i netalímo nama gosúveha maú zigo alegesá iaká niave. Ámina oko kigika anuva i vejená minató minató goní napa inigave, loko lo kimimó.

Goní ale heleaká vegi gevoná venaki keí anoza gakó

18 ¹Izesú nene izegipala zuhama viki akamiki gamena gamena goselekaselé amiki Ómasiloka liliki viki minikoma nene Ómasímo gele kimitikumú anoza gakó makó láa loko lo kimimó: ²Apá makotó nene goní ale heleaká ve makó minamó. Áisi nene Ómasi noimó itó vejená niamó keikumú ma gelesá amimó. ³Lá onoigo, ámina apató nene gevoná vená makó minamó. Áisi nene goní ale heleaká ve noitoka gamena gamena vike láa loko lo ameká imó: Geza gala venémo nelémo golesa inogo igo nugutó vizitane loko noluve. ⁴Loko lo ameká noigo, goní ale heleaká vemámo gevoná venámámini gakó gamena hána gele ahuloake minoaká imóza, minoko agikatunú láa loko limó: Neza Ómasi noimó vejená niamó keikumú ma gelesá amumóza, ⁵gevoná vená imanémo negénege gakó loaká noive. Lá oko loloko ova ova oko nominiko, goselé nepelekatize, nenemú alémo vatí oko ámina gakó apele hilitove loko limó. ⁶Loko Guivahanímo lo asú oake, láa loko limó: Goní ale heleaká ve gínikahámo gakó limó nene mota gilinahe. ⁷Olile. Lekeza Ómasimú nanave liki liaká niave. Eza kelémo etó i vejenala zuhamate gamena gamena negénegeka liki niiko ale vevesoketamitimó neve liki nilahe. Itó gele ahulokoko minatimó nehe. Lá oko nomive. ⁸Neza láa loko lo nolukumuve. Eza ale akutoko ale vevesoketanogo ive. Lá itimóza, okulumakutí lumu ve gihila neza minoko atiginá oko imane mikasiuka ato zupa nene, není gelegele minatamoláa nene ma nitahe minamitahe loko nagata gululusi noguluve, loko limó.

Palisaio monó vegi kugupe meina aleaká vemuki anoza gakó

⁹Ve lugáate kezáinimú gelego vevesokago, kigivéikinimú gelego lemeaká noigo, Izesú ánigoake keikumú anoza gakó makó láa loko limó: ¹⁰Ve losi keza Ómasiloka linigi monó numuni napagú itesimó, makó nene Palisaio monó ve, itó makó nene takisiló mohona oko moni gumina aleaká ve. ¹¹Palisaio monó vemámo ote hee lonoike ezáamú lá oko gelegele láa loko limó: Kee, Ómasizo, ve lugáa keza laskoli miniki guminatamina iki vená loká iki miniaká niave. Neza

keikitana ve minamuve, itó takisi ale ale ve hé melanegitana minamuve. Nenemú gegepoka noluve. ¹²Neza holisigú holisigú gamena lositá nene monokumule loko nosánetá mosekuke minoaká nouve. Itó moni henokanoni nániguke 10 10 nekutí hamopamó nene monokumule loko moloaká nouve. ¹³Loko lokago, takisi ale ale vemámo nene akelepauka minake okenava oko ániganogo avoza helekago, gasínamake minake, láa loko agepoka limó: Kee, Ómasinemaka, ve golesa není gigika hize nemezo loko limó. ¹⁴ Gilinahe. Takisi ale ale vemámini lihimavala ahulo asú omikago numunaloka atiginá oko vimó. Palisaio monó vemámini lihima nene ha minamó. Lá onoinazo, kezáini kugulizáini ali otita vegeñalitini kugulizá liminogo ive. Itó makó keza kezáini kugulizáini aliki limiki milatamó nene Ómasímo kugulizáini ale napa inogo ive, loko limó.

Izesú izegipa koma kama nónohá zeketamó

(Mat 19:13-15; Mak 10:13-16)

¹⁵Itó ve vená keza izegipáini nene Izesú noitoka agizanitunú kugupeló aleko nónohá zeketative liki kilímiki viaká amó. Lá niago, izegipala zuhamate gahá kimikago, ¹⁶Izesú nene sele lo kimike limó: Lekeza izegipa koma ahulikimikiko nenitoka atave. Nenémináa keza Ómasímini avogisaló viakalímini mututoni nianazo, li hoipa ikitamilo. ¹⁷Neza lamaná lo likimitoze, gililo. Makó keza izegipa namuni monokú vávani iki itiaká niamó nenéminiki monokú itemitamó nene, Ómasímo gizapa okimiakakú keké iteminigave, loko limó.

Henonavagi gizapa ve

(Mat 19:16-30; Mak 10:17-31)

¹⁸Itó monó gizapa ve makolímo Izesuni loká otoko Tisá lamanámaka, neza nana okinake alévolé nemetameni alitomó neve. ¹⁹Loko lokago, Izesú láa loko lo amimó: Geza nenikumú ve lamanale loko nanamú nolane. Lamaná améneho Ómasi hámakó noize, makó nominazo, není mogonamú gele hee lominoko nolape. ²⁰^x Itó geza gapo lota gakó gelenane. Láa lokove: Ve aleve suni ale gopa oko huko ezega emega amo. Geza vegeñá kepele helemo. Gumina amo. Geza soza hakupá gakó lamo. Geza izokahiko amekahiko kugulizá ale otezo. ²¹Loko lokago, gizapa vemámo láa loko limó: Neza ámina lo huka gakó mukí nene izegipa namutotí apí oko ámegetoaká noumóma neve. ²²Loko lokago, Izesú geleake, láa loko lo amimó: Netá hámakó velesá loló amanimó nene ale hee litanize. Geza voko henokanoka mukí nene meinaló moloko moni alekoko gohogó vegeñá kemekoko, oko némegetozo. Itó lá okako

^w 18:14 Mat 23:12; Luk 14:11 ^x 18:20 Gá 20:12-16; Gapo 5:16-20

okulumakú helisa henoni utó ogetanogo ive. ²³Loko lokago, ve eza henokanona vaí oake minamó nenazo, gona moloko kimitohe loko giligo gena imó. ²⁴Lá okago, Izesú ánigoake limó: Henokanóiki vejená keza Ómasímini lapanató silipa iki ititamó neve. ²⁵Kamele izámo nakasi vovónagú voakaláa vávani oko nomimóza, henokanóiki vejená nene Ómasímini lapanató voakaláa nene ámina oko genavagi golesa neve. ²⁶Loko noligo gele vejenalite láa liki lamó: Íi, láa lokoma éhahinima Ómasímo agutó vizekiko minoloko voko minative. ²⁷Liki likago, Izesú lo kimimó: Vegenalite nenémini itamoláa nomimóza, Ómasímo loló itove loko agata gili netá nene vávani okogó loló oaká noive. ²⁸Loko lokago, Pitá láa loko lo amimó: Gelenape. Leza mukí netá matate ahulo asú okunike geí gémegetokuninazo, alika nene meinava alesá nehe. ²⁹Loko lokago, Izesú Pitaginima láa loko lo kimimó: Lamaná lo likimitoze, gililo. Makó keza numúini apáini nehe vená izegipáinihe gouna zuhahe izóikini améikinihe Ómasímini lapanakumule liki ahulikitiki iki nemegeosaló atamó nene, ³⁰nenémini meinava nene mikasiuka napaló alinigave, ító miniki okulumakuka alévolé kemetameni alinigave, loko lo kimimó.

**Izesú ezáa alika hiliti gamenamú epoapoga ligo gamena
losive makole imó**

(Mat 20:17-19; Mak 10:32-34)

³¹Izesú nene izegipala zuhama amegesa vizitoka kelémo moloake láa loko lo kimimó: Gililo. Leza Zelusalega noitune. Itekuko, Ómasímini agepagutí gako liaká a vete okulumakutí lumu ve gihila nenikumú epoapoga linamó mukí nene alévolé inogo ive. ³²Hetoka vetini kigizakú nilími milikiko, keza gopoguka linitiki galaná milinitiki, gituhú initanigave. ³³Lá iiki uheni nagatunú nipiliiki nipili hilikiko, gamena losive makole minokinake heleneitokutí goha otinogo uve. ³⁴Loko lokago, keza gelego ligitagani imó. Mogonáa hitokimikago, ámina gako gilinigi gili vevesamamó.

**Zeliko numutoka agómula lika ve monimú voká
vokató ve ale pulusotamó**

(Mat 20:29-34; Mak 10:46-52)

³⁵Izesú eza vike Zeliko numutó ale alitamó. Ale alitokago, gapo agilikaloka nene agómula lika ve makó minake, monimú voká vokató minoaká imó. ³⁶Lá oko noike, mukí vejená vigá igá niago, mogonamú loká okimikago, ³⁷keza Nasalete numutotí ve Izesúma noave. ³⁸Liki likago, gako napagutí sele loko Izesuvo, geza Tevitini agávolagamaka akagá oletatane loko lo mololeta vetemaka, nenikumú miluma gelenetamane. ³⁹Loko lokago, goí iki niva vejenalite legesó oko minative liki gahá amemóza, áisi nene gele ahuloake gamoga gike sele like geza Tevitini agávolagamaka, nenikumú gigika hizino. ⁴⁰Loko lokago, Izesú

geleake, gapoló noike lekeza nenitoka alímiki alo. Loko lokimikago, agómula lika vema Izesutoka alímiki ikago, loká otake limó: ⁴¹Geza nana netá alegetatokumú nolane. Loko lokago, agómula lika vemámo Guivahanínemaka, nogómulané ale goloutonetatane loko noluve. ⁴²Loko lokago, Izesú láa loko lo amimó: Gogómulaka goloutino. Nenikumú gele alévolé anitímo gelémo zokokaze. ⁴³Loko noligo, áminasitó agómula goloutamó. Goloutokago ánigoake Izesuni ámegetoko vike Ómasi agepoka limó. Lá noigo, ániga vejená keza ámina iki Ómasi agepoka lamó.

Izesuko Zakiasiko

19 ¹Izesú nene Zeliko numutoka aniteake, avilegeko vinogo igo, ²ámina apató ve makó minamó, agulizá Zakiasí, áisi nene takisi aliaká a vetini agulizaki venini. Eza henokanonámo vái o mina ve minamó. ³Áisi nene ve alínipa nenazo, Izesuni agupeló ániगतove lokoko vejená mulusigú minake Izesuni ániगतmike, ⁴ololu loko vejená kivilegeake, vike zaló iteko noike imaneló nougo Izesú imaneloka okiko ániगतove. ⁵Loko geleake noigo, Izesú eza áminaló vo aniteake, okenava oko ánigoake láa loko lo amimó: Zakiasizo, litá oko lemeno. Itína neza géí numukuka vitíve loko nouve. ⁶Loko lokago, litá oko lemeake, mulunagú lamaná geleko numunauka alémoko vimó. ⁷Vi itikasisigo mukí vejená keza ániगतiake, gili golesa iake áisi nene nanamú ve golesámini numukú iteko noive. ⁸Liki likago, Zakiasí áisi nene Guivahanímini avogisaló oteko láa loko limó: Guivahanínemaka, gelezo. Moni henokanóne lelegí oko gona molokinake lugáa nene gohogó vejená kiminogo uve. Itó vejená lugáatini moni henokanóini soza saza luke avilegeko aleaká umó nene neko, aleko iteko hamó alutó nene losive losive kimitove. ⁹Loko lokago, Izesú limó: Nenémimi hoza aliaká nia vemú nene monóini nomi vejená niave liki liaká niamóza, imane ve Zakiasí nene ezagi Avalahani agávolaho Zuta ve gihila noive. Itína aí numukú oko ániगतmóma agutó vizeaká netá mota utó okave. ¹⁰Okulumakutí lumu ve gihila neza tolova inita vejenakumú vitagá oko kugutó vizitove loko lumumóma neve, loko limó.

Moni gó ligizani luga luga asú igo nenémimi anoza gakó (Mat 25:14-30)

¹¹Izesú Zelusalega ale alí noligo, gakola gele vejenalite itína Ómasímo gizapa olimiaká ve napa alémo utó iti gamenava alitokave liki nigelego, gili hee litave loko Izesú anoza gakó makó láa loko lo kimimó: ¹²Agulizaki ve makolímó agulizaki ve napaloka voko lokugo mikasi gizapa ve nenémimi akilí hitonimikiko atove loake, mikasi gohauka vinogo noike, ¹³gelekelé izegipala ligizani luga luga asú igo sele lo

γ 19:10 Mat 18:11

kemeake, moni gó hamopamó nokimike láa loko limó: Lekeza imanetunú lilí iki ali hutilí iki niko, atiginá oko ániगतवे. ¹⁴Loko loake, vokago, aí gizapaló mina vejená lugáate gili golesa imiake, vejená kimisilikago, ámegetiki vake agulizaki ve napama láa liki li amemó: Géisi nene mikasi gizapa vele minamitane loko nolune. ¹⁵Liki likago, agulizaki ve napamámo nene gopa voko minake mikasi gizapa vémini akilí amekago, atiginá imó. Atiginá oko vike nene gelekelé izegipala moni kimi vejená láa loko alesa molo kimimó: Moni lukumumóma nene hozaváa alikago, nanakí akohekahe, alikalo loko alesa molokago, ¹⁶gelekelé izegipa makolímó anitike limó: Guivahanínemaka, geza moni gó hámakó nemenimó nenetunú hoza aleko gó gosohá ligizani luga luga asú igo ale utó molokuve. ¹⁷Loko lokago, láa loko lo amimó: Geza gelekelé ve lamaná noane. Vatí oko hozaló gizapa okane. Geza ha netalímíni hozaváa ale guni oko gizapa okanize, nénisi numuni apá ligizani luga luga asú igo nenetini gizapa ve loló ogimikugo minatane. ¹⁸Loko lokago, gelekelé izegipa makolímó anitike limó: Guivahanínemaka, geza moni gó hámakó nemenimó nenetunú hoza aleko gó gosohá ligizani lugaloka asú igo ale utó molokuve. ¹⁹Loko lokago, láa loko lo amimó: Vatí okove. Geza numuni apá ligizani lugaloka asú igo nenetini gizapa ve minatane, loko lotamó. ²⁰Itó gelekelé izegipa makolímó aniteake láa loko limó: Guivahanínemaka, moni gó hámakó nemenimó nene gotunú asapú oko otoa oko ale molonoumó imane aleko nouve. ²¹Geza gínikaha ve minokaninazo, ve makolite hoza alikago gihiláa utó okago aleaká noane. Itó ve makolite mini zuhá inató gihila omolokago nosánetá aleko asutoko noaká noane. Nenemú gelekuke geikumú nehelele vizekago monika nene gizapa oko alenoumole. ²²Loko lokago, gizapa vemámo láa loko lo amimó: Gelekelé izegipa golesa gezaka lani gakó nene ale viligoko goní nogetuve. Geza gínikaha ve noutímíni mogona gelenane. Ve makolite hoza alikago gihiláa utó okago aleaká nouve, itó ve makolite mini zuhá inató gihila omolokago nosánetá aleaká nouve. ²³Nene mogonáne gelekanimóza, moníne nene peni numukuka molokako ámina moniló miní amiki nimilinitiko neza goha inake voko alitonazo. Nanamú neve. ²⁴Loko loake, aí amatoka oti mina vejená láa loko lo kimimó: Moni gó aleneimó nene aliiki moni gó ligizani luga luga asú igo alenei vema nene amilo. ²⁵Loko lokago, keza ininá iake Guivahanitemaka, eza nene moni gó ligizani luga luga asú igo mota alekamole. ²⁶ Liki likago, eza limó: Neza gakó makó lo likimitoze, gililo. Ve makolímó Ómasílokati netá makó alenokoma gizapa lamaná itimó nene Ómasímó goha miní ameko aminogo ive. Itó netá makó gizapa lamaná amiti ve nenémo ale nouhe loko agata gilitimóza, Ómasímó goha ipá oko alinogo ive. ²⁷Itó není gala

^z 19:26 Mat 13:12; Mak 4:25; Luk 8:18

ve nene nenikumú Guivahanite loló amitane liki liaká a vema kilímiki iki neni nogómulaló kipili hililo, loko limó.

Sigaga litanigi ago Izesú Zelusale numutoka vimó

(*Mat 21:1-11; Mak 11:1-11; Zon 12:12-19*)

²⁸Izesú láa loko lo kemeake, Zelusalega vinogo ale goí o kemeko novike, ²⁹Olivi agoka gohalaló numuni apá lositá nene Petepage itó Petania minasitó ale alí nolike, izegipala zuhagutí ve lositá nokimisisilike, ³⁰láa loko lo kimimó: Lekeza helega numutoka viki anitiiki toki iza akaleva nagá zinamóma nene vejená kogohí geko mohona onamitimoláa nene ángiiki vinasiki aliki alizo. ³¹Vinasiki aliki nisiko, ve makolímo nanamú nivinasasive loko nolikoma, Guivahanímo hoza nego ámina izamú limiselekago nousive, liki li amilizo. ³²Loko loake kimiselekago, keza vasigo, Guivahanímo goí oko lo kimi gakotó ámina netá utó imó. ³³Utó okago, toki iza akalevámimi nagá nivinasasigo, iza amelage lekeza nene toki iza akalevama nanamú nivinasasive, ³⁴liki likago, keza láa liki li kemesimó: Guivahanímo hoza nego imane izamú lokago oko novinasusive. ³⁵Liki likasigo, iza amelage gili kimikago, toki iza nene Izesutoka aliki vikasike, hepekumú luhoaká góini gololohá iki ámina toki iza akalevámimi amegesaló milikasike Izesú nene iza amegesaló ahulimikasigo, ³⁶toki izámimi amegesaló minoake novigo, vejená keza hepekumú luhoaká góini nene gololohá iake gapoló nene avilisá itimi vamó. ³⁷Lá niago, Zelusalega ale alitoake, Olivi agokalotí lomo noi gapoló vo alí noligo, izegipala zuha mukilite kogoliza nivizeke alévolé suni aligo ángiakumú nene gakó napagutí Ómasi agepoka lake, ³⁸^a láa liki lamó: Guivahanímimi gakotó agulizaki ve napa anitelimikane. Ómasímo nónohá zegetatize. Okulumakú nonagá oletino. Ómasímimi mogonáa nene lapanalagi minino. ³⁹Liki likago, vejená alegesá iki minakutí Palisaio monó ve makolite holúikú niake láa liki lamó: Gizapa ve geza izegipaka zuha imane láa liki lamilo loko lo hukoketamane. ⁴⁰Liki likago, eza láa loko lo kimimó: Neza lo likimitoze, gililo. Keza gakó lamiki ha minatamó nene, gehani imanete gakó napagutí negepoka linigave, loko limó.

Izesú Zelusale vejenakumú ive imó

⁴¹Lá oake, omo anitike Zelusale apá nánigake, agika nohizigo ive napa ike, ⁴²láa loko limó: Lekeza nonagá iki minata gakó gili ahuliaká niamó nene itína gamena gili alitanazo. Lá onoimóza, mogonáa halá geneimó nenazo, lokogómulatunú ángi vevesaminigave. ⁴³Gamena makó lekelitoka noiko, gala velinite iki numutini apatini hizi vigiiki mikasi amumú iki geisa hiziiki, likilími vigiiki ⁴⁴vená izegipatinigi lekehelú iki

^a 19:38 Age 118:26

likipili gesá inigave. Lá niiki numutini zivi akúvasivi niiki geha numuni nene ziki akúvasikiko gehani nene amupiló amupiló iki mililiki itekutí gululupaso asú inogo ive. Lekeza Ómasímo lukugutó vizinogo lekelitoka amómámini mogona gili vevesamamó nenazo, ámina suni lekelitoka utó oleketanogo ive.

Monó zavirusave lo hukoketamó

(*Mat 21:12-17; Mak 11:15-19; Zon 2:13-22*)

⁴⁵Loko Izesú loake, monó zagusaveú itike netá matá meina konaló vegená kimisele nahulake, ⁴⁶^b láa loko lo kimimó: Ómasímo li gako nene monó gotolaú láa liki luhuva gizinamóma neve: Není numunimú Ómasiloka loaká numunive liki litave. Láa liki gizinamóza, lekeza guminaló veta halá giki miniaká nia geha mulí lilí ikave.

⁴⁷^c Loko lo kemeake, gamena gamena monó zagusaveú nene monó gako lainim-oketamó. Lá noigo, guguni giziaká ve napagi monó mogona apí-ikimiaká vegi itó Zuta vegenalitini monó gizapa vegi keza apili hilita gapováamú vitagá amóza, ⁴⁸vegená mukilite Izesú li gako nene gámeme iki gili minikago, Izesuni apili hilita gapo ali utó amamó.

Izesuni zámuzamú loká itamó

(*Mat 21:23-27; Mak 11:27-33*)

20 ¹Lá niago, nene gamenaló Izesú nene monó zagusaveú itike monó lainim-oketoko gako lamaná lo utó oko lo nokimigo, guguni giziaká ve napagi monó mogona apí-ikimiaká vegi monó gizapa vegi iki anitiake, ²imaneloka azozá loló ani netá nene éahini gakató lá ane, itó éaho litó loló ape, lo lemezo. ³Liki loká imikago, eza láa loko lo kimimó: Nezagi ámina oko gako hamó loká oleketanogo uze, lekeza li nimilo. ⁴Zoní monó nagamí holokimiaká hoza alimó nene, hikutí ale utó ive. Ómasímini gakató alihe itó vegenalitini gakató alive. ⁵Loko loká okimikago, kezáitoka ligili hagili ake nene gakató nana oko lo viligoko lo amitune liki gelemó nene gopa okago, láa liki gelemó: Leza Ómasilokatí ale utó imole loko litunimó nene, íi, lekeza nanamú Zonini gakoláa gili alévolé amave loko linogo noimó. ⁶Itó vegená mukí nenete Zonikumú nene Ómasímini agepagutí gako loaká veve liki linamóma nenazo, hoza alimó nene hanuva vetinigutí ale utó imole loko litunimó nene gehanitunú lipili hilinigave. ⁷Liki nigeleke Izesuni láa liki li amemó: Zoní éahitotí hoza ale utó ihe loko nenémini mogonáa gele vevesamune. ⁸Liki likago, Izesú láa loko lo kimimó: Láa likima nene netá matá imane loló oaká nougo ániagiaká niamó nene éahini gakató lá oaká nouhe nenegi nezagi áminagó oko lo lekememinogo uve.

^b 19:46 Isa 56:7; Zel 7:11 ^c 19:47 Luk 21:37

Vain nagá minimú anoza gakó
(*Mat 21:33-46; Mak 12:1-12*)

^{9d} Loko loake, anoza gakó makó nene Izesú láa loko vejená lo kimimó: Ve makolímo vain nagá mini nene zuhá oake, gizapa iki nitiko meinava likimitove loko vejená makó gutá kemeake, haitó mikasiloka hotó voko gamena hána minamó. ¹⁰Noigo gihila guzá lati gamena alitokago, gizapa nia vejená nenete mikutí nagá gihila lugáa alinitiki atave loko gelekelé izegipa makó amiselekago, vo anitekago, keza mini gizapa vemate ámina ve apiliake nagá gihila amemake hanuva amisilikago golohá veva noitoka vimó. ¹¹Lá okago, gelekelé izegipala makó goha amiselekago vimó. Vo anitekago keza mini gizapa vemate gopoguka litake apiliake, hanuva amisilikago vimó. ¹²Lá okago, makóma amiselekago vimómámini agupe apilivi hukivi iake, hetoka alími ahulamó. ¹³Lá ikago, mini amelaho láa loko limó: Neza nana itove. Ma alími lamaná itahe loko nigika amenou gipáne amiselekago vitize. ¹⁴Loko geleake, amiselekago voko áminaló anitekago, mitó gizapa vemate ániagiake kezáitoka láa liki ligili hagili amó: Imanémo nene mikasi amelahini gipala nenazo, áisi nene minokoko olopa ve molokoko imane hoza ale lá itimó nenazo, helisa henonima lelí loló itive loko mota apele hilitune. ¹⁵Liki liake, nagá gihila mikutí ahelú iliki vake losé apili helemó. Lá inamó nenazo, nagá mini amelaho aniteoko ámina mikú hozaló vema nene nana oketative. ¹⁶Áisi okoko gizapa vema kepele heleoko ámina vain mini nene haitó gizapa ve lamaná lehizeketanogo ive. Loko Izesú lokago, giliake, keza eé, lá oko nomive lamane. Liki likago, ^{17e} geleake, gonú nokipilike láa loko lo kimimó: Láa likima monó gotolaú gakó láa liki luhuva gizinamóma nenémini mogonamú lekeza nanave liki nigeleve:

Numuni giaká vete gehani napa makó ániagi ahulamó nenémo geha lapusa alévoleláa loló oake noive.

¹⁸Ve makó nenete ámina geható velehé limitamó nene ziki nogotanigave. Itó ámina gehani nenémo ve makolímini amupiló alemó zitimó nene, ámina ve nene zeko lanahana inogo ive.

Kugupe meina hizeaká gakó
(*Mat 22:15-22; Mak 12:13-17*)

¹⁹Loko lokago, monó mogona apí-ikimiaká vegi guguni giziaká ve napagi keza ámina anoza gakokutí gehanimú limó nene Izesuni ániagi ahulunikumú lokave liki giliake, ámina gamenaló agizató alekinake nagá amitune liki lamóza, lá itunimó nene vejenalite nana ilitatave liki kehelele vizimó. ²⁰Kehelele vizekago, Izesuni apilita gamenamú

^d 20:9 Isa 5:1 ^e 20:17 Age 118:22

gizapa iki niake keikutí ve makó kimisilikago, vake amamaka miliki minake, Izesú gakó lo gopa itikumú amamaka moloko noinake gakó makó lokiko hee lamikoma agulizaki ve napámini agizakú molokuko nagá amitave liki vevesina vegetana lilí iki minake, ²¹Izesuni láa liki loká itamó: Tisalemaka, geza ve vená lainim-okimiaká noani gakó nene hee lokogó nego geleaká nune. Geza vejená mukí ánigo hamó lelegí oko áinigokanike, Ómasímini gapo kelepipize vevesoaká noane. ²²Geza nanave loko nogelene. Loma apatoka gamanímini agulizaki ve napa Sisani nene takisi moni ameaká nouhá nene etahe etamive. ²³Liki lamó nene etamive loko lokikoma gamaniloka goní otatune itó vatí okove loko lokikoma Zuta vejenalite gili golesa itave liki amekú miliki la gakó nogilike, láa loko lo kimimó: ²⁴Lekeza moni makó nelepipizilo. Ámina moniló noi vogunahana imanegi itó luhuva imanegi éhini neve. Loko lokago, gamani ve napa Sisani neve. ²⁵Liki likago, láa likima nene, gamanímó voká loaká noi netá nene gamani amilo, itó Ómasímó voká loaká noi netá nene Ómasi amilo. ²⁶Loko Izesú limó nene gámemé iki linamómámini gelehugitú lá oko avilegekago, sigaga liake kegepaló gena okago, vejenalitini kovogisaló agizató alemisá amó.

Hilinitakutí otiakakumú loká itamó

(*Mat 22:23-33; Mak 12:18-27*)

²⁷Lá okago, Satukaio monó vejená keza hilinitakutí otisá amave liki liaká a vejená lugáate Izesutoka iake, ^{28^f} láa liki loká itamó: Tisalemaka, Mosé nene luhuva láa loko gizo lemeneimóma neve: Ve makolímó vená alitimó nene, izegipa getamoko mino-loko voko helekikoma, agunalámo ámina gevoná vená alekoko uvolaho hili vemú izegipala geto molative loko luhuva gizamó neve. ²⁹Lá okanazo, uvolaho agunala 7-a minamó. Lá iki niake ganá ve nenémo vená aleake, minoloko novike izegipa getamike helekago, ³⁰ agunala makolímó áminámini okago, ³¹ agunala makolímó áminámini okago, keza ve 7 nenete ámina vená ali volaló imaló iki minake izegipa getamake hili asú ikago, ³² ámina gevoná vená nene minake alika hilimó. ³³ Ámina ve 7-a nenete ámina vená ali volaló imaló iki minamó nenazo, hilinitakutí goha otita gamena nene ámina vená nene éhini venala minative.

³⁴Liki likago, Izesú láa loko lo kimimó: Lekeza imane gamenaló vená aliká itó vená alimi kimiká iaká niamóza, ³⁵ Ómasímó vejená makokumú nene alika gamenaló hilinitakutí otitatímini mututoni niave loko loketonoimóma nenete vená alisá amave, itó vená alimi kimisá amave. ³⁶Keza ageló nenéminiki goha hilisá amave. Hilinitakutí otita vejená nene Ómasímini mututoni miniki gosohá kemetamenigi minanigave. ^{37^g} Itó heleakakutí

^f 20:28 Gapo 25:5 ^g 20:37 Gá 3:6

oteakakumú nene lo likimitoze, gililo. Mosé ámina netakumú gakó makó lo lemeneimóma neve. Eza zamukutí ló guluma i gakó gizake hele vegeñalitini mogonamú gilike Guivahanimú nene láa loko limóma neve: Eza Avalahani Isakani Zakoponi keí Ómasi minamó nominave. ³⁸Loko limó nenazo, hele vegeñaki ha nia vegeñaki nene Ómasímini agómulaló nene ha nia vegeñakó niave loko áñigo nominamó nenazo, nenemú kemeni helenei vegeñalitini Ómasi negopa, kemenía hanuva ne vegeñalitini Ómasi noinazo, Ómasimú gili zaginake hele vegeñaki hanuva nia vegeñaki keí Ómasi noive. ³⁹Loko lokago, monó mogona apí-ikimiaká ve lugáate tisalemaka, gakó lamaná lokane. ⁴⁰Liki liake, goha gámémé iki loká itakumú kehelele vizekago, loká itamisá amó.

Gologí oketative loko lo moloketa vemú loká oketamó

(Mat 22:41-46; Mak 12:35-37)

⁴¹Lá niago, eza láa loko lo kimimó: Gologí oleketative loko lo mololeketa vemámo agulizaki ve napa Tevitini agávolaho noive liki nanamú liaká niave. ⁴²^h Tevití eza Ómasi agepoka liká nama liká a gakokutí láa loko luhuva gizonoiomóma neve:

Mezaú ve eza není Guivahaníne nene není nigizani zamagaloka minoloko voko noako, ⁴³gala vega nene gigisa lapuvauka ahuloketanogo uve loko lo amimó neve.

⁴⁴Tevití ámina vemú nene Guivahaníneve lokamó nenazo, gologí oleketative loko lo mololeketa vemámo nana igo Tevitini agávolahogó neitive. Tevitini guivahanigi neitive.

Monó mogona apí-ikimiaká a vemú alévolé oko lo hukonoimole

(Mat 23:1-36; Mak 12:38-40)

⁴⁵Loko Izesú loake, vegená mukilite nigelego, izegipala zuha láa loko lo kimimó: ⁴⁶Monó mogona apí-ikimiaká vemú lekeza, ehe. Keza nene luhiaká gó hána luhatakumú, itó maketiloka vegená makolite geké vaké likitatakumú, itó monó numukú numukú vegená kovogisaló minoaká holomaló minatakumú, itó nosánetá napa ninató agepaló iti mina siató minatakumú kumu heleaká noive. ⁴⁷Keza gevoná venalitini henokanoni gumina i asú iká itó kegepatunú soza miliki Ómasi agepoka hána liki Ómasiloka liká iaká niave. Ámina ve nenete lihima napa genavagi alinigave, loko limó.

Gohogó vená gevonalímo moni ahulamó

(Mak 12:41-44)

21 ¹Izesú nene monó zagusaveú minake okenava oko áñigamó nene henóiki vegeñalite moni moloaká pokisigú moni nimilago

^h 20:42 Age 110:1

ánigamó. ²Lá noigo, gohogó vená gevoná makolímo golohá moni lositá nene áminagú nomolago, ángoake, ³izegipala zuha láa loko lo kimimó: Neza lamaná lo likimitoze, gililo. ⁴Vegená imanete vaí o mina monigutí ahulamóza, vená gevoná imanémo gohogó noikutí nosá meina hizitimoláa ahulo asú okamó nenazo, áisi moni ahulamó nenémo keza moni ahulamó kivilegekamó gelekave, loko limó.

Monó zavusave ali golesa itakumú epoapoga limó

(Mat 24:1-2; Mak 13:1-2)

⁵Izegipala zuha makó nenete monó zagusave nánigake gehani lamanaláatunú ginamó itó gonanalisi lamanaláa áminaló minamó nene ángiake sigaga nilago, Izesú láa loko lo kimimó: ⁶Lekeza imane netá itína nánigamó nene alika gamena atitó nene lova ve makolite imaneló gehani mukí apiliki tele vizikiko, gehani nene amupiló amupiló iki mililiki itekutí gululupa so asú inogo ive. ⁷Loko lokago, keza loká itiki monó gizapa velemaka, itína lani netá nene nanahé gamena utó itive, itó nana anosa utó okiko ángokinake lani netá nene mota alévolé inogo ive loko litune. ⁸Liki likago, eza láa loko limó: Ehe, lokogoka vizitakumú gizapa ilo. Vegená mukilite nanitiki nugulizató liki okulumakutí lumu ve gihila nezama nouve nilikoma, itó gamena mota ávatiha okave nilikoma, kémegetiki vamilo. ⁹Itó mikasi makotokatí lova napa hiziki niiko, itó holitikutí lova utó noiko, lekehelele vizemino. Nenémini suni nene goí oko utó itive loko lonoimóza, mukí netá matá litá oko asú aminogo ive.

Gopoguni nimilikitiko anosa napa utó itive

(Mat 24:3-14; Mak 13:3-13)

¹⁰Loko loake, miní amike láa loko lo kimimó: Numutó namató ve mukí nenete gala venini lova ali nikimiko, agulizaki ve makolímini zuhagi makolímini zuhagi lova hizinigave. ¹¹Itó mukí mikasiuka imimá napa noiko haitopaitó mikasiuka gaúna gamena napa utó oko minoloko noitiko, itó vejená mukí kivise asú iti netá napa utó noiko, okulumató mulutini pou liti netaki utó noiko, anosa napa napa makó utó inogo ive. ¹²Lá itimóza, ámina suni utó onamiko likigizató aliiki gopoguni mililitikiiki monó numukuki nagá numukuki goní ilikitatave. Lá niiki není nugulizá lekelitoka minakumule liki likigizató aliki kugulizaki ve napatini itó kiategini kovogisaló likilími milikiko, ¹³lekeza není mogonamú gili alévolé inamó nenémini gakoláa li utó iki li kimitave. ¹⁴ⁱ Nenemú itína lakagata gili nivevesiki láa liki li hukalo: Goní nilikitikoma nila gakotó nanave loko lo kimitupe liki goí iki lakagata gululusi gelemilo. ¹⁵Nénisi lekegepa ale vávani okinake gakó loakatini lekemekugo litamó nenazo,

ⁱ 21:14 Luk 12:11-12

gala velinite ma lekehelú aminigave. ¹⁶Izotike ametike uvotike lekeli zuhagutí makolite likigivetike kezagi likigizató aliiki goní ilikimikiko, lekelikutí makó lugáa likipili hilitave. ¹⁷Lá niiki není nugulizá lekelitoka minakumule liki vejená mukilite mukahá likipilitamóza, ¹⁸likigika makó gopa aminogo ive. Avasavagi hanuva minanogo ive. ¹⁹Lá itimó nenazo, lekeza alévolé iki oti minatamó nene, alévolé lekemetamenigi minanigave.

Zelusale apá ali golesa itakumú epoapoga limó

(Mat 24:15-21; Mak 13:14-19)

²⁰Lá iki niiki, Zelusale apatoka lova vetini gimisigi vete iki hizi vejo niikoma, lekeza nene netá matá otuhá apatekiko, gámé loló iti gamena alitokave liki gililo. ²¹Lá niiki nene Zutaia mikasigú nita vejená nene agokaló golisi nitiko, Zelusalega vejená nene, ámina apá nahuliko, Zelusale numutoka gahevaloka nia vejená nene nenegú iteminigave. ²²^j Ámina gamenaló nene netá golesáinímini lihimaváini kimiti gamena nenazo, monó gotolaú luhuva gizinamóma utó oko alévolé o asú inogo ive. ²³Kee, izegipa kagatupagi nita venaki izegipa namuni aminí nikimita venaki, ámina gamenaló nene nana itamó neve. Imane mikasiuka genavagi netá utó okiko, Ómasímini izapaló molati netá nenémo imane mikasiuka vejená hize viginogo ive. ²⁴Lá okiko, lugáa sopolotunú likipili hiliiki lugáa nene nagá likimiiki numutó namató likilími milikiko, hetoka vete nene Zelusale apá lisiki nogotiki miniliki viki niiko, hetoka vegenalitini gamenaváini lutiginogo ive.

Okulumakutí limi ve gihila atiginá iti gakó

(Mat 24:29-31; Mak 13:24-27)

²⁵^k Okulumató ho sonohí ikani nenémo haitopaitó avevezaha noiko, age nagamí valahuká zeko sasa loko noiko mikasiuka vejená mukí keza anó nigiliki ininá niiki mulúini pou noliko, ²⁶okulumató amuzavagi netá mukí nene mómoká i asú iki haitó suni alitamó nenazo, lá itakumú kehelele vizititímo kovonana noviziko, mikasiuka alévolé suni utó inogo noitímo mulutini itinogo ive. ²⁷^l Lá okiko, okulumakutí lumu ve gihila neza zámuzánegi itó lapanánegi nene límusi amupiló nolumugo ánganigave. ²⁸Nenemú ámina suni utó noiko, lekeza oti hee liiki okenava iki ángiiki, gologí oletati gamena nene mota alitokave liki gililo.

Gohuna zámuni anoza gakó

(Mat 24:32-35; Mak 13:28-31)

²⁹Loko Izesú loake, anoza gakó makó láa loko lo kimimó: Gohuna zahe za makó ahe ángiiki gililo. ³⁰Za agila nene guluma sekago lekeza ángiake

^j 21:22 Hos 9:7 ^k 21:25 Isa 13:10; Zoe 2:31; Ali 6:12-13 ^l 21:27 Tan 7:13; Ali 1:7

hogaí gamena mota alitokave liki giliaká niave. ³¹Ámináminoko nolu suni utó noiko Ómasímo gizapa oleketati gamena mota alitokave liki gilinigave. ³²Neza lamaná lo likimitoze, gililo. Imane gamenaló nia vejená velesá hili asú inamiko imane nolu netá mukí utó inogo ive. ³³Okulumaki mikasigi tolova itáiha, není gako nene, ma gopa oko tolova aminogo ive.

Gizapa iki minalo loko loketamó

³⁴Ehe, lekeza lekemeni gizapa lamaná ilo. Negi nagi hizeaká sunímo itó negi nagamí vauva aleko noaká sunímo itó lakagata gululusi geleaká nenémo gena likivisekiko, gamena napa lekelitoka galinali utó olimikatize. ³⁵Ámina gamena napa nenémo gelehugíú nenéminoko imane mikasiuka numutó namató vejená mukí likipilinogo ive. ³⁶Lekeza Ómasímo amuza lekemekiko ámina utó iti netá olové noinake okulumakutí lumu ve gihila není novogisalo ote minatune liki Ómasiloka liki gizapa iliki viki minalo.

^{37^m}Loko Izesú lo kemeake, gamena gamena nene monó numuni napagú gako lo kemeake, holugú nene ámina apá ahuloake, zopega makó agulizá Olivi agoka nenegú iteko akoaká imó. ³⁸Lá noigo, vejená mukí nenete neteká holugú ake monó zavusavegú nene Izesutokatí gako gilinigi alegesá iaká amó.

Izesuni apilinigi lova gizamó

(*Mat 26:1-5; Mak 14:1-2; Zon 11:45-53*)

22 ¹Lulu vizemi peleti niaká a holisi agulizá napa nene avóikini asenini zeketakumú gili mina holisi nene alitokago, ^{2ⁿ}guguni giziaká ve napagi monó mogona apí-ikimiaká vegi keza vejená mukikumú kehelele vizekago, Izesuni apili hilinigi gapováamú hanuva gizapa iki minamó.

Zutá Izesuni amimika litove loko lo hutamó

(*Mat 26:14-16; Mak 14:10-11*)

³Lá niago, Satá nene Izesuni vejenala zuha 12 keikutí Kaliotó numutotí ve Zutani mulunagú lemeake alémo vávani igo, ⁴eza vike guguni giziaká ve napagi itó monó zavusavegú pilisí vegi gako akó lake, Izesuni amimika loko keitoka alémoko atitímini gakola ligili hagili amó. ⁵Lá niake, keza kogoliza vizeke hutono gehani nene Zutani amitune liki li hutamó. ⁶Li hutikago, Zutá nene konotó aleko mukí vejená alegesá inamiko keitoka amimika linogo amapani molamó.

Izesú izegipala zuhagi asenini zekimiaká nosá namó

(*Mat 26:17-25; Mak 14:12-21; Zon 13:21-30*)

⁷Lulu vizemi peleti niaká a gamena asenini zeketakumú gele minoaká holisimule liki sipsip iza akaleva apiliaká a gamenama alitokago, ⁸Izesú

^m 21:37 Luk 19:47 ⁿ 22:2 Gá 12:1-27

nene izegipala zuhagutí lositá nene Zonímagi Pitámagi nokimisilike láa loko limó: Lekeza viki asenini zekimiaká nosá ali vavá ikisiko leza natune. ⁹Loko lo kemekago, keza nosánetá hikú ale vavá onetatíve loko nolane. ¹⁰Liki likasigo, Izesú láa loko lo kimimó: Gililizo. Lekeza nene taoniloka viki nanitisiko ve makolímo paisele somo nagamilagi geheneiko, gapoló hotu nilikima ámina ve ámegetiki viiki eza ititi numukú nene itilizo. ¹¹Itiiki numuni amelahini láa liki li amilizo: Tisalémo nezagi izegipáne zuhagi avotegini asenini zeketakumú gele minoaká nosá natuni numuni agika nene hiláauka neve liki loká ilizo loko lokago lo nogumusive. ¹²Liki likisiko, numuni agika veletó nego netá matá avilisá ohá lekelepizitive. Neneló nosánetate ali vavá ilizo. ¹³Loko lo kemekago, vasike ángasimó nene, lo kimimómáminoko nego ángikasike, asenini zekimiaká nosánetáma ali vavá asimó.

Lepa nosá apí oko kimimó

(*Mat 26:26-30; Mak 14:22-26; 1 Koli 11:23-25*)

¹⁴Lá ikasigo, nosánetá nata gamena alitokago, Izesúma aposologegi minake nosánetá niki minamó. ¹⁵Lá iki niake Izesú láa loko lo kimimó: Imane asenini zeketakumú gele minoaká nosá nene miluma velesá gelenaminake lekezagi natune loko mulúnegú lamaná geleloko voko minumó neve. ¹⁶Lá onoimóza, makó lo likimitoze, gili minalo. Nosánetá imane goha naminake minoloko voko Ómasímo gizapa oleketatitímini gapováa utó okiko nanogo uve. ¹⁷Loko loake, vain goni makó aleake, Ómasi agepoka loake láa loko limó: Lekeza imane gona miliki nalo. ¹⁸Gakó makó lo likimitoze. Imane gamenalotí veletó nene vain nagalímini gihilagutí goha naminake, minoloko vinake Ómasímo nugulizaki vetipo loló onetati gamena utó okiko natove. ¹⁹⁻²⁰Loko loake, peleti makó aleake, Ómasi agepoka loake gitegeko gona moloko nokimike láa loko limó: Imane není mémeláne neve. ²¹^o Lá onoimóza, ángalo. Není nimimika liti vegi holoma hamotó minusike, ligizani ahuloko nosánetá aleko noko nousive. ²²Okulumakutí lumu ve gihila neza vozo loko loneta gapoloka hilito gapogú novumóza, není nimimika liti vema nene agae, lihima genavagi alinogo ive. ²³Loko lokago, izegipala zuha keza éaho lá itikumú nolihe liki liake kezáitoka lokatoká amó.

Éaho agulizaki ve loló itive liki lova sava amó

²⁴^p Lá iake, izegipala zuhamate lelikutí éaho agulizaki ve loló itive liki lova sava amó. ²⁵^q Lá ikago, Izesú láa loko lo kimimó: Mikasiuka hanuva vegenalite gelekelé ikimiake kagahisiuka limitigí iki niago kugulizaki véinite alévolekutí gizapa ikimiaká niave. Itó kugulizaki vete

^o 22:21 Age 41:9 ^p 22:24 Luk 9:46 ^q 22:25 Mat 20:25-27; Mak 10:42-44

legepoka litave liki liaká niamóza, ^{26 r} lekelitoka nene lá oko minamino. Lekelitokatí itiki minamoláate nene limiki mina vejená nenéminiki minataze. Itó lekelí gizapa ve nenete hanuva lemetigí iki gelekelé ve nenéminiki minataze. ^{27 s} Lekelisi lilo. Éaho agulizaki ve noive. Nosánetá hanuva minoko natimó nenémohe, itó nosánetá vatá oko ale vavá otati ve nenémo agulizaki ve noihe. Hanuva minoko natimó nenémo agulizaki ve noitimóza, nénisi nene lekelí holutikú nene agulizaki ve suni alemoko gelekelé izegipagitana loló oko minoaká nouve.

²⁸ Lekeza nene gasova netalímini agikagú nougo lekeza áminagú nilími vatí iki miniaká niave. ²⁹ Améneho vejená mukí gizapa oketatane loko lonetamó áminámini oko neza hoza gakó nololeketuve. ^{30 t} Lekeza gizapa okimiaká noutó miniki nosánetá niki lokogoliza vizitave loko itó gonanalivagi siató miniki Isilae vejenalitini mulusi 12 gizapa ikitiki gona milikitanigave loko nololeketuve.

Izesú Pitá egamega otatikumú epoapoga limó
(*Mat 26:31-35; Mak 14:27-31; Zon 13:36-38*)

³¹ Saimon, Saimon, laisi lotuva lake gizaká iki alími etó iaká niamómáminoko Satá nene lekeza aí agizakú hilikiko gizaká oko lekelémo etó inogo lonoimóza, ³² nénisi nene gele alévolé animó nene gologolo samitive loko Ómasiloka loaká nouve. Lá onoumó nenazo, geza monó gapoló goha atiginá oko voko minokoko, gigivekagini hize lé oketozo. ³³ Loko lo amekago, Pitá láa loko lo amimó: Guivahanínmaka, geza kalapusi numukupe itó gipili hilinitamope nezagi áminagú vinogo uve. ³⁴ Loko lokago, Izesú láa loko lo amimó: Pitaga neza lo gimitoze, gelezo. Itína holugú nene okoloho nenémo velesá anó molonamiko geza nenikumú ánigonamuve loko egamega onetatanimó gamena losive makole inogo ive.

Gopoguni mililitatamó nenémini amupiló minatunikumú ale vatí ituni gakó

^{35 u} Loko loake, láa loko lo kimimó: Goí oko nolikimisuluke, moni gúeaká gó itó akiseaká gó itó likigisalo suú aliki vamilo loko lo lukumu gamenaló nene nivake netá makokumú vitagá amó nehe. Loko lokago, keza óve liki likago, ³⁶ eza láa loko lo kimimó: Lá ikamóza, itína gamenaló moni gúeaká gó ahe akiseaká gó ahe ale neiti vemámo aleko vitive. Itó sopoló hána alenamiti vémo nene hepé golatotí moni alekoko sopoló hána meina hizitive. ^{37 v} Neza lamaná lo nolukumuve. Monó gotolaú gakó makó láa liki luhuva gizinamó nene nenitoka utó inogo noive:

Netá golesa aliaká nia vetini kigivéipo noive liki aiki gatamó.

^r 22:26 Mat 23:11; Mak 9:35 ^s 22:27 Zon 13:12-15 ^t 22:30 Mat 19:28

^u 22:35 Mat 10:9-10; Mak 6:8-9; Luk 9:3, 10:4 ^v 22:37 Isa 53:12

Itó monó gotolaú luhuva mukí nenikumú gizinamó nene nenitoka utó oko alévolé noive. ³⁸Loko lokago, keza nene Guivahanitemaka, áníhozo. Sopoló hána losi imane neve. Liki likago, eza není gako gelemaze, áminasile loko lo kimimó.

Izesú zazuahagú Ómasiloka loko minamó

(Mat 26:36-46; Mak 14:32-42)

³⁹Nenetí hetoka lemeake vike, eza goí oko aleaká imómámíni oko alinogo Olivi agokaú noitigo, izegipala zuhamate ámegetiki vamó. ⁴⁰Olivi agokaloka vo alí nolike izegipala zuha láa loko lo kimimó: Lekeza imaneló miniki lekemekú milatakumú gopa okatune liki Ómasiloka liki minalo. ⁴¹Loko ahulokimiake, alitóisi minomo novike, alapusa nohizike Ómasiloka láa loko limó: ⁴²Aménega, geza lá itove loko gelekokoma genavagi gihinitata netá imane nenitokatí ale olové itane loko nogulumóza, není nigikaloka molamoko gefí gigikaloka molatane loko noluve. ⁴³Loko noligo, okulumakutí ageló makó limike utó o amike hize lé otamó. ⁴⁴Lá okago, miluma alévolé oko nogilike, amuza moloko Ómasiloka noligo, govísi apilimó nene golani nenéminoko mikasiuka aleloko limimó. ⁴⁵Lá noigo, Ómasiloka loko minatotí oteake, izegipala zuha niató goha oake, netá golesa utó itikumú miluma giliki kovó akinago oko áníhoake, ⁴⁶kelémo oteake láa loko lo kimimó: Lekeza nanamú lokovó akinave. Lekeza otiiki lekemekú milatakumú gopa okatune liki Ómasiloka liki minalo.

Izesuni amimí okago alemó

(Mat 26:47-56; Mak 14:43-50; Zon 18:3-11)

⁴⁷Loko lo kemeko noigo, Izesuni vejenala zuhagutí ve makó Zutá áisi nene goí o kimigo vejená mukí iki Izesutoka iki alegesá amó. Lá ikago Zutá nene Izesuni agoka agepa legeko nanogo noitoka omo alí noligo, ⁴⁸Izesú láa loko lo amimó: Zutazo, geza okulumakutí lumu ve gihila není nogoka negepa legeko nanogo nimimika linogo noape. ⁴⁹Loko lokago, Izesuni amatoka mina vete nene utó inogo i netá nánigake Guivahanitemaka, sopolotunú kipilitupe. ⁵⁰Liki nilake, keikutí ve makolímo nene guguni gizoaká ve napámíni gelekelé izegipala nene sopolotunú apilike agata zamagaloka zeko isimó. ⁵¹Lá okago, Izesú nenéminí suni alemo loake, agizani lutoko ámina vemámíni agataló ale nogilike agata alémo lamaná otamó. ⁵²Alémo lamaná omiake, guguni giziaká ve napagi monó zavusavegú pilisí vegi monó gizapa vegi Izesuni agizató alitune liki a vema láa loko lo kimimó: Lekeza nenikumú gelemó nene laskoli nougo sopoló hánagi gelekahosigi aliki niake nigizató alinigi niahe. ⁵³ ^w Gamena gamena lekezagi monó zavusave napagú minoaká

^w 22:53 Luk 19:47, 21:37

umó nene, nigizató alisá amamó neve. Lá ikamóza, itína nene lekeli gamena nego, límugusi amelahini Satani amuza netá mota utó okave.

Pitá Izesuni egamega otamó

(Mat 26:57-58,69-75; Mak 14:53-54,66-72; Zon 18:12-18,25-27)

⁵⁴Loko lokago, Izesuni agizató aliake, alímiki vake guguni giziaká vetini gizapa vémini numukú alímiki itemó. Lá niago, Pitá nene hotó otigí oko kémegetoko novigo, ⁵⁵ámina numukú hé numunaló holutó nene ló giziake minamó. Lá iki niago, Pitá kezagi makó minamó. ⁵⁶Eza ló hanatolaloka ló lotá oko noigo, gelekelé vená makolímo ángoake, gonukonú napilike imane ve nene Izesuki miniaká asi ve noive. ⁵⁷Loko lokago, eza egamega ike venáage, neza ángonomu vemú nolane. ⁵⁸Loko lokago, koma noigo, ve makolímo Pitani ángoake geza nene ámina vémini zuhagutí noane. Loko lokago, Pitá nene vémage, neza noamuve. ⁵⁹Loko lokago, gamena koma novigo, ve makó nenémo pigi vizeko ezagi Galilaia anoki ve noinazo, lamaná ezagi makó minasimó neitive. ⁶⁰Loko lokago, Pitá nene vémage, geza nolani gakoka ma gelemu gakó nolane. Loko noli agepági okolohomámo anó molamó. ⁶¹Anó molokago, Guivahanímo mino viligake avogisa o amike Pitani ángimó. Ángokago, Pitá eza Guivahinímo amunaló lota gakó nene itína okoloho nenémo anó molonamiko egamega onetatanimó nene gamena losive makole inogo ive loko lo ami gakóma goha nogilike, ⁶²agika hizekago, lemeko hetoka ive napa imó.

Izesuni gopoguka nilitake kigizanitunú apelemó

(Mat 26:67-68; Mak 14:65)

⁶³Lá okago, Izesuni agizató ali mina vete gopoguka nilitake kigizanitunú napeleke, ⁶⁴agómualó lavolavo gotunú zi hitimiake láa liki lamó: Geza lo utó oko lo lemezo. Éaho nogipilive. ⁶⁵Liki liake, alivi letivi iki haitopaitó gakó litiki minamó.

Kansoletini kogómualó Izesuni goní itamó

(Mat 26:59-66; Mak 14:55-64; Zon 18:19-24)

⁶⁶Niago, neteká gó lokago, Isilae mikasiuka gizapa ve keza guguni giziaká ve napagi monó mogona apí-ikimiaká vegi alegesá iake, monó kansoletini niatoka Izesuni alímiki viake ⁶⁷geza gologí oletative loko lo mololeta vema nookoma lo lemezo. Liki likago, eza láa loko lo kimimó: Neza lo likimitomó nene lekeza gili alévolé aminigave. ⁶⁸Itó áminamú loká oleketatomó nene lekeza nonotó aliki li nememinigave. ⁶⁹Lá onoimóza, imane gamenalotí veletó nene okulumakutí lumu ve gihila neza amuza ve Ómasímini agizani lamagaloka minanogo uve. ⁷⁰Loko lokago, keza li amiki nilake láa lokoma geza Ómasímini gipala nouve loko nolape, olo. Liki likago, eza lá onoive liki lekezatini mota likave.

⁷¹Loko lo kemekago, keza láa liki lamó: Aí gakola gilina vejená makó nanamú sele lokinake gakó makó gilitune. Aí agepagutí láa loko lokago mota gelekunimóma neve, liki lamó.

Izesuni alímiki Pilató noitoka vamó
(*Mat 27:1-2,11-14; Mak 15:1-5; Zon 18:28-38*)

23 ¹Láa liki liake, keza mukitó otiake Izesuni alímiki Pilató noitoka vamó. ²Alímiki viake, apí iki goní itake láa liki lamó: Imane vémo leza Zuta vejená lelémo gopa oaká noike, takisi moni nene Loma vejenalitiní gamani agulizaki ve napa Sisani amemilo loko loake, ezámú nene nugulizaki ve napa gologí oleketatove loko lo mololeketa vema nouve loko loaká noiwe. ³Liki likago, Pilató eza Izesuni loká otake geza nene Zuta vetini kugulizaki ve napáini noape. Loko loká omikago, Izesú nene gezaka lokanimole. ⁴Loko lokago, Pilató nene guguni giziaká ve napamagi mukí vejenámagi láa loko lo kimimó: Neza imane vémini lihimavalamú vitagá umó nomive. ⁵Loko lokago, keza pigi vizeke láa liki lamó: Eza mukí vejená kelémo otopá zemo novike Galilaia mikasiuka apí oake, Zutaia mikasiuka vo asú okoko gakó lainim-oketomo novike imaneló omo anitekave.

Izesuni Heloté noitoka alímiki vamó

⁶Liki likago, Pilató nene gakóini geleake, imane ve nene Galilaia mikasiuka ve noihe. ⁷Loko loká okimiake, Izesúma Heloté gizapa onoi mikasiukatí ve noigo geleake, itó Heloté nene ámina gamenaló Zelusalega minamó nenazo, Izesuni nene Heloté noitoka alímiki vilo loko amiselekago, alímiki vamó. ⁸Lá ikago, Heloté nene Izesuni gakó gozapá geleko minamó nenazo, Izesú nene avevezaha makó okiko ánígatonazo loko agata gelekelé oko noitotí nene Izesuni áníhoake agoliza goha vizimó. ⁹Lá oko noiwe nene, Heloté nene Izesú oko moloko i netá mukikumú loká otamóza, Izesú nene Heloté li gakotó ma anotó aleko lo amemimó. ¹⁰Lá noigo, guguni giziaká ve napamagi itó monó mogona apí-ikimiaká vemagi keza aí amatoka otinake amuza miliki goní itamó. ¹¹Lá ikago, eza ve golesa noigogitana Helotege itó gimisigi véate gopoguka litamó. Gopoguka limiake, agulizaki ve napámimi luhoaká gó lamanaláa luhimiake, Heloté nene Pilató noitoka goha amiselekago vimó. ¹²Lá okago, Heloteko Pilatoko keza nene gozapá gala ve lilí iki minasimóza, nenelotí goha zogo milasimó.

Izesú hilitive liki goní itamó
(*Mat 27:15-26; Mak 15:6-15; Zon 18:39-19:16*)

¹³Lá ikasike, Pilató nene ve vená mukí itó guguni giziaká ve napagi monó gizapa vegi kelémo nupa oake, ¹⁴láa loko lo kimimó: Lekeza imane ve nenitoka alímiki iake, vejená kelémo otopá zeaká noiwe liki lamóza, lekelfí

lokovogisalo aí mogonamú vitagá umó nene, gililo. Lekeza netá matá golesa alikumú goní notune liki lamóza, neza nene vitagá umó ma ale utó amuve. ¹⁵Heloteki eza ámina oko lihimavamú vitagá imó nene nomigo lelitoka amiselekago okave. Lá onoize, gililo. Eza nene netá golesa makó alilina, apele hulutilinamóza, lá oko nomimó nenazo, ¹⁶⁻¹⁷neza lokugo uheni nagasunitunú apiliiki amisilikiko hanuva vitive. Loko lokago, ¹⁸keza ganaganagó gamoga giki láa liki lamó: Imane ve nene agoka legesó itize. Palapasini nene gologí omikako lelitoka ino. ¹⁹Liki lamó nene Palapasí nene Zelusale apakuka gamaniloka lova gizoko kipili vémo lova hizeko ve makó apele helekago, nagá numukú ahulikago mina vemú lamó. ²⁰Lá noigo, Pilató nene Izesuni gologí otatove loko geleake, gakó goha lo kimimóza, ²¹keza pigi viziki malipo zaló hilitikumule, zohota zaló hilitikumule. ²²Liki likago, Pilató goha láa loko lo kimimó: Nanamú. Nana netá golesa alekago nilave. Aí apele hilituni mogona makó ale utó amuve. Lá onoinazo, neza lokugo, uheni nogosanitunú apiliiki amisilikiko hanuva vitive. ²³Loko lokago, keza Pilató li gakó zivi hitivi ake pigi viziki gakó napagutí zohota zaló nagá otamane liki la gakólímo Pilatoni gakó alémo amunauka imó. ²⁴Lá ikago, Pilató nene keza negénegeka liki lakumú keí gakó lá itove loko lo hutamó. ²⁵Lo hukoake, amunaló emane gamaniloka lova gizake lova ale utó oko ve makó apele heleake nagá numukú mina vemú gologí otative liki loká ita vema nene gologí omiake, Izesuni nene kezáini kagata gele netá lilí itave loko gimisigi vetini kigizakú kimimó.

Izesuni zohota zaló apelemó

(*Mat 27:32-44; Mak 15:21-32; Zon 19:17-27*)

²⁶Lá okago, Izesuni nene apilinigi alímiki nivago ve makó agulizá Saimon eza Apilika mikasiuka Sailini apatotí ve nene minaukatí taoniloka novike gapoló noigo ángiake, agizató aliake zohota zama gihimikago, agínagú geheake Izesuni ámegetoko vimó. ²⁷Lá iki nivago, mukí ve vená kémegetiki nivake, vená nenete miluma gilitake ive nama itimi vamó. ²⁸Lá iki nivago, Izesú nene mino viligoake láa loko lo kimimó: Lekeza Zelusale venáise, nenikumú ive amiki lekezatanimú itó lekezatini izegipatinimú ive ilo. ²⁹Gamena makó alitonoimó nene utó okiko láa liki litaze: Izegipa getinama vená itó izegipa nene aminí kiminama vená keza gohuna vená nene vatí iki minikave. ³⁰^x Liki liiki ámina gamenaló nene agoka napamú nene agae, agoka vozaneka, zeko akutooko oko hitoletatapo, liki linigave. Itó agoka komamú iki zi hitilitalo liki linigave. ³¹Loko loake, láa loko lo kimimó: Neza gosohá lokitana noumóza, není nene hanuva lokú gizatamó nenazo, lekeza osagava lokitana vejená nene nana ilikitatave.

³²Loko lokago, netá golesa aliaká asi ve losigi Izesunigi kipili hilinigi kilímiki vamó. ³³Kilímiki vake, apá makó agulizá gotóini gonosi helisa

^x 23:30 Hos 10:8; Ali 6:16

apale liki latoka anitiake, neneló Izesuni nene zohota zaló apiliki apatiake, netá golesa aliaká asi ve losima makó nene agizani sogaloka hizeke itó makó nene agizani lamagaloka apiliki apatemó. ³⁴ Lá ikago, Izesú nene aménega, gili vevesamake gopa netá nalemó nenazo, geza lihimáini ahuloketozo, loko limó. Loko lokago, keza nene Izesuni luhoaká gola nene éaho alitihe éaho alitihe liki satu zohí amó. ³⁵ Lá noigo, vejená mukí alegesá iki ánigi minamó. Lá niago, Zuta vetini gizapa ve nenete gopoguka litake láa liki lamó: Vegená kugutó vizeaká i vema eza Ómasímo alémo etó onoi ve nene gologí oleketative loko lo mololeketa vema nouve loko loaká i vema nenazo, ezáa agutó vizino. ³⁶ Liki liake, gimisigi ve nenetegi gopoguka nilitake ekesá vain nagamí natihe liki agokaú miliake, ³⁷ geza Zuta vetini kugulizaki ve nookoma, gezaka kugutó vizezo. ³⁸ Liki li namego, velé gotolaloka luhuva makó nene imane ve nene Zuta vetini kugulizaki veninive liki gizikago minamó.

³⁹ Lá onoigo, netá golesa aliaká asi vegutí magáámo láa loko Izesuni alevo letovo oko limó: Geza gologí oletative loko lo mololeta vema noitanimó nene, gezaka kugutó novizeko lezagi lugutó vizemane. ⁴⁰ Loko lokago, maga véa nenémo gahá amike láa loko lo amimó: Ezagi lezagi goní nilitake, hilitave liki lilitinamóma nenazo, nohelenike geza Ómasímú gehelele vizemihe. ⁴¹ Loko loake, leza nene lihimatemaló apasiki lipili nihelemó nene vevesonoimóza, imane ve nene lihimavala nomi ve hakupá netá aliki apili niheleve. ⁴² Loko loake, Izesuni láa loko lo amimó: Izesuvo geza kugulizaki ve loló ooko gizapa okimiaká hoza alitani zupa nene nenikumú gele minatane loko noluve. ⁴³ Loko lokago, Izesú láa loko lo amimó: Neza lamaná lo gimitoze, gelezo. Itína nene Palatisi zazuha apakú gezagi apizeko minanogo usive.

Izesú hilimó

(*Mat 27:45-56; Mak 15:33-41; Zon 19:28-30*)

⁴⁴ Loko noligo, holisaka gamena nene hómuni silikakéna gopa noike mukí mikasiuka nene límugusi ze asú oake mino-loko novigo únaká ho ale zohota imó. ⁴⁵ ^z Lá noigo, monó zavusavémuni gatetó Ómasímuni avogisaló iteaká gatetó zi lí ika lavolavo nene zeko hou lo losi imó nene lelí gahe ale koló imó. ⁴⁶ ^a Lá noigo, Izesú nene gakó napagutí nolike aménega, není nemeni nene geí gigizakú nomuluve. Loko loake, ahuu lo nahulake hilimó. ⁴⁷ Lá noigo, lovámuni gala vevatini gizapa vemámo utó i netáma ángoake, Ómasímuni agulizá ale otike lamaná imane ve nene hee loko noi ve minamó neve. ⁴⁸ Loko lokago, ámina suni ániganigi alegesá ina vejená nenete ánigiake, miluma napa giliake, kolómusaló zimi zimi atiginá iki

^y 23:34 Age 22:18 ^z 23:45 Gá 26:31-33 ^a 23:46 Age 31:5

numúitoka vamó. ^{49b} Lá niago, aí agivelagegi itó Galilaia mikasigutí ámegetiki a venaki keza nene hotó otigí iki otinake ámina suni ánígamó.

Izesuni gale zitamó

(*Mat 27:57-61; Mak 15:42-47; Zon 19:38-42*)

⁵⁰Lá ikago, ve makó minamó, agulizá Zosehé. Áisi nene Zutaia apá makó agulizá Alimataia loko noi numutó ve minamó. Eza ve lamaná itó veveso mina ve Zuta vetini monó kansole ve makó minamó. ⁵¹Lá imóza, kansole lugáate Izesuni apilitune liki kagata giliake lova gizi hukakumú nene gele kememi ve nenémo Ómasímo gizapa okimiaká ve alémo utó iti gamenamú gizapa oko mina ve minamó. ⁵²Áisi nene Izesuni gonosiva alinogo Pilató noitoka vike loká omikago, gele amekago, ⁵³zalotí apasoko aleko lemeake, gizopa gó lamanakú asapú omiake, aleko voko meikú geha mulí goló vatinakú nenegú ve vená makó gale zikitinamakú gale zetamó. ⁵⁴Palaitegú gale zetamó, avóikini asenini zeketakumú gili mina holisi gamena alí noligo nene. ⁵⁵Lá noigo, Galilaia mikasigutí Izesuni ámegetiki a vená nenete Izesuni gonosiváa nana oko gale zetatihe liki áníganigi Zoseheni ámegetiki vake gonosi milimilimagú viki ánígamó. ^{56c} Ánígiake, numúitoka atiginá iki vake gonosiváaló holotatune liki anuva hilina ali vavá amó.

Izesú heleneikutí otimó

(*Mat 28:1-10; Mak 16:1-8; Zon 20:1-10*)

Lá iake, ámina vená nenete holisigú Zuta vete li huginamómálo nene kavasú viziki minamóza,

24 ¹Sategú neteká holugú nene gonosiva mola apató vinigi anuvagi hilina ali vavá iki milamóma nene aliki vamó. ²Vi anitiake ánígamó nene, geha mulí agepaló gehani napa zi hitamó nene aló ahelú i ámiginago ánígamóza, ³keza áminagú itiake ánígamó nene Guivahani Izesuni gonosiváa ánígamamó neve. ⁴Lá iake ámina netakumú negi nagi hiziki niago, ve lositá galinali utó ikasike, iki holúikú minasimó nene, luhoaká góini nenémo gizopa vaevae loko minamó. ⁵Lá noigo ánígiake ámina vená nenete kehelele novizigo, mikasiuka gupá zemó. Lá niago, ámina ve losi nenetosa láa liki li kemesimó: Hele vegenalitini apakú amenigi oteko noi vemamú nanamú vitagá niave. Eza imanegú noamive. Mota otopá zeko otekave. ^{6-7d} Lekeza Galilaia mikasiuka minake okulumakutí lumu ve gihila neza netá golesa aliaká nia vetini kigizakú nilími milikiko, zohota zaló nipili hilikiko, gamena losive makole minokinake goha otinogo uve loko lo likimi gakokumú goha lakagata giliki minalo. ⁸Liki likasigo, keza gozapá láa loko lo kimi gakómaloka

^b 23:49 Luk 8:2-3 ^c 23:56 Gá 20:10; Gapo 5:14 ^d 24:6 Luk 9:22, 18:31-33

goha kagata giliake, ⁹geha mulikú gonosi mola apáma ahuliake, goha atiginá iki vake, aí izegipala zuhagutí ileveniági vejená lugáagi nene áníga sunimú avetó iki li kememó nene, ¹⁰Maliá eza Magatala apatotí vená itó Zoaná itó Maliá magáa eza Zemusini izolaho itó vená makó lugáa nenete ámina gakó avetó iki aposoloma li kememóza, ¹¹aposolomate gakó imane gihila nilave liki gili alévolé amamó. ¹²Lá niago, Pitá nene oteake gonosi mola apámaloka ololu loko vike geha mulikú gupá zeko ánígamó nene, lavolavo gó gizopa lamaná lositáma hanuva nego áníhoake, eza nene goha atiginá oko numutoka vike, ámina suni utó ikumú agata gululusi geleko minamó.

Emause numutoka nivasigo Izesú kémegetoko vimó
(Mak 16:12-13)

¹³Lá noigo, ámina gamenaló izegipala zuhagutí ve losi nene Emause numutoka vinigi gapoló vasimó. Emause apá nene Zelusalegatí hotó otigí oko 11 kilomita nenéminoko minamó. ¹⁴Lá iki nivasike, Izesutoka utó i netakumú ligili hagili iki nivasigo, ¹⁵Izesú nene vogaláikutí utó oake makó vamóza, ¹⁶kogómulaló hitonoigo, Izesú noive liki ánígi vevesamasigo, ¹⁷eza gakó nene nana onoigo ligili hagili iki nivasive loko lokago, keza nene viki notesike kogoka kegepa muhelé noigo, ¹⁸keikutí maga ve agulizá Kiliopá ave loko noi vémo anotó aleko láa loko lo amimó: Venó ve mukí iki Zelusale apakú ali nupa niamó nenete imane gamenaló utó i sunimú gili asú inamóza, géisi ve hamó nene gelemape. ¹⁹Loko lokago, eza nana suni utó ikumú nilasive loko loká okimikago, keza láa liki li amesimó: Nasalete numutotí ve Izesuni sunimú nolusive. Eza nene Ómasímini agepagutí gakó loaká ve minake, Ómasímini agómulaló itó vejenalitini kogómulaló alévolé gakó loaká ve itó alévolé suni aleaká ve minamó neve. ²⁰Lá imó nemóza, lelí guguni giziaká vete napagi lelí monó gizapa vetegi apili ahulatave liki goní imikago, zohota zaló apiliki apeteke apili hele vemú nolusive. ²¹Itó goí oko Isilae mikasiuka gala vetini kigizakutí lelémo atiginá itihe loko gelenounimóza, gakó makó láa loko neve. Ámina suni utó ikutí nene gamena losive makole mota vokave. ²²Lá onoimóza, lelí zuhagutí vená makó lugáate iki likago ininá okune. Keza neteká holugú nene gonosi milimilimaló vake, ²³gonosiva ánígamake, ageló losi utó ikasike Izesú nene oteko agómulagi noive liki lasi gajokumú nene ámina vená nenete vamokitana ánígiake, atiginá iki iki avetó iki li lememó. ²⁴Lá ikago, lelikutí makolititosa viki geha mulikú gonosi milimilima ánígasike, venalite iki avetó amómáminoko nego ánígasimóza, ámina ve nene agupeló ánígamasimó. ²⁵Liki likasigo, Izesú láa loko lo kimimó: Lekeza ve negi niasive. Mulutini lepa hizetigí onoigo Ómasímini agepagutí gakó liaká a vete gakó mukí luhuva gizinamóma nene gili zagemasive. ²⁶Ómasímo gologí oleketative

loko lo mololeketa vema nene ámina miluma netá ali gihimikiko helekoko alika nene oteoko lapanala goha alitive likigó gizinamóma neve. ²⁷Loko loake, Moseki itó Ómasímini agepagutí gako liaká a vetegi gizona gako lo kemeloko novike, ezáamú monó gotolaú gizona gako mukí nenémini mogonamú ale hee loko lo kimimó.

²⁸Lo kemeloko novike, Emause apá ali ávatiha iake, eza nene ámina apá avilegeko vinogo noigo, ²⁹keza agata aliki ho mota lemeake límugusi zinogo noize, lezagi makó akatune liki li amikasigo, Izesú nene gele kemekago, numukú nene makó itemó. ³⁰Itiki minake, nosá nanigi niake, eza nene mitó minake peleti aleake, Ómasi agepoka loake, gitegeake kimimó. ³¹Lá noigo, kogómula panava zekago, Izesuni nene ánihi hee hee lasimó. Ánihi hee hee nilasigo, litá oko legemage imó. ³²Lá okago, keza láa liki ligili hagili asimó: Gapoloka gako lo limike monó gotolámini mogona lo utó oko lo nolimike lelémó zaú okave. ³³Liki ligili hagili asike, litá iki otiki Zelusalega atiginá iki vasimó. Vi anitikasike, aí izegipala zuha 11-imagi agive lugáagi alegesá iki niago ánigikasigo, ³⁴ámina ve lositá nene litá iki aveté iki Guivahanitema nene lamaná oteko noike Saimoni utó o amekave. ³⁵Liki li kimikago, keza láa iki Izesúma gapoloka kémegetoko vike nosánetá nanigi peleti gitigitó ánihi hee lasi gako nene aveté iki li kemesimó.

Izesú izegipala zuhaloka utó o kimimó
(*Mat 28:16-20; Mak 16:14-18; Zon 20:19-23*)

³⁶Izegipala zuhamate ámina gako ligili hagili niago, Izesú nene galinali utó oake, ote minake hulu nene lekelitoka minino. ³⁷Loko lokago, keza ánihiake, ininá iake holosi utó okahe liki kehelele vizimó. ³⁸Láa iki kagata nigelego, eza láa loko lo kimimó: Lekeza nanamú ininá iki lakagata losi nigeleve. ³⁹Imane nezama lamaná utó nouve. Lekeza nigisa nigizatoka nuhúma ánigalo. Itó ánihiiki iki nugupeló ali giliiki ánihi hee lilo. Neza nugupegi vegená lahani utó okuve. Holosi nene nenéminiki niamave. ⁴⁰Loko lo kemeake, agisa agizani nene kelepizimó. ⁴¹Lá okago, keza mulúikú agila guluma itímo velesá gili alévolé amake kagata losi nigelego, Izesú nene lekelitoka nosánetá ma nehe. ⁴²Loko loká okago, keza lotó gizona lagaha makó amiake, ⁴³ánihinago aleko namó.

⁴⁴Itó Izesú láa loko lo kimimó: Neza lekezagi minunike Mosé lo hukoko li gakovú itó Ómasímini agepagutí gako liaká a vetini gakovú itó Ómasi agepoka liká nama liká a gakovú nenikumú epoapo gako luhuva gizamóma nene gihila ze asú inogo ive loko lo lekemeaká umóma neve. ⁴⁵Loko loake, monó gotolaú luhuva gizikago mina gako nene gili vevesatave loko kigika kagata ale koló oake, ⁴⁶láa loko lo kimimó: Monó gotolaú gologí oleketative loko lo mololeketa vemú nene miluma geleko heleoko gamena losive makole galegú minooko heleneitikutí otopá zeko

otinogo ive liki luhuva gizinamóma neve. ⁴⁷Itó aí agulizá nene numutó namató vegeatoka vo asú oko vokiko, vegeaná keza giliiki kigika ali viligikiko lihimáini ahuloketative loko lonoive. Itó ámina hoza nene Zelusale numutoka apí iki alimi vitave liki luhuva gizinamóma neve. ⁴⁸Ámina netá ángakumú aveté iki li kimita vegeánama lekelisi niave. ⁴⁹^e Gilinahe. Améneho Sikalahula lehizeleketatove loko lo mololeketamó nene amiselekugo liminogo ive. Lá itomó nenazo, lekeza imane apá litá iki ahulamiki ageva iki niiko velé okulumakutí zámuza lekemekiko vitave.

Izesú okulumakú itimó
(*Mat 16:19-20; Apo 1:9-11*)

⁵⁰Loko loake, minake, numutotí kelémoko vike Petania numuni ali alitiki viake, agizani ale otike nónohá zeketamó. ⁵¹Nónohá nozeketake ahuloketoko okulumakú itimó. ⁵²Lá okago, keza mulúikú agila guluma goha igo, Zelusalega atiginá iki vake, ⁵³guguni giziaká zavusavegú nene gamena gamena Ómasi agepoka liki minamó.

^e 24:49 Apo 1:4